

9 TOT 5  
IN DIENS VAN  
KONINKRYK ONBEPERK

Christo Nel

## INHOUDSOPGAWE

Inleiding .....	4
DAG 1 Jy is voltyds in bediening.....	5
DAG 2 Ek wil my hiertoe commit .....	7
DAG 3 Die oes is so ryp op die lande ... ..	10
DAG 4 Gebruik my, Here, daar waar die oes ryp is!.....	13
DAG 5 Seën hulle op die markplein.....	16
DAG 6 Gees van God, heilig ons manier van “kerk-wees”!.....	19
DAG 7 Wees soos suurdeeg .....	22
DAG 8 Kom ons lanseer mekaar.....	25
DAG 9 Waar ons kan leer om hande te vat, gebeur sinergie!.....	28
DAG 10 Seën die gemeenskap .....	30
DAG 11 Geroep na ‘n hele dorp of stad .....	33
DAG 12 God “beroep” ons op interessante maniere!.....	35
DAG 13 Ons geloof moet oorgaan in dade .....	37
DAG 14 Erediens van 9 tot 5, van Maandag tot Vrydag.....	40
DAG 15 Maak ons tot ‘n seën op die markplein, Here!.....	42
DAG 16 Waag om ook op die markplein op rots te bou .....	43
DAG 17 Wees versigtig hoe jy “die oneerlike mammon” hanteer.....	45
DAG 18 Die veiligheidsnet van ‘n volwasse klomp geestelike “buddies” om jou .....	47
DAG 19 Die waarheid van die Evangelie is op die spel .....	49
DAG 20 Christene betaal hulle rekeninge .....	51
DAG 21 Om jou werkers te min te betaal is gevaarlik! .....	53
DAG 22 Behandel mense soos jy Jesus sou behandel as Hy jou kliënt was .....	55
DAG 23 Wat sê God oor finansies en geld .....	57
DAG 24 Dit is vir God belangrik dat jy genoeg geld sal hê .....	59
DAG 25 God is geïnteresseerd in wat in jou hart aangaan .....	61
DAG 26 God se deel en ons verantwoordelikhede in die lig daarvan .....	63
DAG 27 Hoe voel jy oor die werk wat jy dag vir dag doen? .....	65

DAG 28	Oor hoe om geld verantwoordelik te hanteer (1).....	67
DAG 29	Oor hoe om geld verantwoordelik te hanteer (2).....	69
DAG 30	Oor hoe om geld verantwoordelik te hanteer (3).....	71
DAG 31	Oor hoe om geld verantwoordelik te hanteer (4).....	73
DAG 32	Oor hoe om geld verantwoordelik te hanteer (5).....	75
DAG 33	Oor hoe om geld verantwoordelik te hanteer (6).....	77
DAG 34	Oor hoe om geld verantwoordelik te hanteer (7).....	79
DAG 35	Oor hoe om geld verantwoordelik te hanteer (8).....	81
DAG 36	Laat ons bekend staan as onkreukbare mense (9).....	83
DAG 37	Om eerlik te wees in die onbelangrike dingetjies (10).....	85
DAG 38	Leer dit vir julle kinders.....	87
DAG 39	Elke dag is 'n keuse tussen lewe en dood.....	89
DAG 40	'n Keuse tussen lewe en dood (vervolg) .....	91

## INLEIDING

Ek wil jou uitnoui om saam met my vir 40 dae by die Here se voete te gaan sit en toe te laat dat die Here met ons praat ons ons lewe in Sy diens van 9 tot 5 gedurende die week daar waar Hy vir ons 'n verhoog gegee het.

Die simbool 40 in die Bybel is altyd simbool van 'n tydperk van toetsing voordat die Here jou met meer geestelike outoriteit vertrou.

Mag dit ook so wees in jou lewe.

Die skrywer

Christo Nel

Posbus 3114

Somerset-Wes

7129

Tel 021 851 0003

Sel 082 7702397

Eposadres: [nchristo@lantic.net](mailto:nchristo@lantic.net)

Webblad: [www.nuwewyn.co.za](http://www.nuwewyn.co.za)

## DAG 1 JY IS VOLTYDS IN BEDIENING

Een van die heilige koeie wat ek deesdae met groot genot afslag, is hierdie leuen dat net dominees, pastore en sendelinge in voltydse bediening is.

Dit is net nie Bybels waar nie! Elkeen wat die Skrif ken en veral dit wat God oor Homself as die Gees van God in die Skrif openbaar, behoort te weet dat elke Christengelowige wat kind van God is, met die Gees van die lewende God in en op hom of haar, voltyds in God se diens is en voltyds geroep is om Sy koninkryk hier op aarde te laat kom.

Dit geld veral daar waar jy van 9 tot 5 van Maandag tot Vrydag op die markplein beweeg.

Hoor hoe sê Paulus dit daar in 1 Kor. 10:31: "Of julle eet en of julle drink of wat julle ook al doen, doen alles tot eer van God." En in Kol. 3:22b-24: "Moenie net werk om deur hulle raakgesien te word en so in mense se guns te kom nie, maar werk met 'n opregte hart uit eerbied vir die Here. Wat julle ook al doen, doen dit van harte soos vir die Here en nie vir mense nie, omdat julle weet dat julle van die Here as beloning sal kry wat Hy belowe het. Christus is die Here in wie se diens julle staan."

Die van julle wat my geloofstorie ken, weet hoe 'n drie-maande-studie van die sowat 319 verse (in hulle konteks) in die Bybel, waar daar direk na die Heilige Gees verwys word, my hele lewe en bediening verander het. As jy hierdie verse een vir een deurgaan, staan een ding soos 'n paal bo water uit: God belowe 'n nuwe seisoen gaan aanbreek – na die koms van die Messias, waarin die Messias elkeen van Sy mense wil toerus met bonatuurlike gawes, om deur elkeen van hulle te werk (of te bedien, as jy wil).

Met die Pinkstervieringe vanjaar voor die deur, kom ons kou so 'n bietjie hieraan.

Hoor hoe Jesus daar in Luk. 24:48 en 49 vir Sy dissipels sê: "Julle is getuies van hierdie dinge. En Ek sal die gawe wat my Vader belof het, vir julle stuur. Maar julle moet in die stad bly totdat julle met krag van bo toegerus is." (Die NIV vertaal hierdie laaste gedeelte met "...until you have been clothed with power from on high.")

Jesus belowe hier dat Hy, as die Doper met die Gees (Hand. 1:5; 2:33), elkeen van Sy nuwe mense nuut gaan aantrek met "bonatuurlike krag" deur die werking van God se Gees. Hy gaan hulle toerus met bonatuurlike gawes (soos die van 1 Kor. 12:4 tot 10), wat hulle nie voorheen gehad het nie, vir hulle bediening waar hulle hulle ookal voortaan bevind.

In die bekende Hand. 1:8 herhaal Jesus dit as Hy die volgende vir Sy dissipels sê: "Maar julle sal krag ontvang wanneer die Heilige Gees oor julle kom, en julle sal my getuies wees in Jerusalem sowel as in die hele Judea en in Samaria en tot in die uithoeke van die wêreld." Sonder hierdie bonatuurlike krag en toerusting met die gawes van die Gees, kan Christene nie effektiewe getuies en bedienaars in hierdie wêreld wees nie.

Hierdie uitdrukking in die Grieks, wat hier in die Nuwe Afrikaanse Vertaling met "oor julle kom" vertaal is, kan ook met "op julle kom" vertaal word. In 'n paar ander tekste praat die Grieks van "toerus", of "doop", of "salf", en of "vervul" om presies dieselfde waarheid oor te dra.

Een van die mees aangrypende ontdekkings wat ek gedurende die 3-maande-studie oor die Heilige Gees en Sy werk gemaak het, was om God se prentjie van Sy mense na die Pinksterdag-gebeure te ontdek. Ek het ontdek dat die gebeure van die inkeer of bekering, die

geloofaanvaarding van Jesus as Verlosser en Here, die doop met water en die toerusting met die bonatuurlike gawes van die Gees letterlik soos 4 fases van een groot proses, en meestal alles op een dag, in nuwe Christene se lewens plaasgevind het in die Vroeg-Christelike kerk!

Toe ek dit raak gesien het, was dit asof alles net skielik in plek geval het! G'n wonder Dawid Pawson praat in een van sy treffende Bybelleringe hiervan as 4 fases van 'n normale Christelike geboorteproses in 'n Christen se lewe nie. Wat, soos enige geboorteproses, ter wille van 'n normale geboorte, so spoedig na mekaar moet plaasvind nie!

Hoeveel keer sien ons nie in die boek, Handelingte, hoe mense wat onder die getuienis of prediking van Christene tot bekering kom, dit met hulle mond teenoor Christen-omstanders bely, en daardie gelowiges daardie selfde dag die nuwe bekeerlinge geneem en gedoop het nie. Om dan, direk daarna, as deel van hulle aanvanklike bediening van hierdie nuwe bekeerlinge, net na die doop, terwyl daardie gedooptes nog baie keer by die water gestaan het, hulle hande op te lê en Jesus, as die Doper met die Gees, in gebed te vra om hierdie nuut-gedooptes toe te rus met Sy krag of bonatuurlike gawes, soos Hy belowe het (Luk. 11:9-13).

Wat vir my verder aangegryp het was die verdere gebeure daar op Pinksterdag: Die sowat 120 van God se mense, wat toegerus was met die gawes van die Gees, het uit hulle vergaderplek uitgekom het en daar op die markplein, in Jerusalem, die skares - wat die geluid van die wind gehoor en daarheen gestroom het - begin bedien.

Al 120 van hulle! Onmiddellik! Sonder dat iemand hulle dit gesê het! Die prentjie wat ek voor my hier sien is hoe God se Gees in en op hulle, elkeen van hulle hier gelanseer het in bediening!

Eintlik behoort dit ons, wat die Skrif ken, nie te verbaas nie. Dit is immers presies wat God in vele Ou Testamentiese profesieë beloof het gaan gebeur. Soos byvoorbeeld in Joël 2:28 en 29 en Jes. 61:1 e.v.

Christene het met die Pinkstergebeure wat plaasgevind het, en oral waar Jesus as die Doper met die Gees, herhaaldelik weer en weer Sy mense in die toekoms sou toerus met die gawes van die Gees, gelowiges deel gemaak van Eseg. 37:10 se leërmag nuwe bedienaars! Wat in Jesus se Naam, met die krag van die God se Gees in en op hulle, die gemeenskap om hulle, waar God hulle ook al wil gebruik, dieselfde dinge begin doen het as wat Jesus gedoen het. Soos Hy dit immers beloof het (Joh. 14:12).

Wat my opgewonde maak soos 'n kind, is om te beleef hoe God tans besig is om hierdie waarhede aan Sy mense oor die hele wêreld heen te leer.

Waar ek kom, waar ek lees op die internet, en in boeke en tydskrifte, is dit die hart van die ontdekking wat Christene tans oral maak. Dat hulle, as't ware van nuuts af, ontdek dat elkeen van hulle voltyds in God se diens is deur die werking van God se Gees, 24 uur, 7 dae 'n week. Maar veral van 9 tot 5, elke dag op die markplein.

Het jy dit al ontdek?

## DAG 2 EK WIL MY HIERTOEGE COMMIT

Êrens langs die pad het ons so verdwaal geraak dat die vyand dit reg gekry het om ons as Christene te verwar oor wat dit beteken om 'n Christen of die kerk van Jesus te wees.

Juan Carlos Ortis het op sy kenmerkende manier dit grappenderwys so vertel: Van hoe Satan en sy demoniese magte in 'n vergadering die Christendom sit en bespreek het. En dan uiteindelik besluit op 'n strategie om hierdie beweging so oneffektief moontlik te maak, deur hulle te oortuig ...

- Dit is beter as Christengroepe, wat van mekaar verskil, elkeen in sy eie gebou bymekaar sou kom. Sodat die een nie weet wat die ander doen nie.
- As hulle bymekaar kom, om in reguit rye agter mekaar te sit. Dan is daar nie werklik persoonlike verhoudinge tussen hulle moontlik nie

Kan jy glo dat ons begin dink het ....

- Sondae gaan ons "kerk toe"! Terwyl ons van Sondag tot Saterdag reeds "kerk" is!
- Dat "kerk toe gaan" net Sondae vir 'n uur of twee in hierdie "spesiale geboude geboue" gebeur! Waar ons in reguit rye agter mekaar sit. Met 'n mooi uitgedinkte spesiale program ("liturgie" noem ons dit as ons slim wil klink!). Terwyl elke oomblik van ons dag eintlik erediens behoort te wees!
- Dat dit "reg is" as ons "in ons kerk" "kerk hou", in "ons eie gebou", en besig is "met ons eie dinge", soos ons glo "reg is"! Terwyl die res van ons familie in Jesus nog daar buite in "al hulle eie geboue" sit!

Luister hoe definieer Paulus Christen-wees daar in 1 Kor. 10:31: "Of julle eet en of julle drink of wat julle ook al doen, doen alles tot eer van God." En in Kol. 3:23 as: "Wat julle ook al doen, doen dit van harte soos vir die Here en nie vir mense nie ..."

Ons lewe in 'n tyd wat God se Gees besig is om wêreldwyd Christene se oë en harte oop te maak om die absurditeit van ons ou verstaan van "kerk", "Christen-wees" en "bediening" te begin raaksien. Dit is werklik soos Jesus gesê het daar in Luk. 5:37 tot 39. God se Gees is besig om ou Bybelse waarhede in die verband nuut en vars aan ons te bedien, soos nuwe wyn. En hierdie nuwe wyn skreeu dan vir die noodsaak van soepel nuwe wynsakke. Die rigiditeit van die ou wyses van doen en verstaan van dinge, versmoor en demp immers dit wat God deur Sy Gees in hierdie tyd wil doen.

Natuurlik is dit nie vir almal ewe maklik aanvaarbaar nie. Jesus het immers ons daarvoor gewaarsku toe Hy gesê het: "En niemand wat ou wyn gedrink het, wil nuwe wyn hê nie, want hy sê: Die oue is goed." Maar dit gaan my nie verhoed om in die volgende paar weke 'n paar glasies nuwe wyn in hierdie verband aan jou te bedien nie. Mag God self deur Sy Gees jou Leermeester in die verband wees. Mag Hy dit gebruik om jou toe te rus vir jou bediening van 9 tot 5 elke dag waar God jou 'n verhoog gegee het. In diens van Jesus se besigheid, Koninkryk Onbeperk. Wat op elke duimbreedte van die lewe besigheid wil doen.

Ek glo dit wat ek hier aan jou bedien, is deel van die boodskap van een van die grootste reformasies wat nog ooit in die geskiedenis van die kerk van Jesus op aarde gebeur het. Die hart van die boodskap van hierdie reformasie is dat God besig is om deur Sy Gees "bediening" aan elke gelowige terug te gee, soos wat dit oorspronklik bedoel was.

'n Verdere vrug hiervan is dat geestelike leiers opnuut hulle roeping in hulle dorp of stad begin verstaan het. Dat ons taak niks minder en niks meer is as dit wat Paulus daar in Ef. 4:11 tot 16 verwoord as hy o.a. sê: "En dit is die "gawes" wat Hy "gegee het": apostels, profete, evangeliste, en herders en leraars. Sy doel daarmee was om die gelowiges toe te rus vir hulle diens en vir die opbou van die liggaam van Christus."

Om meer prakties en persoonlik te raak: Ek het weer opnuut ontdek dat ek deel is van 'n span geestelike leiers, mans en vroue, wat letterlik oor die wêreld versprei is, wat almal een van die figure van Ef. 4:11 en 12 is. Wie se taak en roeping dit is om gelowige Christene toe te rus en te lanseer in bediening, daar waar God vir hulle 'n verhoog gegee het.

Deel van my taak is om jou, onder andere, te leer daar is nie iets soos "ek is in voltydse bediening" en "jy nie". As jy 'n Christen is wat Jesus Christus as Verlosser en Here aangeneem het in geloof, woon God se Gees self in jou lyf, en wil Hy jou VOLTYDS gebruik om ander om jou te bedien. Al wat miskien die verskil tussen my en die meeste van julle is, is dat ek (en die ander geestelike leiers) deel is van die span wat God gekies het om gelowiges toe te rus vir hierdie bediening. Dit doen ek voltyds, omdat God my daarvoor geroep het vir nou.

Daarom wil ek gelowiges toerus en dan te lanseer in hulle spesifieke bediening daar in hulle gesin; tussen hulle vriende; in die naby en wyer Christen-familie waar God hulle geplaas het; op die markplein en in die werk waarvoor hulle goed gekwalifiseer en toegerus is; op die sportveld; of op die terrein van die onderwys; wetenskap; of regering; waar God hulle outoriteit en 'n plekkie in die son gegee het.

Sodat ons saam ons dorp of stad en sy mense tot seën kan wees. Of soos Jesus dit destyds gesê het: Sodat ons lig daar sal skyn, en ons werklik sout daar kan wees.

Daarom wil ek hier aan die begin van hierdie reeks jou uitdaag om saam met my 'n commitment te maak. 'n Commitment wat so klink:

"Vandag kies ons kant. Ons skaar ons by diegene wat moeg is om net te praat en niks verder te doen nie. Ons kies om voortaan deel te wees van dit wat God besig is om wêreldwyd te doen. Ons kies om hierdie golf te ry wat Sy Gees veroorsaak het. En daar is geen omdraai meer nie!

Ons wil vir die res van ons lewe net doen wat God in Sy hart het vir Sy mense. Sodat Hy verheerlik kan word.

Daarom kies ek om met my lewe, daar waar ek 'n verhoog het, elke dag van my lewe, ook van 9 tot 5 elke dag by die werk, alles wat ek het te gebruik om Sy bestaan en teenwoordigheid in en rondom my te vier... Om mense bewus te maak van wie Hy werklik is ... En Sy Gees in my lewe ruimte te gee om my so te beheer dat iets van Jesus se karakter elke dag meer en meer sigbaar sal word in my lewe... Ek kies om tyd en energie te gee om aktief deel te wees van Sy familie gelowiges daar waar Hy my ingevoeg het... En om sy liefde aan mense om my doelbewus te demonstreer... En as dit nodig is, woorde te gebruik.

Omdat God my verlede vergewe het, en my lewe nuwe betekenis gekry het, en ek weet daar is lewe na hierdie lewe op aarde, weier ek om voortaan...

Verder tyd en energie te mors... Deel te wees van die groep mense wat net elke dag probeer oorleef... My besig te hou met dinge wat nie werklik saak maak nie



Ek kies om eerder God op elke moontlike manier groot te maak; tyd te maak om te groei in geestelike volwassenheid; doelbewus tyd te maak sodat God my kan gebruik hoe en waar Hy ook al wil; om daar waar ek, met dit wat ek weet en is, 'n verskil en 'n bydra te maak.

Ek weet hierdie lewe op aarde is maar 'n klein fraksie van die "ewige lewe" wat ook na die dood voortgaan. Daarom kies ek om...

God eerder te dien as Mammon ... Ander se belange bo my belange te stel... Karaktergroei belangriker te ag as korttermyn gerief... Mense belangriker te ag as goeters en dinge, of posisie en eie gerief.

Ek het ontdek wat werklik waarde in hierdie lewe het. Daarom kies ek vandag om met alles wat ek het, die beste moontlik te doen wat ek kan vir Jesus en Sy koninkryk se koms op aarde. Ek kies om aan te hou daarmee en nie tou op te gooi nie, kom wat wil. Ek kies om met God se genade te doen wat ek moet doen, onder die beheer en die leiding van God se Gees, doelgerig, gefokus, sonder om kompromie te sluit.

Met die gebed in my hart dat ek deurgaans 'n toonbeeld sal wees van U genade, U liefde, U verlossende krag, U beeld, Here Jesus!

Gee U my die genade om, hoe U my ook al lei en wat U my ook al vra, U onvoorwaardelik te gehoorsaam. Enige tyd, enige plek en oor enigiets. Wat dit ook al gaan kos. Here, kies ek om U bo alles lief te hê, omdat U my eerste liefgehad het.

Sodat ek ook eendag, daar voor U troon, van diegene sal wees wat hoor: Kom in, goeie en getroue dienskneg, sodat ons vir ewig kan fees vier!

### DAG 3 DIE OES IS SO RYP OP DIE LANDE ...

God is besig met hierdie kop- en hart-ding in Sy kinders se lewens dwarsoor die wêreld. Of in Paulus se woorde daar in Rom. 12:2: "Julle moenie aan hierdie sondige wêreld gelyk word nie, maar laat God julle verander deur julle denke te vernuwe. Dan sal julle ook kan onderskei wat die wil van God is, wat vir Hom goed en aanneemlik en volmaak is."

Die Here is besig met 'n merkwaardige ding, naamlik om ons te leer om anders oor die kerk en oor ons elkeen se bediening en rol te dink. Deel hiervan is om elke gelowige te oortuig dat Hy vir ons 'n voltydse bediening en 'n roeping het ook van 9 tot 5 in diens van Sy Koninkryk Onbeperk.

God wil 'n vertoonvenster elke dag van die week skep binne stapafstand vir elke mens op aarde. Waar mense geleentheid kan hê om God se genade, liefde, krag, grootheid en karakter baie konkreet en as 'n sigbare werklikheid te sien en te beleef. En ons gaan die "verkoopersoneel" daar wees!

Daarom moet God ons prentjies verander; hoe ons dink oor dinge, want ons prentjies is skeef en onbybels as gevolg van wat ons oor die jare geleer en beleef het. Soos wat Jesus se dissipels se prentjies ook maar lekker skeef was. Daarom moes Jesus vir drie jaar so timmer aan hulle. Ons sien dit weer gebeur daar in Joh. 4:27 tot 35.

Kom blaai saam met my na Johannes se vertelling van Jesus se ontmoeting met die Samaritaanse vrou by die put. Hierdie keer wil ek 'n bietjie fokus op die dissipels se optrede in hierdie gebeure. Kom ons lees Joh. 4:27 tot 35 saam: "Net toe het sy dissipels teruggekem en hulle was verbaas dat Hy met 'n vrou praat. Tog het niemand vir haar gevra: 'Wat wil jy hê?' of vir Hom: 'Waarom praat U met haar?' nie. Die vrou het toe haar waterkruik net daar laat staan en na die dorp toe gegaan en vir die mense gesê: 'Kom kyk, hier is 'n man wat my alles vertel het wat ek gedoen het. Is Hy nie miskien die Christus nie?' Die mense het toe uit die dorp uit na Jesus toe begin kom. Intussen het sy dissipels by Hom aangedring: 'Rabbi, eet tog 'n stukkie.' Maar Hy sê vir hulle: 'Ek het voedsel om te eet waarvan julle nie weet nie.' Die dissipels sê toe vir mekaar: 'Sou iemand dalk vir Hom iets te ete gebring het?' Maar Jesus het vir hulle gesê: 'My voedsel is om die wil te doen van Hom wat My gestuur het, en om sy werk te voltooi. Sê julle nie: 'Nog vier maande, dan is die oes daar' nie? Maar Ek sê vir julle: Kyk daar, kyk na die lande; hulle is ryp vir die oes.'"

Verstaan mooi wat hier gebeur. Hierdie dissipels is almal mense met 'n tipies Joods-godsdiensstige agtergrond. Waar Fariseërs en priesters hulle leermeesters was. Waar hulle geleer het die tempel is die "huis van God", waarheen mense moes kom om meer oor God en Sy dinge te leer. Dit was die plek en die tyd daarvoor.

Verder was dit ook die Fariseërs se benadering om soveel moontlik tyd met ander Fariseërs te spandeer en selfs net met hulle, sover moontlik, besigheid te doen. Dit was dus asof hulle vir hulle self hierdie geestelike "bobbels" geskep het, heelwaarskynlik met 'n gepaste Fariseër-plakker op, terwyl hulle "radio" permanent net op Radio-Fariseër was!

Hulle boodskap aan almal buite hierdie bobbel was: Kom na ons toe! Word soos ons! Glo soos ons! Begin aantrek soos ons! Tree soos ons op! Praat soos ons! Hou van ons musiek! En as jy soos ons word, sal ons oorweeg om jou by ons toe te laat sodat jy kan lid word van ons "kerk-klub!"

Klink dit dalk bekend!

Die meeste Jode het dit begin glo en dus ook die dissipels van Jesus, voordat hulle Hom leer ken het. G'n wonder die dissipels het nie die "ryp oes op die land" gesien het toe die Samaritaanse vrou van Joh 4 by hulle verby gestap het nie! Soos ons nie die "ryp oes" rondom ons elke dag raaksien nie!

Dit het vir my so duidelik geword toe ek in die koerant gelees het van hierdie jong Moslem wat 'n saak gemaak het teen 'n besigheidsvrou in Kaapstad. Wat geweier het om hom te bedien indien hy nie sy fez verwyder nie (die hoedjie wat die Moslems dra as 'n simbool van Islam). Hy het natuurlik geweier, en sy het hom haar winkel verbied, want, het sy gesê, sy is 'n Christen, en doen net besigheid met Christene of diegene wat nie godsdienstige tekens of klere dra nie.

Dit het my skaam gemaak om te dink mense kan dink dit is hoe Christene oor die algemeen is. Tog wonder ek of dit nie in 'n mate tekenend is van hoe min Christene verstaan wat dit beteken om "kerk" te wees in hierdie wêreld, en veral op die markplein nie.

Kom ek vra jou 'n persoonlike vraag: Hoeveel nie-Christen-vriende het jy nog oor? Het jy ook, soos die meeste ander Christene, jou vriendskap met hulle verbreek – heelwaarskynlik kort na jou bekering - omdat julle nie meer baie vir mekaar te sê het en dit beslis nie meer gemaklik in mekaar se geselskap was nie?

Kyk ons na die Liggaam van Jesus vandag, sien ons oral "kerke" wat so gefokus is om "hulle eie gemeente of kerk" te laat groei, dat ons bykans vergeet het wat Jesus se eintlike opdrag vir Sy mense op aarde is. Naamlik: "Gaan dan heen, maak dissipels van al die nasies, doop hulle en leer hulle ..." Ons is dus op aarde vir die wêreld daarbuite is en nie in die eerste plek vir diegene wat reeds "lid" is nie.

Dit gebeur baie maklik. Veral as 'n "kerk" of gemeente skynbaar suksesvol is, en sy bedieninge groei. Sodat hy meer en meer tyd en geld moet spandeer omdat hy meer mense en geboue moet huur of bou om "die suksesvolle kerk" aan die gang te hou.

Dit word redelik algemeen aanvaar dat as "ons kerk" beter en meer gebruikersvriendelik sou word, sal die ongelowiges meer geredelik "kerk toe kom". Maar is dit werklik so? Glo ons werklik dat as ons "die beste kerk in die wêreld" gehad het, die gemiddelde nie-Christen definitief daarheen sou gaan?

Ek dink nie so nie. En statistiek bevestig dit ook nie.

Ek dink as ons rustig Bybels hieroor begin nadink, sal ons moet sê: wat die wêreld werklik nodig het, is God in hulle lewe. Nie nog 'n kerk nie! Net God. 'n Persoonlike liefdesverhouding met die lewende God van die Bybel! Dit gaan die verskil in hulle lewens maak!

Terug na ons verhaal in Joh. 4. Ek sê, heelwaarskynlik het Jesus se dissipels by hierdie vrou verbygeloop op pad dorp toe. Sy was immers 'n vrou en boonop Samaritaans. Groot was hulle verbasing dus toe hulle terugkom en Jesus so opgewonde soos 'n kind vind, na 'n gesprek met hierdie vrou. Soveel so dat Hy nie eers lus was vir eet nie!

As hulle dan hardop wonder of iemand dalk vir Hom reeds kos gegee het, begin Jesus met hulle praat oor die "ryp oes op die land".

Hoeveel keer is ons, soos die dissipels, totaal blind vir die "ryp oes op die land" rondom ons! Die probleem van die dissipels is ook maar ons probleem vandag. Ons het opgegroeï en so gewoond geraak aan kerk-wees en alles wat dit behels. Ons is so besig met allerlei dinge binne ons gemeente self en om al ons programme aan die gang te hou. Of om te sorg dat

almal in die gemeente versorg is en dat die byeenkomste op standaard sal wees en deur almal bygewoon word. Dat ons nie meer werklik op die uitkyk is vir “oes” nie.

Verstaan mooi, dit is nie dat ons nie ‘n hart en ‘n verwagting vir oes het nie. Dit is net dat ons, soos die dissipels, dink oestyd kom meestal net een of twee keer per jaar. Elke ding het sy tyd en sy plek.

Jesus se evangelisasie-strategie het natuurlik hierdie benadering direk uitgedaag! In plaas van “kom en haal dit wat ons het!”, het Jesus uitgegaan na hulle toe! In plaas van heel tyd tussen die godsdienstige mense te wees, het Jesus ‘n vriend geword van sondaars. Hy het saam met hulle geëet en saam met hulle gedrink.

Dit het die Fariseërs teen die bors gestuit. Veral toe Hy laat blyk dat God mense liefhet en aanvaar soos hulle is. Sodat hulle, in die dampkring van Sy liefde, tot inkeer kan kom en hulle lewens kan omdraai.

Jesus het Homself geheel en al gegee vir die armes, die siekes, die skobbejakke in die samelewing, die weduwees en die wese, en almal wat hulle nie tuis gevoel het in die tipies godsdienstige wêreld van die bevoorregtes nie. Want Hy het oë gehad vir die “ryp oeslande”.

Het jy? Het jy werklik ‘n oog vir die “ryp oeslande” wat elke dag jou pad kruis? Veral van Maandag tot Vrydag van 9 tot 5!

## DAG 4 GEBRUIK MY, HERE, DAAR WAAR DIE OES RYP IS!

Die grootste deel van die Christendom is gerat vir Sondae, en spesifiek om die byeenkomste van Sondagoggend besonder aantreklik te maak. En daar is sekerlik niks hiermee verkeerd nie.

Dit is egter van lewensbelang om mekaar gedurigdeur daaraan te herinner dat statistiek toon dat die ongelowige wêreld daar buite nie “kerk toe” kom net omdat die eredienste besonder aantreklik is nie. As hulle kom, kom hulle omdat hulle ‘n vertrouensverhouding met ‘n Christen het wat daardie eredienste bywoon.

As ons dus by hierdie mense wil uitkom, sal ons na hulle toe moet gaan.

Ek het ook die afgelope tyd geweldig bewus geword van hoevele mense in ons samelewing wat feitelik nooit “in die kerk” kan kom nie, selfs al wil hulle ook. Dink maar aan al ons mediese personeel, polisie, kelners en kelnerinne, straatwerkers, winkelpersoneel, petroljoggies, sommige sportmanne en –vroue. En die lys gaan net aan en aan.

Jesus sê daar in Joh. 4:35 vir Sy dissipels: Kyk na die oes! Dit staan ryp op die lande ... In my eie woorde: Die ryp oeslande is daar buite; buite die tipiese kerkgeboue en kerklike byeenkomste! Ons moet in die winkels, op straat, op die markplein en in die gewone lewe verwag om “ryp oeslande” te ontdek.

Hulle sê my in die Kaapse metropool, as ons al die kerkgeboue stampvol met mense maak, pas ons so 300 000 mense in die bestaande geboue in. Maar dit beteken dan dat negetiendes van die Metropool se bevolking nog êrens buite is! Die oes is buite!

As Jesus daar in Mat. 28:19 en 20 (volgens die 53-Vertaling) sê: “Gaan dan heen, maak dissipels van al die nasies, en doop hulle in die Naam van die Vader en die Seun en die Heilige Gees; en leer hulle om alles te onderhou wat Ek julle beveel het...” beteken dit ten minste dat ons die “oes” daarbuite ook moet gaan af-oes.

Die meeste kerke en gemeentes se bediening is totaal gefokus op hulleself en die gelowiges wat daar inskakel. Feitelik 80 tot 95% van alle fondse en hulpmiddels gaan daarna toe. Asof dit is waar die “ryp oesland” is.

Terwyl die ryp oesland buite in die res van die gemeenskap is. Dit is daar waar mense God se genade, verlossing, liefde, krag en grootheid moet ervaar. Hulle is ons “potensiële kliënte” waarvoor ons moet begin tender en op wie se behoeftes ons moet begin fokus. Dan maak dit mos sin dat dit in hulle is wat ons geld, manne- en vroue-krag en bronne moet belê.

Daarom sal ons hulle behoeftes moet begin verstaan. As ek na Jesus se styl van bediening gekyk het – neem nou maar byvoorbeeld hoe Hy hierdie Samaritaanse vrou in Joh. 4 bedien het – sien ek hoe Hy mense begin bedien het daar waar hulle ‘n behoefte het.

Ons kan mense nie net dit aanbied wat ons dink hulle nodig het nie. Ons sal hulle moet begin aanbied wat hulle voel hulle werklik nodig het en wat hulle wil hê.

Om prakties te raak: In Suid-Afrika is dit dinge soos kos; mediese sorg; opleiding om mense selfversorgend te maak en te help om ‘n betroubare werk te kry. Ons sal moet begin om mense se krisis in die hier-en-nou te bedien. Soos om kinders sonder ouers by te staan en om Vigs-pasiënte te help om ‘n kwaliteit-lewe te lewe en waardig te sterwe. En so kan ons lys langer en langer word, want die nood en die behoeftes daarbuite is legio.

Maar ek wil jou nie oorweldig nie. Ek wil jou stimuleer om God te vertrou om vir jou oë en 'n hart te gee vir die ryp oeslande daar om jou elke dag. Veral daar waar jy 'n verhoog het van 9 tot 5 van Maandag tot Vrydag. En ek wil jou inspireer om God te vertrou om jou te wys waar Hy jou spesifiek wil gebruik.

Daarom wil ek jou uitdaag om jou vandag te commit tot een ding, hoe klein of groot ook al, wat jy daar kan gaan doen as deel van jou bediening die week in diens van Koninkryk Onbeperk.

Kom ons neem nou maar die eenvoudigste van voorbeelde: Jesus het na hierdie wêreld gekom om te dien, nie om gedien te word nie. Dink net wat sou gebeur as elke Christen in hierdie wêreld elke week een diens aan iemand anders in Jesus se Naam sou lewer! Wat 'n verskil sou ons nie begin maak nie!

Soos Jesus, kom ons vertrou God vir so 'n ontmoeting êrens by 'n "waterput" hierdie week. Waar ons met Jesus se hart en Sy oë sensitief is vir 'n ryp oesland en vir wat die nood in daardie persoon se lewe is wat ons brug kan word na die hart van daardie mens.

Jesus het daardie vrou ontmoet waar sy was. In haar nood. En haar spesifiek daar bedien. En sy het verfris en genees weggegaan.

Asseblief, ek praat nie net daarvan dat ons "goeie, vriendelike dinge" vir mense moet doen nie. Ek praat daarvoor dat ons doelbewus in Jesus se Naam en in Sy diens Sy voorbeeld navolg. As mense wat waarheid en liefde bedien aan mense.

En as mense jou vra waarom jy dit doen, dan eerlik hulle te antwoord waarom jy dit doen.

David Yongi Cho, van Suid-Korea, is die senior leier van een van die wêreld se grootste gemeentes van bykans 900 000 mense. Hy het die gelowiges in hierdie gemeente uitgedaag om hulle gemeenskap te bedien met wat hulle noem "spontane ongevraagde hulpverlening" ("acts of kindness").

Hy het hulle verder geleer om, as iemand sou vra waarom hulle dit doen, hulle dan te antwoord: Ek is 'n volgeling van Jesus. Ek dien Hom deur jou te dien, want dit is waarvoor Hy na hierdie wêreld toe gekom het.

Is dit nie 'n briljante antwoord nie! Dit sê presies die regte dinge sonder om te prekerig te wees. En dit sê vir mense God gee vir hulle persoonlik om. Terwyl dit ook aan mense presies sê wat dit beteken om 'n volgeling van Jesus te wees.

Daar is 'n tyd vir direkte, amper konfronterende evangelisasie. Maar ek persoonlik glo ons moet die reg verdien om met mense oor die evangelie te praat. Dit is wat Jesus deurgaans in Sy bediening gedoen het. Hy demonstreer dit keer op keer deur met liefde en omgee mense in hulle nood te bedien.

Dit is nie ons werk om iemand van sonde te oortuig nie. Dit is die Heilige Gees se werk. Ons werk is om mense die goeie nuus te vertel, of moet ek sê, te demonstreer. Deur ons liefde moet hulle begin ontdek dat God hulle so liefgehad het dat Hy Sy Seun na hierdie wêreld gestuur het. Daarom stuur Hy ook nou ons na hulle toe. Om hulle, daar waar hulle is, in Sy Naam te bedien waar hulle nood en behoefte het.

Ons is hier om aan die sekuriteitswag 'n koue koeldrank op 'n warm dag te gee. Of 'n kardoessak vol heerlike gesonde kos aan die bedelaar daar by die robot. Of 'n vriendelike glimlag of vriendelike groet, en soms 'n bossie blomme, aan die ontvangsdame daar by jou kantoor.

Spontane vriendelikheid en hulp. Om iemand se dag op te tower en 'n fees te maak. En ons doen dit omdat ons volgelinge van Jesus is. Wat Hom dien deur jou te bedien. Dit is immers waarvoor Hy na hierdie wêreld gekom het.

Kyk, kerk, die oes op die lande is ryp. En die oes is o, so groot! En die werkers is so min. Kom ons commit onself om ten minste van 9 tot 5 elke dag by die werk Sy medewerkers te wees wat mense in Sy Naam bedien soos Hy ons lei.

## DAG 5 SEËN HULLE OP DIE MARKPLEIN

Verlede keer het ek reeds gesê dat God se Gees oor die wêreld heen besig is om Sy mense se manier van dink te verander oor die kerk, hulle self en hulle bediening. Hoor wat skryf een van ons boeties in Jesus daar uit China n a v my Woord van verlede week:

“Dankie vir die ewig-vloeiende verfrissende “wyntjies”. Ek stem 100% saam met jou. Dis tog so gerieflik vir ons as Christene om soldaat te speel in die lekker veilige Peloton, Kompanie of Brigade. Daar waar almal naastenby weet wat aangaan en versamel is onder een sambreeltjie. Dis so maklik en lekker om daar te werk en te speel. Ek meen nou basaars te hou, pannekoek en jafel eet, kompetisies met toutrek en tombola, sondegskool en piekniek, uitstappies, met een of meer huishulpe om om te sien na al die minderwaardige werk in en om die huis.... Maar wanneer dit kom by “Recci” wees, dis waar die "Real Challenge" kom. Dis waar jy moet uitgaan die wildernis in sonder die "support" van die gerieflike geboue en gemeente-strukture. Waar jy jou eie gerief vir ons Koning moet opgee om in Sy diens te wees. Daar in die strate, die parke, op die strande, by die dobbelplekke, die kroëe, op kampus, op die skoolterrein, in die personeelkamer, op kantoor, op die konstruksieperseel, in 'n ander land onder ander wette wat jou lewe in gevaar stel, op die oorlogfront, in die haglike omstandighede van die ashoop, skroppers en "disaster stricken areas", waar jy die stank van honderde lyke kilometers ver kan ruik en 'n verdwaalde kind agter 'n verlate huis opspoor. Hoeveel van ons het werklik al daarby uitgekom?”

Tot sover die aanhaling. Kom ons lees dit wat Jesus daar in Joh. 4:34 tot 38 sê: “My voedsel is om die wil te doen van Hom wat My gestuur het, en om sy werk te voltooi. Sê julle nie: ‘Nog vier maande, dan is die oes daar’ nie? Maar Ek sê vir julle: Kyk daar, kyk na die lande; hulle is ryp vir die oes. Nou al ontvang die man wat oes, sy loon en samel hy die oes in vir die ewige lewe. So is die een wat saai, en die een wat oes, saam bly. Hier is die gesegde waar: ‘Die een saai, en die ander een maai.’ Ek het julle gestuur om ‘n oes in te samel waaraan julle nie gearbei het nie. Ander het gearbei, en julle pluk die vrug van hulle arbeid.”

Kom ons lees ons ook dit wat daar in Luk. 10:2 en 3a staan waar Jesus vir 36 spanne van twee elk van Sy volgelinge sê: “Die oes is groot, maar die arbeiders min. Bid dan die Here aan wie die oes behoort, om arbeiders uit te stuur vir sy oes. Gaan nou!”

Daar gebeur iets in 'n gelowige sakeman of -vrou, of onderwyser, of huisvrou se lewe as hulle ontdek hulle is die “arbeiders” waarvan Jesus hier praat. Dat hulle daar waar hulle van 9 tot 5 in die week 'n verhoog het, voltyds in bediening is.

Dit is mos die implikasie van dit wat daar in 1 Kor. 10:31 staan: “Of julle eet en of julle drink of wat julle ook al doen, doen alles tot eer van God.” Maar ook van Kol. 3:22b tot 24 as Paulus vir werkers sê: “Moenie net werk om deur hulle raakgesien te word en so in mense se guns te kom nie, maar werk met 'n opregte hart uit eerbied vir die Here. Wat julle ook al doen, doen dit van harte soos vir die Here en nie vir mense nie, omdat julle weet dat julle van die Here as beloning sal kry wat Hy belowe het. Christus is die Here in wie se diens julle staan.”

In die verlede het ge-committe gelowiges wat beleef het dat God hulle roep om voltyds in Sy diens te staan, net een pad geken en dit is om teologie van die een of ander aard te begin swot om as predikant, pastoor of sendeling êrens in God se koninkryk te begin werk. Maar deesdae verstaan ons soveel beter, soveel meer Bybels-korrek. Dat elke Christen voltyds in bediening is, ongeag waar hy of sy 'n verhoog het.



Hoeveel sakemanne en –vroue in die verlede het soms gevoel al rede waarom hulle “goed genoeg is vir die kerk” is omdat hulle geld goed genoeg is vir die “kerk”! Hoe meer hulle kan gee, hoe makliker kan ons grond koop vir “kerkgeboue” en dit af betaal, of kan ons die plaaslike dominee of pastoor se salaris betaal. Omdat alles vir die “kerk” om “ons kerk en gemeente” gegaan het.

Sien, dit was hoekom daar ‘n transformasie en ‘n Rom. 12:2 –aksie in die kerk nodig was! Om ons te help om die ryp oeslande rondom ons raak te sien, en om die miljoene gelowiges wat in duisende geloofsfamilies oor die jare vet gevoer is, te lanseer in hulle onderskeie bediening. En veral te lanseer in hulle bediening in die ryp oeslande op die markplein.

Hulle moet gehelp word om te ontdek dat God daar vir hulle ‘n “preekstoel” gebou het. En daar vir hulle ‘n “gemeente” met ‘n ingeboude ongelowige gemeenskap voorberei het wat sommer “hulle sendingveld” ook gaan wees. Hulle moet gehelp word om te hoor hoe hulle Here en Koning hulle roep om ten minste van 9 tot 5, van Maandag tot Vrydag, daar te bedien met dit wat God se Gees self aan hulle sal wys en leer. Sy dit in die besigheidswêreld, in skole of ander opleidingsentrum, in ‘n regeringsinstelling, ontspanningsentrum of hulle eie kombuis en huis.

Weet jy hoe bevrydend is hierdie ontdekking vir mense! Om te ontdek dat daar ander maniere is om God te dien as “binne die gemeente”. Dat die grootste gedeelte van ons almal se roeping en bediening eintlik daar buite in die ryp oeslande lê en dat dit daar is waar ons “kerk” moet wees.

Kom ek val myself net eers in die rede: Ek is oortuig ons elkeen se primêre bediening is tuis, in jou eie huis, familie, huwelik en gesin. Maar dit is nie waaroor ek tans met jou gesels nie. Tans gesels ek met jou oor jou bediening daar by jou werk, in die organisasie of besigheid waar God jou finansiëel versorg van maand tot maand. Veral omdat dit daar is waar jy die grootste deel van jou week spandeer. Dit is die langste “erediens” wat jy weekliks bywoon.

Daar is jy deel van ‘n hele span Christenwerkers wat God baie spesifiek daarheen “beroep het” om die mense daar, en die mense wat julle paaie daar kruis, te bedien met lewe, Sy lewe. Om daar lig te wees sodat hulle die Lig persoonlik kan ontdek in hulle lewens.

As ‘n mens dit eers ontdek het, is dit tragies om die volgende feite in die oë te moet staar:

- Dat 90 tot 97% Christene sê hulle is nooit geleer hoe om hulle Bybelse geloof in hulle werksituasie of besigheid toe te pas nie
- Dat 47% gelowiges sê die lering of prediking is irrelevant vir hulle daaglikse lewe.

Os Hillman skryf dat daar 4 tipe Christene in die werkplek is:

- Díe wat elke dag net daar probeer oorleef
- Díe wat weet hoe om Bybelse beginsels ook daar toe te pas
- Díe wat geleer het hoe om ander onder die leiding van en met die krag van die Heilige Gees ook daar te bedien
- En die klein groepie Christene wat deur God se genade hulle werksplek en die gemeenskap begin verander in die Naam van Christus Jesus

Lyk vir my wat hy hiermee sê is dat daar ‘n proses in Christene se lewens aan die gang moet kom, wat hulle kan toerus om van die eerste tipe na die vierde tipe Christen, deur God se genade, te groei. En dit is hier waar toerusting, en dus die Ef. 4:11 en 12-span, nodig is in

gelowiges se lewens. Om hulle prakties te begelei en toe te rus hoe om ook daar in die markplein effektief te bedien.

Daarom wil ek hierdie deel afsluit deur kursories te verwys na die model wat Jesus daar in Luk 10 vir die 36 spanne van twee elk van Sy volgelinge geleer het toe Hy hulle uitgestuur het om in die dorpe en stede (en dus ook op die markplein) te gaan bedien. Hy het hulle vier dinge geleer:

- Gaan seën mense daar waar Ek julle heen gestuur het. Ek wil dit so verwoord: Gaan wees vir die mense daar, in Jesus se Naam, onder die leiding van Sy Gees, tot seën. Bedien lig daar, en lewe, en vrede.
- Fokus doelbewus daarop om deel te word van hulle lewe en om gesonde, persoonlike liefdes- en vertrouensverhoudinge met hulle op te bou
- En terwyl julle daarmee besig is, wees maar beskikbaar om, as die geleentheid hom voordoen, 'n kanaal van God se Gees daar te wees om enige nood wat God jou wys, te bedien met gebed en die krag van God se Gees, soos Hy lei
- En as jy 'n geleentheid kry – gewoonlik wanneer hulle die regte vrae begin vra na aanleiding van waar jy hulle nood begin bedien het – vertel hulle dan waarom jy dit gedoen het. Vertel hulle van die Goeie Nuus oor Jesus, Sy koms, God se liefde vir hulle en Sy koninkryk wat aarde toe gekom het om lewe in oorfloed, hier in mense se lewens en oral om ons, te laat aanbreek

Ek wil jou uitdaag: Kom ons gaan volg hierdie week hierdie voorbeeld daar waar God ons 'n verhoog gegee het!

## DAG 6 GEES VAN GOD, HEILIG ONS MANIER VAN “KERK-WEES”!

Die Heilige Gees se naam is nie verniet “Heilige” Gees nie! Hy is immers die Een wat 24 uur, 7 dae ‘n week, elke minuut van die dag, in God se mense besig is met Sy heiligmakingswerk.

As ons nou mooi gaan sit en dink oor wat dit presies beteken, dan beteken dit niks anders as dat Hy besig is om ons te verander nie. Al hoe meer na God se hart. Dat ons sal lyk, lewe en dink soos wat God se hart vir ons is.

Daarom moet ons nie skrik as “die kerk” en ons manier van dink daarvoor, begin verander nie. Dit is eintlik logies dat dit so moet wees, as ons oop is vir die oortuigingswerk van God se Gees.

Tans sien en hoor ek oral tekens van God se Gees se wind van verandering wat aan die waai is onder God se mense, ongeag waar hulle binne die Liggaam van Jesus is.

En soos ek reeds gesê het is die hart van hierdie verandering rondom hoe ons “kerk-wees” verstaan.

Ons begin al hoe meer vandag verstaan dat die sukses van ons “kerk-wees” nie meer net gemeet kan word aan die grootte van ‘n bepaalde gemeente of kerk nie. Dit gaan ook nie in die eerste plek daarvoor of ons soeker-gerig, of plek het vir kleingroepe, of oop is vir die gawes van die Gees is nie. Dit gaan eerder daarvoor of ons werklik ‘n betekenisvolle en volhoubare impak en verskil maak in die lewens van die mense rondom ons in ons dorp of stad.

Meer en meer gelowiges begin verstaan dat ons nie kan aanhou om dinge op dieselfde wyse te doen as wat ons dit al die jare gedoen het en verwag dat ons ander resultate gaan kry as in die verlede nie. As ons werklik erns maak met Jesus se woorde om werklik sout en lig daar te wees waar God ons ‘n verhoog gegee het 7 dae ‘n week, 24 uur elke dag, sal ons moet begin om dinge anders te doen en anders “kerk” te wees.

Om ‘n gemeenskap te verander lê nie in die eerste plek in ‘n klompie programme en nuwe strategiese planne nie. Daar moet eers iets in ons koppe en harte gebeur. Ons moet anders begin dink. My liefing-maniër om dit te sê is om te sê: Wat ons nodig het is “nuwe wyses” wat werklik die waarheid van die “nuwe wyn”, wat God se Gees tans aan ons almal bedien, kan akkommodeer.

God se Woord waarsku ons dat ons soms so vasgevang sit in ons tradisies en maniere van doen, dat ons glad nie oop is vir wat God nou oor Homself en oor Sy planne aan ons wil openbaar nie. En net God se Gees kan ons hiervan oortuig. En ook net as ons werklik oop is vir oortuiging.

God is tans wêreldwyd besig om Sy mense se oë oop te maak vir die rol wat ons as “kerk” het in die gemeenskap waar ons woon en werk. Kom ek begin hierdie veranderinge so verwoord:

### 1. Wees lig in die wêreld.

Lees weer ‘n slag saam met my daardie bekende gedeelte in Mat. 5:13 en 14: "Julle is die sout vir die aarde. Maar as sout verslaan het, hoe kry ‘n mens dit weer sout? Dit is niks meer werd nie. Dit word buitekant weggegooi, en die mense vertrap dit.. Julle is die lig vir die wêreld. ‘n Stad wat op ‘n berg lê, kan nie weggesteek word nie; ook steek ‘n mens nie ‘n lamp op en sit dit onder ‘n emmer nie maar op ‘n lampstaander, en dit gee lig vir almal in die huis."

Sien jy wat ek sien? Kerk-wees beteken ons moet sout wees op hierdie aarde, daar waar God vir ons 'n verhoog gegee het. En ons moet lig wees daar in die wêreld, in die dorp of stad, en dus ook werksomgewing, waar God ons geposisioneer het vir nou.

Wat onmiddellik vir my beteken ons moet daar tussen hulle "kerk" wees. Sonder al die mure wat ons al die jare om ons "kerke" gebou het. Wat eintlik niks anders gedoen het as om ons van mekaar as gelowiges weg te hou nie. Maar ook veral van die "wêreld daarbuite" weg te hou nie.

Sout-wees en lig-wees gaan dus beteken dat ons brûe moet bou in plaas van die mure van die verlede.

Ons sal "boots and all" moet deel word van ons gemeenskap om werklik daar 'n impak te kan maak.

Natuurlik is ons geroep om 'n andersoortige lewensstyl en waardes as die wêreld te hê. Maar die plek waar ons dit moet gaan demonstreer, waar die sout-gehalte en lig-sterkte daarvan werklik getoets gaan word, is of ons daar in die hart van ons werk-, leef- en ontspanningswêreld werklik 'n verskil maak.

Ek lees van hierdie gemeente in Little Rock in Amerika, wat in die woorde van hulle dominee, Robert Lewis, 'n "suksesvolle groeiende gemeente" was. Wat oortuig was 'n gemeente groei deur aantreklike programme en bedieninge, wat die mense wat daarheen kom, tot voordeel kan strek. Maar God se Gees was besig om hulle uit te daag met die vraag: Watter verskil maak julle werklik in julle gemeenskap?

Daarom lei Hy Robert om 'n afspraak te maak met die burgemeester van Little Rock en hom te vra: Waarmee kan ons jou help? Waarop die burgemeester vir hom 'n lys gee met die uitdagings wat tans vir die groter Little Rock-area in die gesig staar.

Die gemeente het toe hulleself in die teenwoordigheid van God begin uitdaag met die vraag: Wat kan ons doen wat mense in verwondering laat sê: Nou weet ons God lewe, want net God self kan dit in mense se harte werk om sulke dinge te doen?

Hierdie vraag was die eerste tree in 'n proses van brûe-bou na die gemeenskap toe wat in hierdie gemeente tot stand gekom het. Hulle het "rekords" begin opstel vir "die organisasie" wie se "lede" die meeste bloed kom skenk het, en wat die meeste nuwe potensiële orgaanskenkers opgelewer het.

Hulle het een van meer as 100 ander gemeentes of "kerke" geword wat deel was van 'n span van 5000 vrywilligers wat parke en speelgronde begin verfraai en meer as 50 skole nuut gemeubileer het. Verder het hulle "life skill"- klasse begin aanbied in banke en hotelle vir meer as 5000 mense oor finansies, die huwelik, 'n gesonde lewe en oud-word.

In die laaste vier jaar het die gemeentes in hierdie omgewing meer as 6 miljoen rand geskenk aan gemeenskapsdiensorganisasies wat werklik effektief kinders in krisis bedien het. Hulle het versorgingshuise en -families vir hierdie kinders begin skep; skoolklere en -benodighede aangekoop, en Kersgeskenke vir honderde van hierdie kinders geskenk.

Nadat hulle vir een van die onderwyseresse se klaskamers nuwe rakke ingesit het, het die skoolhoof gesê: Ek dink dit is die wonderlikste dag in my hele onderwysloopbaan van 29 jaar! Dit is die eerste keer dat 'n gemeenskap- of 'n kerkprojek werklik ons so prakties kom bedien waar ons dit werklik nodig het.

So word Jesus Christus, Sy liefde en Sy lewe 'n werklikheid vir en in 'n gemeenskap. Die oomblik as ons oë hiervoor begin oopgaan het, is dit werklik net ons eie kreatiwiteit wat ons impak in die gemeenskap gaan vergroot of beperk.

Dit geld vir waar ons dinge begin saam doen as gelowiges, maar ook vir waar ek en jy as individue God begin vertrou om ons te gebruik as sout en lig daar waar Hy ons geplaas het.

Daarom wil ek jou uitdaag: Gaan doen dit wat jou hand vind om te doen. Met die gebed dat mense aan hulle bas sal beleef daar is werklik 'n God wat vir hulle omgee en hulle liefhet.

## DAG 7 WEES SOOS SUURDEEG

Ons is besig om te gesels oor die veranderinge wat God se Gees onder Sy mense aanbring in ons verstaan van “kerk-wees” prakties elke dag, en veral daar by die werk. Die tweede verandering is ...

### 2. Wees soos duurdeeg

In Mat. 13:33 lees ons die volgende: “Hy het hulle nog ‘n gelykenis vertel: ‘Die koninkryk van die hemel is soos suurdeeg wat ‘n vrou gevat en in ‘n groot skottel meel ingewerk het totdat dit heeltemal deursuur was.’”

God se Gees is besig om gemeentes te oortuig dat hulle “sukses” nie in die eerste plek gemeet kan word aan hoeveel mense hulle byeenkomste – veral Sondae – bywoon nie, maar eerder gemeet moet word aan die impak wat hulle op die gemeenskap daarbuite het. Of in Jesus se woorde in hierdie gelykenis, of hulle werklik suurdeeg is wat al die meel genoegsaam gaan laat rys.

In ons post-modernistiese wêreld word mense nie eintlik beïndruk deur die grootte van ‘n gemeente of hoe ge-commit die mense daar aan die waarheid is nie. Maar waar gemeentes dit regkry om op ‘n praktiese wyse die nood van groepe individue te bedien, vang dit die oog van al wat media is, sy dit die TV of die koerante.

As ons dus werklik aan ‘n gemeenskap die realiteit van Jesus Christus en Sy lewe en liefde wil demonstreer, sal ons God moet vertrou vir maniere wat hulle bedien waar hulle nood het. Sodat hulle nie anders kan nie as om die “suurdeeg”: te kan proe nie.

Toe Jesus een gedeelte kon kies wat Sy bediening raakgevat het in woorde (in Luk. 4:18 ev), het Hy die boekrol van Jesaja geneem en daar uit Jes. 61 begin lees. Kom ek haal vir jou aan: “Die Gees van die Here my God het oor my gekom; die Here het my gesalf om ‘n blye boodskap te bring aan die mense in nood, Hy het my gestuur om dié wat moedeloos is, op te beur, om vir die gevangenes vrylating aan te kondig, vryheid vir dié wat opgesluit is, om aan te kondig dat die tyd gekom het waarop die Here genade betoon, die dag waarop ons God sy vyande straf maar almal wat treur, vertroos, die dag waarop Hy vir dié in Sion wat treur, eer gee in plaas van smart, vreugde in plaas van droefheid, blydschap in plaas van hartseer. Hulle sal genoem word: Bome van Redding. Die Here het hulle geplant om sy roem te vermeerder. Hulle sal die eeue-oue puinhope opbou, plekke herbou wat lankal verlate lê, hulle sal verwoeste stede weer opbou, plekke wat geslagte lank verlate lê. Uitlanders sal in julle diens wees en julle kleinvee oppas, vreemdes sal in julle lande en julle wingerde werk. Julle sal genoem word: Priesters van die Here, Dienaars van ons God. Julle sal van die rykdom van die nasies geniet, die trotse eienaars word van hulle besittings.”

Dit is sulke bekende woorde dié, maar ek moet jou eerlik sê: elke keer as ek dit lees, begin iets hier in my bruis!

Maar die gevaar met so ‘n bekende gedeelte is altyd dat ons nie meer mooi lees wat daar staan nie. Ons dink dan ons weet presies wat daar staan!

Kom ek wys vir jou presies wat ek bedoel. Het jy byvoorbeeld gesien hoe Jesus die “goeie nuus verkondig” het?

Hy het die evangelie beide deur woord en praktiese liefdesdade so aan mense bedien dat dit lewe in elke area van hulle hele lewe en elke nood wat hulle gehad het, bedien het (ons praat deesdae van “holistiese bediening”). Dit is hoe Jesus “bediening” verstaan het.

Daarom dat Johannes daar in Joh. 1:14 Sy bediening so beskryf het: “Die Woord het mens geword en onder ons kom woon. Ons het sy heerlijkheid gesien, die heerlijkheid wat Hy as die enigste Seun van die Vader het, vol genade en waarheid.”

In my eie woorde: Die Woord van God het vleis en bloed onder ons geword. Soveel so dat ons iets van God se heerlijkheid of skoonheid met ons eie oë gesien het. Ja, ons het iets geproe van die feit dat Hy ‘n genadige God is en dat net Sy waarheid ‘n mens werklik vry kan maak.

Omdat Paulus iets hiervan verstaan het, sê hy daar in Gal. 2:10 dat hy in sy bediening aan mense hom met net soveel entoesiasme beywer het vir die armes”, as om die evangelie met woorde te kan verkondig aan mense (Rom. 1:15 tot 17).

G’n wonder Jakobus sê (in Jak. 2:14 tot 17) dat as ons geloof – en dus ons Christen-wees, bediening en kerk-wees - net woorde bly, is dit “dood”!

Luister wat daar presies staan: “Wat help dit, my broers, as iemand beweer dat hy glo, maar sy dade bevestig dit nie? Kan so ‘n geloof ‘n mens red? Sê nou daar is ‘n broer of ‘n suster wat nie klere het nie en dag vir dag honger ly, en sê nou een van julle sou vir hulle sê: ‘Mag dit met julle goed gaan; gaan trek julle warm aan en eet genoeg,’ maar julle gee nie vir hulle wat hulle nodig het om van te lewe nie, wat help dit dan? So gaan dit ook met die geloof: as dit nie tot dade oorgaan nie, is dit sonder meer dood.”

Effektiewe Christelike bediening raak dus altyd mense se hele lewe. En in die besonder daar waar hulle werklik nood het. Dit is immers hoe Jesus bediening aan ons gemoduleer het in die woorde van Hand. 10:36 tot 38: “Julle weet van Jesus van Nasaret, dat God Hom met die Heilige Gees gesalf en met krag toegerus het. Hy het rondgegaan, oral goeie werke gedoen en almal gesond gemaak wat in die mag van die duiwel was, want God was by Hom.”

Soos Hy gedoen het, moet ons ook nou mense om ons bedien. Daarom kan ons nie meer wag dat die wêreld daarbuite “kerk toe kom nie”. Daarom moet elkeen van ons wat “kerk is”, uitgaan na hulle toe, Maandag tot Vrydag, tussen 9 tot 5 ten minste, en daar Joh 3:16 gaan bedien deur ons liefde aan mense. En as dit nodig is, dit verduidelik deur ons woorde.

Dit was Tillie Burgin se missie toe sy Sending Arlington onder haar bure begin het. Al het die Jehowa Getuies haar onmiddellik beskuldig dat sy “hulle terrein” betree en terug na “haar kerk toe” moes gaan!.

Vandag is Sending Arlington ‘n huis-gemeente-beweging van bykans 250 huisgemeentes (met 4000 gelowiges daarin) wat elke week meer as 10 000 mense in daardie omgewing bedien met kos, meubels, mediese- en tande-versorgingsdienste, vervoer skool toe, kind-en ouer-versorging en berading.

Deurgaans vra hulle hulleself af: Wat sou Jesus graag vir ons gemeenskap wou doen?

Die gemeenskap van Arlington sal hierdie vraag vir jou maklik kan beantwoord, want hulle beleef elke week hoe Jesus self hulle bedien in Sy versorgende liefde daar waar hulle dit die nodigste het. En daarom kom honderde mense elke jaar in daardie woonbuurte tot bekering as gevolg van hierdie gemeenskapsdiens en getuienis van Christene.

Hulle kan jou vertel hoe hulle lewens verander is toe die “kerk” gekies het om “suurdeeg” te wees en om ‘n verskil te maak in hulle gemeenskap.

Net so kan die Suidwes-distrik van Houston vertel van hoe die “Power Centre” - wat daar deur die Windsor Village United Metodiste Kerk gebou is - sedert 1999 reeds vir meer as 500 konstruksie- en 300 ander werkers werk geskep het êrens in die omgewing. Verder bedien gelowiges meer as 9 000 families ‘n maand in daardie omgewing deur 100 verskillende bedieninge. Op die oomblik is hulle betrokke by ‘n gemeenskapsontwikkelingsprojek waar meer as 450 bekomstigbare enkel-familiewoonhuise gebou word vir mense in hulle gemeenskap.

In Jacksonville in 1988 het ‘n geloofgemeenskap besluit om betrokke te raak by die bediening van die hele mens. Vandag huisves een van hulle geboue 20 winsgewende besighede wat almal begin is deur nuwe bekeerlinge wat ‘n droom gehad het maar nie die nodige kapitaal nie. Verder het hulle ‘n span van 250 vrywilligers wat omsien na alles en nog wat in hulle stad, sy dit strate wat gevee moet word, of ‘n motor wat êrens gedien moet word.

Ek glo die vraag aan elke geloofgemeenskap, en ons elkeen persoonlik, is: Sal die ongelowige wêreld om ons ons mis as ons die dag nie meer daar is nie?



## DAG 8 KOM ONS LANSEER MEKAAR

Ef. 4:11 en 12 was nog altyd een van die sleutel-teksgedeeltes in die Skrif wat ons gehelp het om ons roeping teenoor mekaar binne die familie of gemeente van Jesus raak te vat.

Daar staan immers geskryf: “En dít is die "gawes" wat Hy "gegee het": apostels, profete, evangeliste, en herders en leraars. Sy doel daarmee was om die gelowiges toe te rus vir hulle diens en vir die opbou van die liggaam van Christus.”

Die fokus in die familie van Jesus moet dus nie in die eerste plek wees om mense die eredienste op 'n Sondag te laat bywoon nie. Maar eerder om hulle toe te rus om van Maandag tot Vrydag, ten minste, daar buite waar God hulle 'n verhoog gegee het, self in Jesus se Naam tot diens te kan wees.

Die meeste tradisionele gemeentes soek gedurig mense wat kan help in 5 of 6 plekke in die gemeente, naamlik: om katechese te kom gee; om te help met die kleuter- en kinderkerk; om 'n Bybelstudie of kleingroep te lei; om in die koor of musiekgroep te kom sing; om mense by eredienste by die deur vriendelik te ontmoet; of om te dien op die kerkraad of in die een of ander komitee.

G'n wonder die meeste gemeenteleraars kla oor die feit dat net sowat 20% van die gemeente aktief in die gemeente is nie!

Die rede hiervoor, glo ek, is bloot omdat die keuse-moontlikhede vir dienslewering eenvoudig te beperk is om al die energie en passies van gelowiges in die gemeente effektief te akkommodeer.

Robert Lewis, een van die mees opwindende predikers en leraars van die Fellowship Bible-gemeente, het opgemerk dat die meeste gelowiges in sy gemeente vir sowat 4 tot 5 jaar baie gelukkig is. Maar dan word hulle verveeld en begin wegbly, ten spyte van die feit dat hulle gek is oor sy uitstekende lering in die gemeente.

Dit was eers toe die gemeente doelbewus begin uitreik het na die gemeenskap en gelowiges gehelp het om gelanseer te word in hulle eie bediening, dat gelowiges weer effektief en opgewonde begin groei het in hulle geloofslewe.

Tim Keller van die Redeemer Presbiteriaanse Gemeente in New York vertel dieselfde. Dinge in hulle gemeente het begin verander die dag toe hulle elke gelowige begin sien het as iemand wat voltyds in God se diens is. En dat ons roeping teenoor mekaar moet wees om elkeen so effektief moontlik te lanseer in bediening.

Natuurlik het dit beteken dat elke moontlike geleentheid in die gemeente gebruik moes word om hierdie “teologie van bediening” so hard, duidelik en gereeld as moontlik by elke geleentheid te leer. Ja, dat bediening doodgewoon beteken om 'n behoefte te vind en dit te bedien in die Naam van Jesus sodat Sy koninkryk kan kom.

'n Klein groepie gelowiges het in 1980 in die Mariner's gemeente in Costa Mesa, Kalifornië, begin bymekaar kom vir 'n jaar. Gedurende hierdie tyd het hulle elke Skrifgedeelte in die Bybel ondersoek wat verwys het na die mense van God en hulle roeping teenoor die nood in die gemeenskap om hulle.

Hulle het vir hulleself twee vrae afgevoel: Wat kan ons doen? En ...Wat moet ons doen?

Dit was die begin van die sogenaamde “Lighthouse Ministries” van hierdie gemeente waardeur hierdie gemeente in 2001 bv meer as 3400 vrywillige werkers beskikbaar gestel het om meer as 95 000 ure van gemeenskapsdiens te lewer in die arm gemeenskap van Orange County. Daar was hulle betrokke by die onderrig van weeskinders, die ondersteuning van kinders van enkelopende ouers, die versorging van bejaardes, die aanbied van Engelse klasse, leierskapopleiding onder tieners, hulp met immigrasieprobleme en ander sosiale welsynshulp.

Alhoewel die klem gelê is op vrywillige diens, was dit bloot maniere om brûe te bou na die gemeenskap waardeur die hoop van Christus in die nood van mense ingedra kon word.

So verskuif Christelike gemeentes se fokus weg van hulleself na bediening daarbuite waar dit werklik nodig is.

Markus 10:45 sê immers: “Die Seun van die mens het ook nie gekom om gedien te word nie, maar om te dien en sy lewe te gee as losprys vir baie mense.”

Chuck Colson het die opmerking gemaak dat toe Kommunisme Rusland in 1917 oorgeneem het, het hulle nie die Christendom onwettig verklaar nie. Wat hulle wel gedoen het, was om dit vir die kerk onwettig te maak om enige “goeie werke” te doen. So het hulle hulle verhoed om hulle historiese rol te vervul om die hongeriges kos te gee, vreemdelinge te ontvang, die wese te huisves, kinders op te voed en siekes te versorg. En die gevolg 70 jaar hierna was dat die kerk totaal irrelevant in die gemeenskap geword het.

Mary Francis Boley was die direkteur van die vrouediens van die First Baptiste gemeente in Peachtree City, Georgia. Sy het elke vrouebybelstudie-groep begin uitdaag om te begin uitreik na vroue buite in die gemeenskap. Want het sy gesê, geestelike groei kan net in mense se lewens begin plaasvind as hulle leer om hulleself in die Naam en diens van Jesus weg te gee vir ander soos Hy ons geleer het daar in Mat. 25:31 tot 46.

Die Vineyard Gemeenskapskerk in Cincinnati het ook ontdek hoe maklik gelowiges in kleingroepe gemobiliseer kan word tot gemeenskapsdiens deur vir hulle Saterdag die geleentheid te bied om saam met hulle vriende mense in die stad te bedien met wat hulle noem “low touch high grace random acts of kindness”.

Sommige dae het jy hulle gekry waar hulle besig was om gratis koeldrank uit te deel of waar hulle besig was om motors verniet te was. Maar wat hulle ookal gedoen het, het hulle heelyd beklemtoon dat daar geen bybedoelings in hierdie liefdesdiens betrokke was nie. Hulle wou maar bloot die liefde van God aan mense deur hierdie nederige dienslewering illustreer.

Dave Workman, die senior leraar van die gemeente, vertel dat alhoewel dit nie in die eerste plek hulle bedoeling met hierdie liefdesbediening in die gemeenskap was nie, het hulle gevind dat dit gemiddeld tussen 12 en 20 sulke liefdesdade aan mense gekos het vir iemand om hulle lewe vir Christus te gee. En kon hulle dankbaar getuig hoe honderde mense reeds as gevolg hiervan tot bekering gekom het.

Daarom sê Steve Sjogren vir alle kerkplanters: Moenie probeer om ‘n nuwe gemeente te begin nie. Gaan eerder en dien die stad. Bedien hulle prakties met die liefde van Christus. En as jy fokus op mense wat niemand anders tot nou toe bedien het nie, sal jy verstom staan oor die skares mense wat graag deel wil wees van dit waarmee jy besig is.

Dit is seker wat God bedoel het toe Hy ons daar in Jes. 58:6 tot 12 die volgende geleer het:

“Is die vas wat Ek wil hê, nie dít nie: om dié wat onregverdig gevange gehou word, te bevry, om die juk wat op mense druk, af te haal, om verdruktes vry te maak, om elke juk te breek?

Is dit nie dat jy vir dié wat honger is, van jou brood gee nie, dat jy aan die armes en die dakloses 'n blyplek gee nie, dat wanneer jy iemand sonder klere sien, jy vir hom klere gee nie, dat jy jou medemens nie aan sy lot oorlaat nie? Dan sal die lig vir jou deurbreek soos die rooidag, jy sal gou herstel. Hy wat jou red, sal voor jou uit gaan, die mag van die Here sal agter jou aankom. Dan sal jy roep, en die Here sal antwoord, jy sal om hulp roep, en Hy sal sê: Hier is Ek! As jy sorg dat mense nie meer by jou verdruk word nie, nie meer gedreig en vals beskuldig word nie, as jy jou wy aan dié wat honger het, as jy voorsien in die behoeftes van dié wat in nood is, sal die lig vir jou skyn wanneer dit donker is, sal wat vir jou nag is, word soos die helder middag. Die Here sal jou altyddeur lei; selfs in dor streke sal Hy in jou behoeftes voorsien. Hy sal jou sterk maak. Jy sal wees soos 'n tuin met volop water, soos 'n fontein waarvan die water nie opdroog nie. Jou mense sal die ou puinhope herbou, die fundamente herstel wat al geslagte lank bestaan. Jy sal bekend staan as 'n volk wat sy afgebreekte mure herbou, wat sy strate herstel sodat daar weer mense kan woon.”

Daarom kan ons met niks minder as dit tevrede wees vir mekaar nie: Om God te vertrou vir daardie verhoog waar Hy jou met alles wat Hy jou gegee het, wil lanseer in bediening in Sy Naam, met Sy liefde en in die krag van Sy Gees.

## DAG 9 WAAR ON S KAN LEER OM HANDE TE VAT, GEBEUR SINERGIE!

Ek lees weer hierdie week met verbasing die ou bekende woorde wat God daar in Ef. 4:1 tot 7 vir ons laat opteken het, wat soos volg lui: Laat julle lewenswandel in ooreenstemming wees met die roeping wat julle van God ontvang het. Wees altyd beskeie, vriendelik en geduldig, en verdra mekaar in liefde. Lê julle daarop toe om die eenheid wat die Gees tussen julle gesmee het, te handhaaf deur in vrede met mekaar te lewe. Daar is net één liggaam en net één Gees, soos daar net één hoop is waartoe God julle geroep het. Daar is net één Here, één geloof, één doop, één God en Vader van almal: Hy wat oor almal is, deur almal werk en in almal woon. Aan elkeen van ons is 'n genadegawe gegee volgens die mate waarin Christus die gawes uitgedeel het.”

En dan vervolg vers 11 en 12: “En dit is die "gawes" wat Hy "gegee het": apostels, profete, evangeliste, en herders en leraars. Sy doel daarmee was om die gelowiges toe te rus vir hulle diens en vir die opbou van die liggaam van Christus.”

Om dan uiteindelik te eindig met dit wat daar in vers 15 en 16 staan: “Nee, ons sal in liefde by die waarheid bly en so in alle opsigte groei na Christus toe. Hy is immers die hoof, en uit Hom groei die hele liggaam. Die verskillende liggaamsdele pas by mekaar en vorm saam 'n eenheid. Elkeen van hulle vervul sy funksie, en so bou die liggaam homself op in liefde.”

Deel van dit wat God tans in Sy Liggaam doen is om ons manier van dink so oor Sy kerk en ons taak teenoor mekaar en veral daarbuite in die gemeenskap te verander, dat ons oor mensgemaakte mure en verdelings begin hande vat en bronne en fasiliteite begin deel om saam spesifieke nood en behoeftes te begin bedien. Jesus se Liggaam is immers een! Het dit nie nog tyd geword dat ons in eenheid begin opereer en bedien nie!

Daarom is dit opwindend om oral oor die wêreld te sien hoe dit besig is om te gebeur. Nuwe vennootskappe word oral gesluit en bedieninge wat voorheen apart gefunksioneer het, begin soos een funksioneer.

Presies soos daar in Prediker 4:9 tot 12 staan: “Twee vaar beter as een. Hulle inspanning kom tot iets. As die een val, kan die ander hom ophelp. Maar as een val wat alleen is, is daar niemand om hom op te help nie. As twee langs mekaar slaap, word hulle warm, maar hoe sal een wat alleen is, warm word? Een alleen kan oorweldig word, twee saam kan weerstand bied. 'n Driedubbele tou breek nie maklik nie.”

Hier in die Helderberg-kom sien ons dit gebeur rondom sokkombuise, nagskuilings, nood-behuisingskemas, en “safe houses” vir gemolesteerde vroue en kinders.

In plaas van met nuwe bedieninge te begin, kom nuwe vennootskappe tot stand met reeds bestaande bedieninge en sien ons die krag van sinergisme waar een plus een 10 of 100 kan word.

Die Bybel is stampvol voorbeelde waar God as't ware hande gevat het met die vreemdste van vreemde mense en instansies om dit wat Hy in Sy hart gehad het te laat gebeur. Dink maar aan Josef en die Egiptiese Farao; Nehemia en die Koning Artaxerxes; Ester en Koning Ahasveros.

In plaas dat elke gemeente sy eie voedselbank het, waarom kan daar nie hande gevat en vennootskappe gesluit word met al die ander bestaande voedselbanke in die gemeenskap nie?

Een van die wonderlike inisiatiewe wat hier in die Helderberg-kom die afgelope tyd plaasgevind het - in navolging van 'n soortgelyke projek in die Overberg by Hermanus - was om 'n volledige Geel Bladsye-gids te skep van alle diensorganisasies in die gemeenskap, kerklik sowel as nie-kerklik, sodat almal kan weet wie help reeds wie. Maar ook om so te begin om onnodige duplisering te begin uitskakel.

Kan jy dink hoeveel meer effektief kan die familie van God in 'n dorp of stad nie die liefde van Jesus aan hulle dorp of stad begin bedien, daar waar dit werklik nodig is, deur gebruik te maak van al die kanale wat jare lank al reeds bestaan nie!

Daar is immers sovele baie effektiewe diensorganisasies wat oral in die gemeenskap reeds vir soveel jare al besig is! Maar aan die anderkant het ons binne die Liggaam van Jesus presies dit wat hulle so nodig het, naamlik duisende vrywilligers, finansies en selfs fasiliteite. Die uitdaging is net om weë te vind om mekaar êrens in die middel te vind en effektiewe vennootskappe met mekaar te sluit wat die nood meer effektief kan bedien.

Rick Rusaw is die leraar van die Life Bridge Christelike gemeente in Longmont Colorado met 2900 lidmate. Toe hierdie gemeente besluit het om jare gelede hulle gemeenskap te begin bedien, het hulle verskeie bestaande diensorganisasies in die gemeenskap uitgenooi om gratis van kantoorspasie in hulle gebouekompleks te begin gebruik maak. Verder het hulle 'n besluit geneem om met geen nuwe bediening in die gemeenskap te begin as daar reeds 'n soortgelyke diens of bediening bestaan nie.

Toe 'n hoërskoolkolier verlede jaar selfmoord gepleeg het, het die skoolhoof na hierdie gemeente toe gekom en gevra of hulle 20 beraders kon stuur wat vir 3 volle dae per week net beskikbaar kon wees by die skool vir kinders wat wou gesels. Wat die gemeente met graagte gedoen het.

Maar behalwe dit, het gemeentedele begin help as beamptes en helpers met elke atletiekbyeenkoms van die skool. Maar nie net by die skool nie. So help die gelowiges uit die gemeente tans 29 verskillende diensorganisasies met vrywillige diens. 5 Motorwerktuigkundiges, byvoorbeeld, diens gereeld meer as 300 motors van enkelma's in die Longmont-area. En pas het die gemeente 5000 nuwe planne op die tafel gesit om hulle gemeenskap nuut te bedien.

Soos Rick dit stel: Vir jare het ek gedink ek kan die wêreld self verander. Nou wil ek maar net die rivier wat deur my gemeenskap vloei so verander dat dit, sover moontlik, die hele gemeenskap bedien. En dit doen ons deur Christen-wees te verander van 'n byvoeglike naamwoord na 'n werkwoord.

En hulle doen iets reg, want die afgelope jaar was aksies van hierdie gemeente 30 keer op die voorblad van hulle plaaslike koerant (waarvan die meeste artikels positief was!). Soos 2 Kor. 3:2 en 3 sê, was hulle betrokkenheid en commitment aan hulle gemeenskap 'n "...aanbevelingsbrief, geskryf op ons harte, vir almal om te lees en te verstaan. Dit is tog duidelik dat julle 'n brief van Christus is, deur ons diens geskrywe, nie met ink nie, maar met die Gees van die lewende God, nie op klip nie maar op die harte van mense."

Mag die Here ons leer hoe om as Sy mense mekaar en die gemeenskap so te bedien dat mense werklik elke dag herinner sal word daaraan dat daar 'n God is wat elkeen van hulle o, tog so liefhet!

## DAG 10 SEËN DIE GEMEENSKAP

Daar is 'n baie sterk saak uit te maak dat die Nuwe Testament ons leer dat daar eintlik net een kerk of familie gelowiges in 'n stad of dorp is wat in verskillende gemeentes of kleiner families oral oor daardie dorp of stad bymekaar kom vir praktiese redes.

In Fil. 2:2 sê Paulus vir al die gelowiges in die stad Filippi: “maak dan nou my blydschap volkome deur eensgesind te wees: een in liefde, een van hart, een in strewe.”

Daar waar God deur Sy Gees gelowiges oortuig dat Hy hulle daar in hulle dorp of stad strategies geïmplementeer het om hulle hele gemeenskap te bedien met Sy seën en genade, kan dit geestelike leiers van die verskillende kerke en denominasies aanspoor om te streef na Bybelse eenheid en sinergie.

Jack Dennison van CitiReach skryf (en ek vertaal vrylik in Afrikaans): “Alhoewel gesonde verhoudinge met mekaar die fondasie is van Bybelse eenheid, kan ons nie net daarmee tevrede wees nie. Baie keer is gelowiges tevrede om in dorpe en stede hulle eenheid in Christus te demonstreer met gesamentlike eredienste en gesamentlike gebedsbyeenkomste. En alhoewel dit noodsaaklike en wonderlike simbole is van ons eenheid in Jesus, bewerk dit niks substantief verder nie. Dit laat ons goed voel, en lyk goed op die koerant se voorblad, maar dit verander nie ons dorpe en stede werklik nie. Dit is noodsaaklik dat ons gesamentlik moet inkoop in 'n bepaalde Godgegewe droom vir ons spesifieke gemeenskap waarin ons elkeen bereid is om ons deel by te dra. Funksionele eenheid beteken dat ons, wat sekere dele van die droom betref, moet saam werk, maar impliseer ook dat elke geloofs familie tog kan optree met 'n “geheiligde” onafhanklikheid, waar ons nie mekaar se toestemming hoef te vra om die gemeenskap te bedien nie. Solank ons net in lyn bly met die visie van 'n gesonde, veranderde gemeenskap. Transformasie van ons gemeenskap vind daar plaas waar ons dit reg kry om die nood van die gemeenskap, met dit wat God ons gegee het, begin bedien, in die lig van God se opdragte en begeertes vir ons gemeenskap.”

In 1990 het die Christelike leiers in Fresno, Kalifornië, aangevuur deur die pyn van hulle stad, 'n span leiers gevorm uit verskillende sektore van die gemeenskap en saam begin bid vir hulle gemeenskap. Dit het uiteindelik daartoe gelei dat nie net die verskillende kerke begin saamwerk het nie, maar dat die kerke ook begin hande vat het met ander instansies wat ook die stad gedien het. Deur 'n aksie wat bekend gestaan het as “Een leier op 'n slag”, het hulle verhoudinge begin bou tussen leiers in die gemeenskap deur mentorskap, werkverwante opleiding, gemeenskapsontwikkeling, gemeenskapsorg, en nuwe vennootskappe tussen die geloofgemeenskappe, die polisie en ander regeringsliggame.

“Dit het gewerk omdat ons geleer het om mekaar prakties lief te hê, te vertrou en omdat ons mekaar toegelaat het om mekaar verantwoordelik te hou vir ons elkeen se aandeel in die hele proses” sê Paul Binyon van Fresno.

Almal van ons kan seker getuig van soortgelyke voorbeelde van waar dit tans in ons eie omgewing en oral oor die wêreld besig is om te gebeur. Waar Christene op die wyse begin saamwerk en hande vat omdat hulle ingekoop het in 'n gemeenskaplike Godgegewe visie of droom vir hulle dorp of stad.

Maar een van die mees merkwaardige vrugte van hierdie proses word verwoord deur dit wat ons lees in 'n brief wat die profeet Jeremia aan Joodse gelowiges gestuur het in Babilon oor hoe hulle in hierdie vreemde land moet lewe en optree. Luister net na wat hy sê hy God sê

vir hulle (Jer. 29:7): “Bevorder die belange van die stad waarheen Ek julle in ballingskap weggevoer het, bid tot My vir daardie stad, want sy belange is ook julle belange.”

Die NIV vertaal dit so: “Also, seek the peace and prosperity of the city to which I have carried you into exile. Pray to the LORD for it, because if it prospers, you too will prosper.”

Vir hoevele jare het gelowiges net heeltyd negatief dit wat in hulle dorpe of stede aangaan, veroordeel en gekritiseer. Maar die meeste van ons kan getuig hoe God ons manier van dink en ons harte in so ‘n mate verander het dat ons mettertyd iets begin begryp het van dit wat Jeremia hier vir God se mense gesê het. Dit, naamlik, dat Hy ons daar neergesit het om die hele gemeenskap tot seën te wees!

Miskien kan ons dit prakties begin doen deur ten minste diegene te begin seën wat hulleself elke dag vir die heil van die gemeenskap afsloof!

So het die geestelike leiers in die Colorado-gemeenskap begin om al die regeringsamptenare en invloedryke mense in hulle gemeenskap uit te nooi na ‘n ete een maal per maand. Dan het hulle bv die burgemeester, die redakteur van die plaaslike koerant, of die rektor van die universiteit, geleentheid gegee om ‘n paar woorde by die geleentheid te sê. Hierna het die geestelike leiers van die dorp of stad, daardie leiers hande op gelê en God gevra in gebed om hulle en al die ander mense in diens van die gemeenskap te seën (1 Tim. 2:1-4).

Enigeen kan ‘n dorp of stad kritiseer, maar die geestelike leiers van ‘n dorp of stad is in die ideale posisie om werklik hulle dorp of stad te seën in die Naam van Jesus Christus!

Elke jaar het die gemeentes in Little Rock verskillende feesgeleenthede waarin hulle die polisie, die brandweer, onderwysers en ander invloedryke persone in hulle gemeenskap seën in hulle eredienste. Adam Hamilton, die leraar van die United Metodiste Kerk, het byvoorbeeld vanjaar aan elkeen van die 5700 gelowiges in sy gemeente ‘n naam gegee van ‘n onderwyser, ‘n regeringsamptenaar of ‘n werknemer van die Stadsraad van Kansas City, om gereeld vir hulle te bid en af en toe vir hulle ‘n persoonlike briefie van aanmoediging te stuur.

Die reaksie was oorweldigend! En nou het die aksie so uitgebrei dat honderde volwasse gelowiges, byvoorbeeld, hulle aangemeld het om kinders in die stad te onderrig en te mentor.

Natuurlik is deel van die seën van ons stad of dorp om ook vir hulle te bid in die Naam van Jesus Christus. Daarom is dit wonderlik om van alle kante getuigenis te hoor van hoe plaaslike en nasionale gebedsinisiatiewe werklik in hoevele dorpe en stede gelowiges aangespoor het om intensief, korporatief en gedissiplineerd te begin intree vir elke sigment van hulle gemeenskap.

Hier plaaslik in Suid-Afrika, is die nasionale gebedsinisiatief van Jerigo Mure en Transformasie Afrika, kragtige instrumente in God se hand om werklik die mure tussen gelowiges onderling, maar ook die mure tussen die kerk en die gemeenskap, te begin afbreek.

Stadig maar seker word brûe gebou tussen gelowiges en die res van hulle gemeenskap. Brûe wat ons geleentheid bied om prakties ook die boodskap van versoening aan hulle te kan bedien.

So word dit wat daar in 2 Kor. 5:19 en 20 prakties waar: “Die boodskap van versoening bestaan daarin dat God deur Christus die wêreld met Homself versoen het en die mense hulle oortredinge nie toereken nie. Die boodskap van versoening het Hy aan ons toevertrou.

Ons tree dus op as gesante van Christus, en dit is God wat deur ons 'n beroep op julle doen.  
Ons smeeek julle namens Christus: Aanvaar die versoening met God wat Hy bewerk het!”



## DAG 11 GEROEP NA 'N HELE DORP OF STAD

Iets wat in vele geestelike leiers se harte plaasgevind het die afgelope tyd, is dat die Gees van God ons oortuig het dat ons nie net deur God na 'n spesifieke groep gelowiges of gemeente geroep is nie, maar ten minste geroep is na die hele dorp of stad waar daardie gemeente of groep gelowiges geleë is.

Iets van Jesus se hart het dus in ons begin resoneer. Soos toe Hy daar by Jerusalem kom, vertel Luk. 19:41 ons : "... en die stad voor Hom sien, het Hy daarvoor gehuil".

Die meeste geestelike leiers, wat êrens deur 'n spesifieke gemeente beroep is of êrens tans een van die leiers is, beskou daardie groep gelowiges eksklusief as "hulle kudde". Daarom het hulle vir jare al hulle energie en tyd daar gefokus om hierdie groep gelowiges te bedien in die Naam van Jesus Christus.

Maar dit is ook moontlik om dit anders te begin sien: Naamlik dat God ons in die eerste plek na die hele dorp, stad of area geroep het, waar daardie gemeente of groep gelowiges net 'n klein deeltjie van is.

Dan verander alles. Dit is dan wat jy ontdek dat God jou nie net die opdrag en die outoriteit gegee het om daardie klein groep gelowiges te bedien nie, maar om almal in daardie area, dorp of stad tot diens te wees! Ja, selfs ook die ongelowiges!

Ook jou bediening onder die groep gelowiges waar jy spesifiek 'n opdrag het, verander dan. Dan word jou taak ten minste om daardie groep gelowiges toe te rus en te lanseer in bediening in die hele gemeenskap en op die markplein (Ef. 4:11-16)!

As dit gebeur, gebeur daar iets in jou kop en in jou hart! Kom ek wees prakties: Toe ek dit verstaan het oor my rol hier in die Helderberg-kom, het ek skielik besef dat God my geroep het na "'n gemeente" van meer as 150 000 mense wat tans in die Helderberg-Kom woon! En dan praat ons nog net van hierdie area! Wat nog daarvan as God my in die hele Suid-Afrika en selfs internasionaal wil gebruik!

Dink net wat kan gebeur as geestelike leiers iets hiervan begin begryp! Ek dink dit gaan ten minste beteken dat ons nie meer mekaar as vyande sal beskou "wat mekaar se skape wil steel" nie! Want ons sal begryp dat ons saam lede van 'n groot leierspan in 'n bepaalde dorp, stad of area is, waar God ons geplaas het. Om Sy mense en daardie gemeenskap te bedien met dit wat Hy aan ons spesifiek gegee het; om so 'n medewerker te wees van Sy Koninkryk wat ook hier begin realiseer.

Omdat ek dinge in prentjies sien, sien ek hoe 'n geestelike leier van 'n gemeente van, sê, 150, skielik besef dat God hom, met sy gawes, spesifiek geroep het na 'n dorp van 40 000 of meer rondom hom! Skielik hoef sy kantoor nie meer weggesteek te wees in 'n kerkgebou êrens nie, maar kan dit verskuif na 'n plaaslike restaurant waar dit vir hom moontlik is om tyd te spandeer met plaaslike besigheidsmense. Sy gereedskap word bv sy selfoon en sy "laptop", om met invloedryke mense in daardie gemeenskap te begin netwerk en om hulle weer met mekaar te netwerk om die nood en behoeftes van daardie gemeenskap te bedien.

So gebeur iets van dit wat daar in Jes. 61:1 tot 6 staan, rondom hom:

- Waar ons, soos die NIV vertaal, besef " the LORD has anointed me to preach good news to the poor. He has sent me to bind up the broken-hearted, to proclaim freedom for the captives and release from darkness for the prisoners, to proclaim the year of

the LORD's favour and the day of vengeance of our God, to comfort all who mourn, and provide for those who grieve in Zion—to bestow on them a crown of beauty instead of ashes, the oil of gladness instead of mourning, and a garment of praise instead of a spirit of despair.”

- En waar ons dan deel word van die span geestelike leiers wat God oral in die gemeenskap geposisioneer het wat in daardie hele gemeenskap “... die eeue-oue puinhope opbou, plekke herbou wat lankal verlate lê, ... verwoeste stede weer opbou, plekke wat geslagte lank verlate lê.”
- Maar verder begin ons beleef hoe iets van die seën, wat God in vers 5 tot 7 belowe het, ook rondom ons begin realiseer: “Uitlanders sal in julle diens wees en julle kleinvee oppas, vreemdes sal in julle lande en julle wingerde werk. Julle sal genoem word: Priesters van die Here, Dienaars van ons God. Julle sal van die rykdom van die nasies geniet, die trotse eienaars word van hulle besittings. In plaas van vernedering sal julle twee keer soveel besittings hê as tevore, in plaas van minagting sal julle lof ontvang oor wat julle besit. Julle sal in julle land twee keer soveel besit as tevore en julle sal altyd vreugde hê.”
- Ook dit wat in vers 9 belowe word, sal begin waar word: “Almal wat na my volk kyk, sal beseef dat hulle ‘n volk is wat deur die Here geseën is.”

Toe hierdie dinge in my eie lewe gebeur het, moes ek net weer vir myself uitmaak wat God se presiese taakomsyrywing vir my in Sy Koninkryk en onder Sy mense is. En ek moes weer eerlik die vraag beantwoord in my eie lewe oor wie dien ek werklik en wie se opdragte voer ek uit? God s'n of 'n spesifieke “kerkgroep” s'n? Is ek werklik besig om God se koninkryk bo alles te soek?

Vir soveel jare het ons maar net gedoen wat mense en denominasies van ons verwag het om te doen. En die gevolg daarvan is dat honderde leiers êrens langs die pad uitgebrand, ontugter en verwond lê omdat hierdie verwagtings van mense en sisteme net menslik onmoontlik geword het om te vervul.

Bid saam met my dat God se Gees werklik opnuut al Sy gekose leiers in gemeentes en op die markplein sal oortuig wat die Vader se hart vir hulle spesifiek is daar waar Hy hulle geposisioneer het! Sodat Hy hulle kan gebruik in Sy besigheid hier op aarde, in Sy Koninkryk Onbeperk.

## DAG 12 GOD “BEROEP” ONS OP INTERESSANTE MANIERE!

Twee stukkies informasie het Nehemia se hele lewe verander: Die dag toe hy (daar in Neh 1) gehoor het dat die mure van sy geliefde stad, Jerusalem, in flarde lê en hoe sleg dit met die inwoners daar gaan.

Nehemia het werklik beleef hoe God hom met hierdie inligting “beroep” het Jerusalem toe! En die oomblik toe hy “ja” sê vir God, was dit soos wanneer ‘n klippe in die water gegooi word! Die rimpels daarvan sou uiteindelik uitloop op die totale transformasie van die hele gemeenskap daar in Jerusalem.

Dit is van kardinale belang dat elkeen van ons sensitief en oop daarvoor moet wees vir hoe God soms bepaalde stukke informasie kan gebruik as ‘n soort katalisator wat ‘n hele proses in ons lewens aan die gang kan sit.

Dit was die manier hoe God Nehemia aan die bid gekry het. Maar ook hoe Hy ‘n klomp idees en planne by hom laat opkom het oor hoe die mure herstel en hoe die gemeenskap restoureer kon word.

Baie keer gebruik God akkurate informasie om ‘n passie hier binne in ons aan die brand te steek. Sy dit ‘n passie vir ons gemeenskap en/of vir ons rol in die besigheidswêreld.

Soms is dit korrekte informasie oor die presiese omvang van die nood, maar ook oor watter hulpbronne beskikbaar is wat ons kan gebruik om die nood aan te spreek. Dit is byvoorbeeld wat hier by ons in die Helderberg-kom gebeur het, toe die Universiteit van Stellenbosch die eerste van ‘n paar volledige gemeenskapsondersoeke hier gedoen het. Hierdie verslag het vir ons die presiese informasie oor die demografie van ons hele gemeenskap gegee. Maar ook ander belangrike inligting soos byvoorbeeld oor hoeveel kerke in hierdie omgewing is; hoeveel sjebeens hier is; waar die meeste misdade in die omgewing plaasvind, ens.

Dit is belangrik om die aard van die nood van die gemeenskap presies te begin omskryf, want wat jy nie weet en erken nie, kan jy nie aanspreek en bedien nie.

Dit is ook net so belangrik om te weet hoe die geestelike hulpbronne in die gemeenskap daarna omsien. God is mos merkwaardig. Wanneer Hy mense vir ‘n spesifieke saak “beroep”, het Hy mos lankal die verhoog daarvoor voorberei met alles wat nodig is.

Elke keer gryp dit my aan as ek in die Skrif en in die praktyk ontdek hoe getrou God is! Hoe Hy in my eie lewe en soveel ander van ons se lewens lankal reeds die regte opleiding en ervaringe, die regte mense en die regte bronne wat langs die pad nodig gaan wees, presies op die regte tyd en die regte plek “laat kliek” wanneer dit Sy hart en plan is vir iets om te gebeur.

So was dit hier in die Helderberg-kom belangrik om te ontdek dat hier 226 verskillende geloofsgemeenskappe is (elkeen met sy besondere geestelike leiers, gemeentede en ander hulpbronne), en dat 89% van ons gemeenskap, volgens die laaste nasionale sensus, hulleself as deel van die Christelike kerk aangedui het.

Wat vir my verder merkwaardig is, is om te beleef dat soos wat Christene hier in die Kom begin doen het wat God hulle aangesê het om te doen, hulle telkens langs die pad mense raakgeloop het wat getuig het: God het ons na hierdie omgewing geroep om nou hier te wees vir dit wat Hy hier wil laat gebeur!

In 1994 het 'n 21-jarige leraar, Matthew Barnett, die "Dream Center" in Los Angeles begin deur in sy gemeenskap rond te stap opsoek na nood wat deur niemand bedien word nie. En hy het duisende uitgeworpe mense ontdek wat letterlik in die buitewyke van die gemeenskap probeer oorleef het. Vandag is die "Dream Center" letterlik 'n "gemeente wat nooit slaap nie"! Wat 2100 wooneenhede in 50 blokke in die stad "aangeneem" het en begin bedien het met 200 vrywilligers.

So huisves die Franciscaanse Hospitaal-kampus (onder hierdie gemeente se bestuur en sorg) tans 400 persone wat besig is met rehabilitasie en dissipelskap-programme, terwyl hulle nog sowat 25 000 mense per week ook daar kos gee. Verder het hulle 'n gratis 24-uur-mediese kliniek, 'n mobiele mediese eenheid en dosyne effektiewe bedieninge wat heeldyd op die uitkyk is vir nood en hoe om dit te bedien.

Vele ander gemeentes rondom hulle het begin om hulle voorbeeld na te volg deur spesifieke woonbuurtes met nood te identifiseer en "aan te neem" deur werklik voor God daarvoor volle verantwoordelikheid te aanvaar.

In die dorp, Boulder, in Colorado, het die geestelike leiers in die dorp besef hulle weet nie regtig watter ander instansies is reeds besig om die nood in hulle gemeenskap te bedien nie. Daarom het hulle 'n bustoer georganiseer om al die leiers van hierdie instansies te ontmoet, om te hoor wat hulle reeds doen en waarmee die gemeentes kan help. So het hulle die bestaande nagskuiling die dag besoek, asook die voedselbank, 'n dagsorg-eenheid, 'n gesondheidskliniek, 'n tehuis vir straatkinders en 'n Vigs-projek. Hierdie dag was dan ook die afskop van 'n hele aksie waardeur daar doelbewus gestreef word na wyses om brûe te bou tussen die geloofgemeenskappe en die res van die gemeenskappe wat weer 'n nuwe soort openheid, genesing en nuwe vriendskappe geïnisieer het.

Wat verder aangrypend was was om te sien hoe God geestelike leiers se harte aangespreek het en spesifieke nood op hulle hart gedruk het as "hulle verantwoordelikheid" en bedieningsarea.

Jy het dit ook al seker beleef! Hoe God jou net bewus maak van 'n spesifieke groep mense of 'n bepaalde nood wat êrens heers en dat dit die plek is waar Hy jou wil gebruik.

Baie keer is dit selfs 'n spesifieke area of nood waar jy nooit kon dink jy ooit by betrokke sou raak nie. Maar as jy gewillig is en God se stem begin gehoorsaam, ontdek jy dat God jou eintlik al die jare vooraf, deur al die dinge wat met jou gebeur het en wat jy langs die pad geleer het, presies hiervoor voorberei het. Ja, dat dit juis die bediening is wat jou hele lewe verder gaan verander!

## DAG 13 ONS GELOOF MOET OORGAAN IN DADE

Kom ek haal Jakobus 1:22-24, en vers 27 hier aan: "Julle moet doen wat die woord sê en dit nie net aanhoor nie, anders bedrieg julle julleself. Iemand wat altyd net die woord aanhoor en nooit doen wat dit sê nie, is soos een wat na sy gesig in 'n spieël kyk: hy bekyk homself, gaan van die spieël af weg en vergeet dadelik hoe hy gelyk het.... As iemand dink hy is godsdienstig, maar hy hou nie sy tong in toom nie, bedrieg hy homself. Sy godsdiens is waardeloos. ... Egte en suiwer godsdiens voor God die Vader is om weeskinders en weduwees in hulle moeilike omstandighede by te staan en om jou skoon te hou van die besmetting van die wêreld."

Jak 2: 14-17 omskryf dit verder as daar staan: "Wat help dit, my broers, as iemand beweer dat hy glo, maar sy daade bevestig dit nie? Kan so 'n geloof 'n mens red? Sê nou daar is 'n broer of 'n suster wat nie klere het nie en dag vir dag honger ly, en sê nou een van julle sou vir hulle sê: "Mag dit met julle goed gaan; gaan trek julle warm aan en eet genoeg," maar julle gee nie vir hulle wat hulle nodig het om van te lewe nie, wat help dit dan? So gaan dit ook met die geloof: as dit nie tot daade oorgaan nie, is dit sonder meer dood."

Die meeste Christene en Christengemeentes het nog altyd iets gesnap van dat elke deeltjie van menswees vir God belangrik is en deur Hom bedien wil word. Daarom het min van hulle ooit ontken dat om mense effektief te bedien met die evangelie ook ten minste beteken dat ons by mense se ware nood moet uitkom, ook hulle sosiale nood.

Kyk 'n mens byvoorbeeld hier in Suid-Afrika, is dit gou duidelik dat die verskillende geloofsgemeenskappe in hierdie land – in 'n minder of meerdere mate- juis die instansies was wat in baie gevalle ingegryp het om baie prakties die werklike sosiale nood in die gemeenskap aan te spreek.

Maar ons weet van ook van vele noodsituasies waar dit, tragies, nie gebeur het nie. Daarom bly dit vir ons van kardinale belang om telkens stil te raak voor God en Hom toe te laat om vir ons aan te toon wat presies Sy hart vir nou vir ons is.

Kyk 'n mens na 'n gedeelte soos Jes. 65:17 tot 25 kan jy ten minste 8 karaktereienskappe onderskei van hoe 'n gesonde gemeenskap, volgens God, sou lyk:

- Publieke byeenkomste wat gekenmerk word deur lewensvreugde (vers 18 en 19)
- Gesondheid vir kinders en bejaardes (vers 20)
- Woonplek vir almal (vers 21)
- Voedsel vir almal (vers 21, 22)
- Werk vir almal (vers 21, 22 en 23)
- Effektiewe gesins-ondersteuningsisteme (vers 23)
- Die gemeenskap sal die teenwoordigheid en ingrype van die lewende God as 'n daaglikse werklikheid belewe (23b, 24)
- En die afwesigheid van geweld (vers 25)

Lyk vir my dit kan werklik dien as die strategiese raamwerk en doelwitte vir effektiewe gemeenskapstransformasie.

God se Gees is oral aan die werk. Hy is besig om vir ons baie prakties te wys wat dit beteken om werklik sout, lig en suurdeeg in ons gemeenskappe te wees. Ook daar op die markplein, waar dit saak maak.

Die vraag is in watter mate is ek en jy bereid om, saam met die gelowiges rondom ons, self stil te word voor God en Sy spesifieke hart vir ons te hoor?

Daarom is die volgende aanhaling uit 'n verslag wat George Barna in April 2005 gepubliseer het so aktueel vir elkeen van ons. Luister hoe daag hy geestelike leiers uit oor die roeping wat ons het ten opsigte van ware effektiewe gemeenskapstransformasie:

Hy sê: "You cannot make good strategic decisions without reliable information about the people or situations you hope to change ... Bringing about genuine and lasting religious transformation, requires leadership that is more aggressive than simply constructing bigger buildings, replacing the overhead projector with a big-screen projection system, and introducing a few new programs. Our era is noted for distractions, stress, technology, choice, busyness, information overload and mistrust. Effective leaders must spearhead a thoroughly conceived and highly targeted plan that runs a significant level of risk and promises attractive returns on people's investment of themselves. Merely tinkering with the existing system is a recipe for irrelevance and abandonment."

Hoeveel keer soek die kerk of gemeentes bloot êrens in die wêreld na wat vir hulle lyk na 'n suksesvolle model om na te volg? Die afgelope paar jaar in Suid-Afrika kry jy oral gemeentes wat eers die selgemeente-model van Paul Yongi Cho gevolg het; toe die een van Ralph Neighbour; toe verskuif ons na die modelle van Saddleback-gemeente en die Willow Creek-model?

Die meeste van die tyd loop ons ons telkens vas teen bepaalde frustrasies en mure binne so 'n model. En dit is eintlik voorspelbaar dat dit so sal wees. Dit is waarom 'n soeke na modelle skynbaar na 'n kortpad lyk maar eintlik teenproduktief is en, uiteindelik, ons eerder weglei van 'n wandel in radikale gehoorsaamheid aan God se stem alleenlik.

Die Bybel wil nie vir ons modelle gee nie. Dit is eerder die verhaal oor mense wat gewaag het om na 'n ontmoeting met die lewende God in radikale gehoorsaamheid self te gaan luister wat God sê, en dan te gaan doen wat Hy vir hulle beveel het.

Dit is waarom dit vir ons so belangrik is om weer opnuut voor God se voete te gaan stil word en ten minste twee dinge vir onself uit te maak:

- Wat is algemeen-geldende Bybelse beginsels vir ekklesia-wees? (vir Bybelse "kerk"-wees, as jy dit so wil sê)
- En wat is God se spesifieke roeping vir ons geloofsgemeenskap hier en elders waar Hy ons spesifiek geposisioneer het?

In plaas daarvan dat elke geloofsgemeenskap net heeltyd probeer om sy groepie ingeskakelde gelowiges na die beste van hulle vermoë te bedien, moet elke geloofsgemeenskap weer hulle staanplek gaan vind as deel van 'n groter span wat God wil gebruik om Sy koninkryk ook daar rondom hulle te laat kom.

Daarom gaan daar al hoe meer stemme oral in die Liggaam van Jesus op wat vir ons uitdaag om die regte vrae te begin vra. Vra jy verkeerde vrae, kry jy verkeerde antwoorde wat jou eintlik meer verlei as help. Wat help dit nou eintlik om die verkeerde probleme op te los, sonder om by die regte uitdagings en opdragte uit te kom? Dan mors ons net energie en bluf ons onself deur te dink ons doen iets betekenisvol.

Ek wil afsluit met wat Reggie Mcneal in sy boek "The Present Future" skryf oor die ses verkeerde vrae wat gemeentes vra, en die ses korrekte vrae wat hy dan voorstel ons eerder moet vra in hulle plek.

Hier is die ses verkeerde vrae wat ons gewoonlik vra (wat ek dan merk as X), en 'n voorstel daar naas oor wat 'n beter vraag sou wees (wat ek dan merk met √):

X Hoe kan ons beter "kerk" wees?

√ Hoe kan onself beter definieer deur missionêre geloofsgemeenskap te wees wat 'n verskil in ons omgewing maak eerder as bloot net 'n Christelike klub te probeer wees?

X Hoe kan ons ons kerk/gemeente laat groei? Hoe kan ons die mense aanmoedig om na ons toe te kom?

√ Hoe kan ons werklik ons gemeenskap verander? Hoe kan ons die strate tref met die evangelie?

X Hoe verander ons lidmate in bedienaars?

√ Hoe lanseer ons lidmate in 'n bediening in die gemeenskap? (maak ons hulle almal "sendelinge")

X Hoe kan ons lidmate laat groei?

√ Hoe ontwikkel ons volgelinge van Jesus?

X Hoe beplan ons vir die toekoms?

√ Hoe maak ons gereed vir die toekoms?

X Hoe ontwikkel ons leiers vir kerklike werk?

√ Hoe ontwikkel ons leiers wat sensitief is vir dit waarmee God nou besig is?

## DAG 14 EREDIENS VAN 9 TOT 5, VAN MAANDAG TOT VRYDAG

Kan ek vir jou 'n paar Skrifgedeeltes aanhaal oor ons opdrag as Christene elke dag daar by die werk?

1 Kor. 10:31 – “Of julle eet en of julle drink of wat julle ook al doen, doen alles tot eer van God.”

Ef. 6:5-9 – “Slawe (lees elke keer “werknemers”), wees gehoorsaam aan julle eienaars (lees elke keer “werkgewers”) hier op aarde, en doen dit met eerbied en ontsag maar terselfdertyd met 'n opregte hart, asof dit vir Christus is. Moenie net werk om deur julle eienaars raakgesien te word en so in mense se guns te kom nie; werk soos slawe van Christus wat van harte die wil van God doen. Al is julle slawe, doen julle werk met lus, soos vir die Here en nie vir mense nie. Julle weet tog dat die Here elkeen sal beloon as hy iets goeds gedoen het, of hy nou slaaf is of vry. En eienaars, behandel julle slawe met dieselfde gesindheid. Hou op om hulle te dreig. Dink daaraan dat die Here in die hemel hulle Here en ook julle Here is, en Hy trek niemand voor nie. Slawe, wees in alles gehoorsaam aan julle eienaars hier op aarde. Moenie net werk om deur hulle raakgesien te word en so in mense se guns te kom nie, maar werk met 'n opregte hart uit eerbied vir die Here.”

Kol. 3:23– 4:1: “Wat julle ook al doen, doen dit van harte soos vir die Here en nie vir mense nie, omdat julle weet dat julle van die Here as beloning sal kry wat Hy belowe het. Christus is die Here in wie se diens julle staan. Wie onreg doen, sal gestraf word oor die onreg wat hy gedoen het; die Here trek niemand voor nie. Eienaars, behandel julle slawe reg en billik in die wete dat julle ook onder iemand staan, onder die Here in die hemel.”

Die Christen in die Vroeg-Christelike kerk, tot diep vroeg in die 4de eeu, het iets verstaan daarvan dat Christen-wees 'n totale lewenswyse 24 uur 7 dae 'n week was, wat elke deel van 'n mens se lewe ingesluit het.

Ons het almal net 168 ure in elke week. Nadat ons geëet en geslaap het, los dit ons met 100 ure wat oorbly. Hiervan spandeer ons so 70 ure by die werk, wat ons dan los met so 30 ure om tussen ons lewensmaats, kinders en ontspanning te verdeel.

Daarom was dit vir Paulus die normaalste ding op aarde om vir volgelinge van Jesus te skryf dat hulle gelowige-volgelyngskap as Christene ook daar in op die markplein moet gebeur.

Soos ek reeds 'n paar keer gesê het is God besig om vir Sy mense in hierdie dae bewus te maak dat Hy hulle voltyds geroep het om Sy getuie en bedienaar te wees elke uur in 'n week. Dit is dus nie net dominees en pastore wat “voltyds geroep en in voltydse bediening” is nie. Ons staan dus elkeen voor die uitdaging om voor God uit te maak hoe ons erns kan maak met ons roeping en bediening van 9 tot 5 gedurende die week by die werk, skool, plaas, of waar ek ook al besig is om die grootste deel van my week deur te bring op die markplein.

Daarom was dit wonderlik vir my om te ontdek dat die Hebreeuse woord vir “werk” en “erediens” albei van dieselfde Hebreeuse woord “avodah” afkomstig is.

'n Mens kan tereg sê: Maandag tot Vrydag, van 9 tot 5 elke dag, is my en jou “langste erediens” daar by die werk! Waar dit nou ook al is. Sy dit op die konstruksieterrein, of in die hospitaal, of in die spreekkamer, of voor die kospotte is.



Iemand anders noem ons bediening daar op die markplein ons “heilige roeping in die 9 tot 5 venster!” Ons kan dit selfs ons “sendingveld op die markplein” noem! Nie omdat almal daar ongelowiges is nie, maar omdat dit ten minste, na ons “sendingveld tuis in ons gesinne”, die volgende plek is waarheen ons almal “ge-send is” om ons gelowige volgelingskap as Christene daar te gaan uitleef.

Daar by die werk of skool is “die gemeente” waarheen God ons “beroep het”, waar ons ‘n taak en roeping het teenoor elke ander gelowige, maar ook teenoor elke ongelowige.

Dit geld vir elke Ma of tuisteskepper by die huis, elke loodgieter, sekretaresse of besturende direkteur van ‘n besigheid. Daar “by jou werk” is jy geroep om die beginsels van die Bybel uit te leef. Maar is jy ook geroep om God se instrument te wees wat Hy kan gebruik om, onder die leiding en deur die werking van die Heilige Gees, instrument te wees, om ‘n agent vir Bybelse verandering daar te wees, maar ook getuie oor die Evangelie van lewe in oorvloed in Jesus.

Natuurlik gaan dit nie in elke besigheids- of werksituasie op dieselfde wyse en ewe vrylik kan geskied nie. Baie keer sal dit met weerstand gepaard gaan. Daarom moet ons werklik vir God groot sensitiwiteit en wysheid vra vir presies wat Sy strategie vir ons situasie is. Maar een ding is seker: Die siening dat ons geloof beperk moet bly tot Sondae en nie ‘n plek het by die werk nie, is uit die hel en God is besig om dit te bedien met Sy waarheid wat ons werklik ook daarvan vry kan maak!

Dit maak my opgewonde om gelowiges oral te ontmoet wat werklik iets hiervan begin verstaan het. Dat om elke dag te kan werk, ongeag watter werk ons doen, deel is van ons lewe en werk tot eer van God. Dit is deel van ons roeping, in terme van 1 Kor. 10:31, waar ons, “of ons eet of drink”, alles wil doen as deel van ons “erediens” tot eer van die God wat ons liefhet en ons lewe verander het.

Natuurlik is dit ‘n uitdaging om dit effektief en wys te kan doen. Maar prys die Here vir Sy Gees wat in elkeen van ons kom woon het; wat elkeen van ons bonatuurlik wil en kan toerus juis ook hiervoor.

## DAG 15 MAAK ONS TOT 'N SEËN OP DIE MARKPLEIN, HERE!

Ons moet besef: God se hart is dat 'n hele wêreld gered sal word (1 Tim. 2:5). Wat dus ook die hele gemeenskap waar jy en ek woon en werk insluit.

Kom ons wees 'n bietjie prakties. Dink net: Waar spandeer die meeste van ons die grootste deel van ons tyd tussen ander mense waar – in die meeste dele van die wêreld – die grootste getal ander mense ongelowiges is?

Beslis nie by die gelowige byeenkomste nie! Eerder by die werk, of daar by die skool of opleidingsentrum.

Ek weet nie of jy een van diegene is wat alles tel nie! Nou ja, kom ek vertel jou waar Jesus die grootste gedeelte van Sy tyd spandeer het destyds Sy drie-jaar-openbare bediening. Die Nuwe Testament getuig dat van die 132 openbare optredes van Jesus, 112 in die markplek plaasgevind het. Van die 52 gelykenisse wat Hy vertel het, het 45 verwys na die markplek. Kyk 'n mens mooi, sien jy dat Jesus die grootste deel van lewe as volwassene gespandeer het as 'n gewone skrynwerker (of bouer in die destydse wêreld) voordat Hy met Sy lerende bediening op die markplein begin het.

Nog 'n paar belangrike syfers: In die boek, Handeling, het van die 40 wonderwerke wat daar vertel word, 39 op die markplein plaasgevind; daar waar die mense en die res van die gemeenskap was.

So lees ons bv. oor Paulus se daaglikse bediening op die markplein in Handeling 17:17 en 18 die volgende: "Hy het in die sinagoge met die Jode en die godvresendes geredeneer en elke dag op die stadsplein met die verbygangers gepraat. 'n Paar wysgere, Epikureërs en Stoïsyne, het met hom gestry. Party het gesê: 'Wat sou hierdie praatjiesmaker tog wil sê?' Ander het gesê: "Dit lyk of hy 'n boodskapper van vreemde gode is.' Dit was omdat Paulus die evangelie van Jesus en sy opstanding verkondig het."

Reeds in die Ou Testament het gelowiges iets verstaan daarvan dat ons hele lewe, en veral dit wat ons daar in die midde van die gemeenskap op die markplein doen, ontsettend belangrik in God se oë is. Daarom bid hy daar in Ps. 90:17 (en ek haal uit die NIV aan):

"May the favor of the Lord our God rest upon us; establish the work of our hands for us--yes, establish the work of our hands."

Mag God ons bonatuurlik toerus en seën in Sy genade, deur die werking van Sy Gees, dat ons werklik daar op die markplein, waar God vir ons 'n verhoog gegee het, werklik vir diegene wat ons pad daar kruis, tot seën kan wees.

Mag ons ons ook daar 'n "tuinslang" wees waardeur strome water wat lewe gee, na mense daar kan vloei. Om so God se medewerker te wees wat iets van die koninkryk van die hemele ook daar laat deurbreek. Soos wat die dag breek na 'n lang, donker nag!

## DAG 16 WAAG OM OOK OP DIE MARKPLEIN OP ROTS TE BOU

Soveel Christen-sakemanne en –vroue, wat erns wil maak met hulle Christenwees op die markplein en in hulle persoonlike finansies, ontdek êrens langs hulle geestelike pad met die Here, dat die Bybel 'n ongelooflike ryk bron is van uitstekende werkbare besigheidsbeginsels.

Gaan loer maar net 'n slaggie, byvoorbeeld, in op die webblaaie van die grootste Christelike finansiële bediening, CROWN MINISTRIES ([www.crown.org](http://www.crown.org)), om verstom te staan oor die magdom bruikbare materiaal wat jy daar kan kry.

In my eie lewe het God my vertaling van een van die boeke van Larry Burkett (een van die stigterslede van CROWN), naamlik "How to manage your money", gebruik om ons as gelowige-gesin 13 jaar gelede uit te daag om skuldvry te begin lewe – wat ons tot vandag toe, deur God se genade, nastreef.

Terwyl bankgroepe jou uitnoui om meer skuld te maak, gee meer en meer Christene gehoor aan 'n Bybelse oproep om so ver moontlik skuldvry te lewe en skuldvry besigheid te doen. Natuurlik is dit uitdagend, en verskil die metodes van besigheid tot besigheid en van gesin tot gesin. Maar God belowe immers dat Hy ons sal lei deur Sy stem (Joh. 10:3 en 4). Hy het immers die Heilige Gees gestuur om in elkeen van ons te kom woon. Om self ons prakties van situasie tot situasie te lei en te leer wat Sy planne en wil vir ons is.

God se Woord is lewend en aktueel, ook vir die markplek. Daarin vind ons 'n fondasie van rots waarop ons besigheid kan doen "op God se manier". En daarin vind ons beginsels wat God kan gebruik om iets van Sy koninkryk en die lig van die hemel ook daar te laat deurbreek.

In Mat. 7:24 en 25 sê Jesus immers self: "Elkeen dan wat hierdie woorde van My hoor en daarvolgens handel, kan vergelyk word met 'n verstandige man wat sy huis op rots gebou het. Die stortreën het geval, vloedwaters het afgekom, winde het teen daardie huis gewaai en daaraan geruk, en tog het dit nie ingestort nie, want die fondament was op rots."

Wie waag om te glo dat dit ook vir die besigheidswêreld en vir ons elkeen se persoonlike finansies geld, ontdek dat dit ons in staat stel om werklik 'n verskil te maak en anders te klink en te dink as die meeste mense en instansies rondom ons.

Wat sou jy antwoord as ek jou vra: wat dink jy is die basiese Bybelse beginsels wat geld vir Christene op die markplein, en spesifiek die besigheidswêreld?

Kom ek waag om ses Bybelse beginsels te verwoord:

1. Wees bereid om as volgeling van Jesus ook hier Jesus Bybels-getrou te volg (Luk. 16:10)
2. Wees bereid om ten minste aan jou huweliksmaat, en ander volwasse Christene rondom jou, rekenskap te gee oor jou doen en late op die markplein (Gen. 2:24; Job 31:37; Ps. 10:4; Pred. 12:14)
3. Behandel ander soos wat jy behandel wil word (Luk. 6:31). Verskaf daarom waarde aan mense, soos kwaliteit-diens en kwaliteit-produkte teen 'n billike prys
4. Wees aan niemand iets verskuldig nie, behalwe om mekaar lief te hê (Rom. 13:8). Betaal dus jou krediteure.
5. Betaal en behandel jou werknemers regverdig en billik (Jak. 4:17 – 5:5)

6. Behandel jou kliënte met liefde, respek en eerbied (Fil. 2:3; Jak. 3:2-18)

Volgende keer, DV, hanteer ek dit 'n bietjie meer in detail.

## DAG 17 WEES VERSIGTIG HOE JY “DIE ONEERLIKE MAMMON” HANTEER

Verlede week het ek gewaag om ten minste ses Bybelse beginsels te verwoord waaraan elke volgeling van Jesus as besigheidsman en/of –vrou, maar ook elkeen van ons in ons persoonlike hantering van geld, onself kan toets of ons werklik “lig” en “sout” daar op die markplein is. Kom ek probeer om in ‘n bietjie meer detail oor elkeen te praat.

### 1. Wees bereid om as volgeling van Jesus ook hier Jesus Bybels-getrou te volg (Luk. 16:10)

Kom ek haal vir jou Luk 16:9 tot 13 aan: "En Ek sê vir julle: Gebruik die oneerlike Mammon om vir julle vriende te maak sodat wanneer die geld nie meer kan help nie, hulle julle in die ewige wonings sal ontvang. Wie in die kleinste dinge betroubaar is, is ook in die groot dinge betroubaar; en wie in die kleinste dinge oneerlik is, is ook in groot dinge oneerlik. As julle dan nie betroubaar is in die hantering van die oneerlike Mammon nie, wie sal die ware rykdom aan julle toevertrou? As julle met ‘n ander man se goed nie betroubaar is nie, wie sal dan iets aan julle gee om as julle eie te besit? Geen huisbediende kan vir twee base tegelyk werk nie, want hy sal of die een minder ag en die ander een hoër, of vir die een meer oorbê en die ander een afskeep. Julle kan nie God én Mammon dien nie."

Dit is maklik om vir mense te sê jy is ‘n Christen. Hier in Suid-Afrika het 89% van die land se bevolking in die nasionale sensus in 2001 aangedui dat hulle aan een of ander Christelike kerk behoort. En die meeste van hierdie mense sal waarskynlik ook vir ander mense sê hulle is Christene.

Maar ek en jy weet dat die Bybel se prentjie van ‘n Christen is ...

- Iemand wat êrens is sy of haar lewe ‘n persoonlike geloofsontmoeting gehad het met ‘n lewende, opgestane Jesus Christus (Rom. 10:9,10)
- Waar jy ‘n geleentheid gehad het om jouself te sien soos God jou al die jare gesien het: iemand wat Hy o, so lief het, maar wat totaal verlore en geestelik dood was (Ef. 2:1-5)
- En waar jy, deur God se genade, deur die werking van God se Gees in jou lewe, Jesus Christus as Verlosser, maar ook opgestane Here, herken en in geloof erken het en gekies het om Hom te volg met jou hele lewe (Ef. 2:4-10).

Van daardie oomblik af is Christen-wees ‘n daaglikse lewenswyse waarin jy elke dag kies, onder die leiding van God se Gees wat in jou woon, om in alles wat jy doen, sê en dink, so te lewe soos wat jy oortuig is Jesus sou wou hê jy moet lewe tot Sy eer en verheerliking (1 Kor. 10:31; Kol. 3:17). Ook daar op die markplein en in jou hantering van geld (of “die oneerlike Mammon” soos Jesus geld daar in Lukas noem).

In ons manier van besigheid-doen, en in ons hantering van geld, blyk dit gou wie werklik die finale sê in jou lewe het: God of iets anders.

Daar beteken Christen-wees prakties om te onthou dat niks wat jy het eintlik jou eie is nie. Omdat, in die taal van Jesus in Lukas, dit eintlik “ ‘n ander man s’n is”; uiteintlik God s’n is.

Dit dwing ‘n mens om soos ‘n bankbestuurder te begin dink. Wat dag vir dag, maand vir maand, aan ander moet rekenskap gee oor sy hantering van al die geld in die bank waaroor hy aangestel is.

God kyk na hoe ons besigheid doen en hoe ons ons persoonlike finansies, en dit waarmee Hy ons vertrou het in die vorm van eiendom, hanteer. Om te sien of Hy ons kan vertrou met nog belangriker dinge as dit. Of Hy byvoorbeeld ons kan vertrou met meer geestelike outoriteit en mag daar in die werk of besigheid; waardeur ons werklik 'n blywende impak kan maak in baie ander mense se lewens.

Hoe sê die Afrikaanse spreukwoorde: Wie die kleine nie eer nie, is die grote nie werd nie.

Daarom moet ons tyd maak voor God om mooi te hoor hoe ons prakties ons besighede moet bestuur; personeel en kliënte moet behandel; belastingvorme moet invul; konflikte moet besleg en ons rekeninge betaal.

Sodat ander ons kan herken as volgelinge van Jesus Christus en hulle iets van die koninkryk van die hemel daar rondom ons op die markplein kan sien kom.

## DAG 18 DIE VEILIGHEIDSNET VAN 'N VOLWASSE KLOMP GEESTELIKE "BUDDIES" OM JOU

Ons is besig om stelselmatig meer in detail oor elkeen van die ses Bybelse beginsels te gesels waaraan elke volging van Jesus as besigheidsman en/of -vrou, maar ook elkeen van ons in ons persoonlike hantering van geld, onself kan toets of ons werklik "lig" en "sout" daar op die markplein is. Kom ons gesels verder.

Die tweede Bybelse beginsel wat ek geformuleer het, lui soos volg: Wees bereid om ten minste aan jou huweliksmaat, en ander volwasse Christene rondom jou, rekenskap te gee oor jou doen en late op die markplein (Gen. 2:24; Job 31:37; Ps. 10:4; Pred. 12:14)

Elkeen van ons het 'n groepie geestelik volwasse mense om ons nodig vir wie ons die reg gegee het om te enige tyd in ons lewens in te spreek, om van ons rekenskap te eis oor ons besluite en optredes.

Ek hoef seker nie in hierdie geselskap dit uitvoerig te motiveer nie. Behalwe miskien om te sê dat Christen-wees beteken dat nie een van ons "lone rangers" kan en mag wees nie, en dat ons mekaar nodig het, Soos wat die verskillende dele van jou eie liggaam die ander dele van jou liggaam nodig het.

Die die eerste en selfs belangrikste persoon in hierdie groepie is jou huweliksmaat (as jy getroud is).

Genesis 2:24 lui: "Daarom sal 'n man sy vader en moeder verlaat en saam met sy vrou lewe, en hulle sal een word." Gen. 2:18 beskryf die vrou selfs in die man se lewe in die huwelik as sy gelyke en sy pasmaat.

As dit God se wonderlike plan is vir 'n huweliksverhouding wat gaan werk soos Hy dit bedoel het, en wat ons in alle opsigte gaan bedien en beskerm, dan lyk dit vir my lewensnoodsaaklik dat ons erns daarmee sal maak ook ten opsigte van finansies en ons lewe op die markplein.

Dan lyk dit vir my belangrik dat elke man of -vrou in 'n huwelik ten minste elke groot finansiële - en besigheidsbesluit moet deurpraat met hul eggenoot.

En dit geld veral vir ons manne. Want, soos ek vir die besigheidsmanne in my seminare sê: Al weet jou vrou niks van jou besigheid af nie, het God vir 'n vrou 'n ingeboude radarsisteem gegee wat vir haar die gevaarligte laat raaksien lank voordat jy nog enige onraad gemerk het.

As God werklik ernstig was daarvoor dat jou eggenoot werklik vir jou 'n helper en gelyke pasmaat moet wees, kan jy verwag dat Hy deur Sy Gees vir jou eggenoot selfs insigte en wysheid bonatuurlik kan gee. En jy wil nie daar sonder klaarkom in die besigheid of daar waar julle saam verantwoordelik julle persoonlike finansies en gesin se begroting moet bestuur nie!

Behalwe vir jou huweliksmaat, moet jy die Here verder vertrou om ook vir jou 'n aantal ander volwasse Christen-vriende in jou lewe te wys, wat jy met vrymoedigheid gereeld kan kontak en kan toets of hulle vrede het met van jou belangrike besluite.

In Job 31:37 bely Job: "Ek kan rekenskap gee van elke tree wat ek gegee het, ek kan my teëstander met vrymoedigheid tegemoet gaan."

God eis immers rekenskap oor alles wat gedoen word. Ook oor wat in die geheim gedoen word, of dit goed is of kwaad, sê die Prediker daar in hoofstuk 12:14. Ps. 10:4 sê dit is net 'n ongelowige wat "neus in die lug" sal dink: God vra tog geen rekenskap nie! En in wie se planne daar geen plek vir God is nie.

Moet dus nie tevrede wees om net jou by die werk, by 'n bestuur of 'n klompie mededirekteure, die groen lig te kry vir jou besluite nie. Omdat jy weet daar is meer op die spel, en dat jy 'n ambassadeur is van God se koninkryk daar waar Hy vir jou 'n verhoog gegee het, skep vir jou 'n buddie-sisteem van volwasse Christene rondom jou wat te enige tyd in jou lewe en besigheid kan inspreek.



## DAG 19 DIE WAARHEID VAN DIE EVANGELIE IS OP DIE SPEL

Ons is besig om te gesels oor wat Christen-wees daar in die markplek behels. Die derde beginsels wat ek geformuleer het, lui soos volg:

3. Behandel ander soos wat jy behandel wil word (Luk. 6:31). Verskaf daarom waarde aan mense, soos kwaliteit-diens en kwaliteit-produkte teen 'n billike prys

In Luk. 6:31 leer Jesus Christus sy volgelinge: "Behandel ander mense soos julle self behandel wil word."

Die kwaliteit van die produkte en diens wat 'n besigheid aan sy kliënte bied, vertel meer oor die karakter van daardie besigheid en sy personeel as enige ander aspek van daardie besigheid.

As Christene in die besigheidswêreld dus werklik lig wil wees, en iets wil demonstreer van die "anders-wees" as mens-van-God in hierdie wêreld, sal ons die beste produk of diens vir die bes-moontlike prys aan mense moet lewer.

Dit geld vir die Christen-onderwyser, of dosent wat klasgee, of vir die mediese dokter, of verkoopsman wat skoene verkoop. Maar ook vir die bouer of verwer in die boubedryf, en vir die motorwerktuigkundige wat deur sy kliënte vertrou word om sy motor behoorlik te diens.

Ons reputasie en integriteit as Christengelowiges is op die spel. Maar meer as dit nog, ons is ambassadeurs van die Koninkryk van die hemel wat Jesus hier op aarde kom vestig het. Daarom is die waarheid van die Evangelie en God se integriteit en reputasie eintlik op die spel in alles wat ons doen, sê en dink.

Ek weet nie of jy dieselfde daar rondom jou beleef nie. In die besigheidswêreld vertel die manne en vroue jou gou dat as besigheidsmense vir jou - ter aanvang van julle besigheidsonderhandelinge -sê dat hulle Christen is dan los die meeste besigheidsmense daardie potensiële transaksie soos 'n warm patat. "Want die meeste Christen-besigheidsmense wat ons ken, is van die grootste skelms" sal hulle jou gou vertel!

Wat 'n tragedie!

Ek glo dit is die tragiese gevolg van die skeiding wat daar vir eeue tussen "kerk-wees in 'n heilige gebou", op 'n "heilige dag" vir 'n uur of twee, en ons lewe van 9 tot 5 die res van die week was. Vir soveel jare het die grootste gedeelte van die Christendom nie God se mense prakties geleer en toegerus hoe om hulle geloof en 'n Bybelse lewenswyse as volgelinge van Jesus ook prakties daar in die besigheidswêreld uit te leef nie.

Goddank, dwarsdeur die wêreld, binne alle dele van die Liggaam van Jesus, is dit besig om te verander!

Hoe wonderlik sal dit nie wees as elke Christengelowige begin verstaan dat hy of sy voltyds in bediening staan daar waar God vir hulle 'n verhoog gegee het in die besigheidswêreld nie!

Daarom is dit vir my so opwindend om eiendomsontwikkelaars, makelaars, dokters, onderwysers en besturende direkteure van reuse wêreldwye besighede raak te loop wat totaal uitverkoop is aan Jesus Christus. In wie se lewe daar bepaalde gebeure was wat veroorsaak het dat daardie mense 'n lewenskeuse gemaak het dat hulle, met alles waarmee God hulle vertrou, in die eerste plek, Sy koninkryk en Sy wil soek.

Hulle kan vir jou uit eie ervaring vertel hoe God in al hulle behoeftes ryklik voorsien. Hoekom sal hulle Hom dan nie genoeg vertrou om hulle besigheid in te rig volgens Sy Woord en wil nie!

Twee weke gelede was ek by die Suid-Afrikaanse Herlewingskonferensie in Wellington. Waar Dr Ralph Satura vertel het dat die eerste berigte oor die herlewing in Kanada jare gelede, juis koerantberigte was oor sakemanne en kliënte wat hulle geheime bedrog en diefstal teenoor mekaar bely het. Toe dit oor en oor gebeur, soveel so dat mense vir die koerantredakteur daarvan begin vertel het, het almal geweet herlewing het uitgebreek!

## DAG 20 CHRISTENE BETAAL HULLE REKENINGE

Daar is baie maniere om Christenwees te definieer. In Mat. 28:19 (in die 53-Afrikaanse vertaling) sê Jesus dit beteken: “Gaan dan heen, maak dissipels van al die nasies, en doop hulle in die Naam van die Vader en die Seun en die Heilige Gees; en leer hulle om alles te onderhou wat Ek julle beveel het.”

Kom ek probeer om in my eie woorde te omskryf wat ek verstaan onder “dissipel wees”: Om ‘n Christen te wees beteken dat - met Sy Gees en Sy lewe in my – vra Hy van my om “Sy volgeling” te wees. Met Sy Gees in my, kan ek tree vir tree, van situasie tot situasie, Sy Gees vertrou om my te leer hoe om so op te tree soos Jesus Christus sou opgetree het as Hy in my skoene was ...

Die een ding van Jesus wat my telkens aangryp is Sy onveranderlike, onvoorwaardelike liefde vir mense. En dan vir alle mense! Dit het nooit verander nie. Ongeag wie voor Hom gestaan het, of met wie Hy paaie gekruis het. Hy het hulle altyd in liefde behandel.

En met daardie selfde liefde het Hy vandag nog jou en my lief. As Johannes hierdie liefde vir mense van Jesus verder moet kwalifiseer, dan beskryf hy dit as ‘n liefde wat genade, maar ook waarheid, bedien het aan mense (Joh. 1:14).

As Jesus vir ons in twee sinne moes opsom wat Hy van ons as Sy volgelinge verwag, dan som Hy dit so in Mat. 22:37 tot 39 op: “Jy moet die Here jou God liefhê met jou hele hart en met jou hele siel’ en met jou hele verstand... En die tweede, wat hiermee gelyk staan, is: ‘Jy moet jou naaste liefhê soos jouself.”

Christenwees is dus geweldig prakties. Christenwees gaan nie net oor wat jy glo nie. Dit gaan oor ‘n sekere lewenswyse omdat jy sekere dinge glo. Dit gaan oor ‘n sekere manier van lewe, van praat en dink ... omdat daar sekere dinge in jou gebeur het, wat jou werklik Christen gemaak het.

Daarom kan dit nie anders as dat ons Christenwees ook op die markplein navore moet kom nie. Christensakemanne en -vroue sal in die besigheidswêreld anders lyk, anders doen en praat as ongelowige besigheidsmense rondom hulle. Dit kan nie anders nie. Anders is daar êrens iets drasties verkeerd!

Dit is waarom ek ‘n vierde beginsel vir Christenwees in die besigheidswêreld geformuleer het, naamlik: Wees aan niemand iets verskuldig nie, behalwe om mekaar lief te hê (Rom. 13:8). Betaal dus jou krediteure.

Ons liefde vir mense kan nie net ‘n rasonale kop-ding en sê-ding bly nie. Ons liefde vir mense, as volgelinge van Jesus, gaan op ‘n sekere manier uitmond in ons besigheidspraktyke. Daarom moet dit elkeen van ons krediteure, byvoorbeeld, baie direk raak. En dit sluit nou elkeen in wat vir ons sekere voorraad in ons besigheid verskaf het, maar ook elkeen by wie ons, op enige manier, geld geleen het.

Elkeen van julle wat in besigheid is, weet hoe maklik dit is om krediteure te laat wag vir hulle geld as jou kontantvloei ‘n probleem gedurende die maand raak in die besigheid.

Natuurlik kom daar situasies wat jy eenvoudig nie die geld het om iemand betyds te betaal nie. Maar dan is dit nog steeds jou verantwoordelikheid om in eerlikheid en met groot verantwoordelikheid die situasie van jou kant teenoor jou krediteure te verduidelik en ander reëlins te tref.

Spr. 3:27 en 28 in die NIV lui soos volg: "Do not withhold good from those who deserve it, when it is in your power to act. Do not say to your neighbour, "Come back later; I'll give it tomorrow" —when you now have it with you."

As jy aanhou om goed te bestel of op rekening te koop terwyl jy weet jy het nog nie verlede keer s'n betaal nie, of terwyl jy weet dat jy nie die geld het om dit te betaal wanneer jy dit moet betaal nie, is jy oneerlik.

Soos ek verlede keer reeds gesê het. Ons integriteit as Christene, as ambassadeurs van die koninkryk van God, is op die spel. Ons ja moet ja wees, en ons nee nee (Jak. 5:12).

Daarom wil ek jou vra: Betaal jy jou rekeninge elke maand betyds? Onthou: Dit is net so 'n deel van jou getuigenis as Christen soos wanneer jy vertel van wat in jou lewe gebeur het toe jy Jesus Christus as 'n lewende Persoon ontmoet het.

## DAG 21 OM JOU WERKERS TE MIN TE BETAAL IS GEVAARLIK!

Soos ek laas gesê het, die een uitstaande kenmerk van Bybelse Christenwees gaan wees hoe ons ander mense gaan liefhê met 'n liefde wat baie prakties hulle lewens gaan raak daar waar dit werklik saak maak.

In Mat. 7:12 spel Jesus hierdie praktiese liefde soos volg uit: "Alles wat julle wil hê dat die mense aan julle moet doen, moet julle ook aan hulle doen. Dit is tog waarop dit neerkom in die wet en die profete."

In Jak. 4:17 tot 5:5 gebruik God se Gees Jakobus om die volgende vir ons hieroor te sê: "As iemand weet wat die regte ding is om te doen en hy doen dit nie, is dit sonde. En nou, julle rykaards, kerm en kla oor al die swaar wat oor julle gaan kom. Julle rykdom sal tot niet gaan en julle klere sal deur motte opgevreet word, julle goud en silwer sal verroes. Die roes sal teen julle getuig en aan julle vreet soos 'n vuur. Julle maak skatte bymekaar, en dit terwyl dit die laaste dae is. Ja, julle hou die loon agter van die werkers wat julle lande afgeoes het. Dit skreeu ten hemel; die geroep van dié wat geoes het, het tot by die Here die Almagtige gekom. Hier op aarde lewe julle in weelde en oordaad; julle smul na hartelus, en dit terwyl die slagdag reeds daar is."

Wow! Het jy mooi gelees wat hier staan? Besighede en individue wat nie diegene wat vir hulle werk ordentlik en genoeg betaal nie, moet dus nie verras wees as die kontantvloei en bates van die besigheid skielik, onverstaanbaar, begin krimp nie! Om nie eers te praat van nuwe besigheid wat net minder en minder gaan raak nie.

Die God wat ons dien se Woord is die waarheid. Hy het 'n manier om 'n soort roes uit die hemel opdrag te gee om aan sekere mense en sekere besighede se finansies te begin knaag! En dan gaan goud selfs roes!

Daarom formuleer ek 'n vyfde beginsel in die lig hiervan om ons Christenwees prakties te maak van 9 tot 5 van Maandag tot Vrydag daar op die markplein:

### 5. Betaal en behandel jou werknemers regverdig en billik (Jak. 4:17 – 5:5)

Regverdige en billike praktyke in die besigheid is 'n geweldige verantwoordelikheid! Maar ook 'n wonderlike geleentheid vir ons as Christene. En dit geld vir elke Christelike werkgewer, of dit nou in die besigheidswêreld is, of teenoor diegene wat vir jou in die huis of in die tuin werk.

Die praktyke waarna ek hier verwys raak veral die betaling en werksvoordele van werknemers, maar strek natuurlik ook baie verder as dit. Regverdigheid en billikheid geld natuurlik ook vir die gesindhede en verhoudinge binne die werksplek.

Dink maar net hoe maklik diskriminerende optredes en gesindhede tussen wit- en blouboordjie-werkers, en tussen die geslagte en rasse soos 'n kanker kan versprei in die werkplek.

Iets wat my geweldig aan die hart deesdae gryp is hoe maklik werkgewers werknemers kan behandel asof hulle net werkers is. Asof hulle persoonlike probleme en huislike omstandighede niks te make het met hulle lewe daar in die werksplek nie.

Praktiese Christelike liefde gaan beteken dat ons begin verstaan dat ons verantwoordelikheid teenoor mense baie verder uitkring as bloot dit wat die wêreld om ons daaronder verstaan of

vereis. Elkeen van ons werknemers is immers volledig mens, wat in al die normale mensverhoudings staan soos ouer-wees, huweliksmaat-wees, fisiese en emosionele mens-wees, godsdienstige mens-wees, ens.

As ek en jy dus mense daar in die werksplek wil bedien waar dit 'n verskil kan maak, en op so 'n wyse dat ons werklik brue kan begin bou waarop ons later daardie selfde mense met die lewe, die liefde, die genade en die gawes van Jesus deur die werking van die Heilige Gees wil bedien, dan sal ons hier moet begin.

Die woorde van Paulus aan Filemon tref my elke keer as ek dit lees. Onesimus, voorheen Filemon se slaaf (vandag sou ons eerder sê "werknemer"), het Paulus daar in die tronk ontmoet en onder sy bediening tot bekering gekom. En nou stuur Paulus hom terug na sy vorige eienaar, Filemon, met die volgende persoonlike boodskap: "Miskien was hy 'n kort tydjie van jou af weg juis sodat jy hom vir altyd sou terugkry, nou nie langer net as 'n slaaf nie, maar meer as 'n slaaf: as 'n geliefde broer. Dit is hy besonderlik vir my; hoeveel te meer sal hy dit dan nie vir jou wees nie, as mens en as broer in die Here. Dus, as jy my as deelgenoot in die geloof beskou, ontvang hom net soos jy my sou ontvang. As hy jou enige skade aangedoen het of iets skuld, sit dit op my rekening. Hier skryf ek, Paulus, met my eie hand: "Ek sal betaal." Ek hoef jou natuurlik nie daaraan te herinner dat wat jy is, jy aan my te danke het nie. Ja, broer, in die Naam van die Here, bewys my hierdie guns. Maak my hart bly, soos 'n broer in Christus." (Filemon vers 15 tot 20)

En dit geld net so in die werksplek vir elkeen van ons wat in 'n posisie van outoriteit daar aangestel is. Teenoor elke werknemer wat 'n Christenbroer of -suster is, maar ook teenoor elke ongelowige wat daar werk.

Mag God ons hiermee help.

## DAG 22 BEHANDEL MENSE SOOS JY JESUS SOU BEHANDEL AS HY JOU KLIËNT WAS

Ons is besig om met mekaar te gesels oor hoe ons Christen-wees baie prakties daar in die werksplek, in ons besigheid, kantoor of op die markplein, deel kan wees van ons Christenlewenswyse van 9 tot 5, van Maandag tot Vrydag, ten minste.

As ons Christen-wees ons nie daar anders maak en anders laat optree as ongelowiges nie, is ons nie daar lig en sout nie. Om 'n effektiewe getuie en ambassadeur vir Christus en Sy anderse Koninkryk ook daar op die markplein te wees, sal ons deurentyd na meer effektiewe wyses en geleenthede moet soek om dit te deel met diegene wat elke dag ons pad kruis.

Moet my nie verkeerd verstaan nie. Dit beteken nou nie dat ek bedoel jy moet elkeen wat jou pad in die werksplek kruis met 'n preek of Bybelverse toe-takel nie. Asseblief nie!

My persoonlike standpunt is dat 'n mens baie sensitief vir die stem van God se Gees in jou, moet wag vir geleenthede om baie spontaan te kan getuig oor dit wat God besig is om in jou lewe te doen. En dat jy verder vir jouself die reg moet verdien om met iemand direk en persoonlik oor sy of haar persoonlike geloofslewe en geloofskeuses te praat.

Die manier hoe ek glo ons vir onself die reg kan verdien is deur die wyse hoe ek mense van dag tot dag, in ons besig-wees met mekaar, behandel.

Ek het hierdie beginsel in woorde probeer formuleer in die sesde beginsel wat vir ons as Christene in die besigheidswêreld geld, naamlik:

### 6. Behandel jou kliënte met liefde, respek en eerbied (Fil. 2:3; Jak. 3:2-18)

Dit is vir my net logies dat elkeen met wie jy op enige manier paaie kruis en besigheid van enige aard doen – as besigheidsman of –vrou, of as huisvrou wat vrugte en groente by Fruit & Veggies koop – uit jou optrede iets sal proe van die verskil wat Jesus in jou lewe gemaak het.

Hulle sal dit byvoorbeeld agterkom uit die manier hoe jy hulle behandel of met hulle praat. Maar ook uit die manier en jou bereidheid om na hulle kant van sake te luister.

Mense kom gou agter of hulle as mens vir jou belangrik is. En of jy werklik enige respek vir hulle as mens het.

Maar hulle kom dit ook gou agter uit die gehalte produk of diens, en die nasorgdiens wat jy lewer. Om nie eers te praat van of die prys, wat jy vra vir jou produk of diens, werklik billik is nie.

Die bekende riglyn: “wat sou Jesus gedoen het as Hy in my plek was of die werk gedoen het wat ek doen?” bly vir my 'n goeie riglyn vir wat my optrede telkens in verskillende situasies behoort te wees.

Maar ook ander Bybelse beginsels soos dit wat daar in Fil. 2:3 tot 5 staan: “Moet niks uit selfsug of eersug doen nie, maar in nederigheid moet die een die ander hoër ag as homself. Julle moenie net elkeen aan sy eie belange dink nie, maar ook aan dié van ander. Dieselfde gesindheid moet in julle wees wat daar ook in Christus Jesus was ...”

Dink net hoe anders sal ons besigheid begin funksioneer as ons werklik al ons kliënte soos ons ware vriende begin behandel en vir hulle net dit doen en net dit vra wat ons vir ware vriende sou doen en vra.

Dit is nou hier waar integriteit en 'n skoon gewete in spel kom. Ek en jy moet môre en oormôre, daar waar ons alleen is met ons self voor God, onself in die oë kan kyk en eerlik kan sê: daar is niks waaroor ek my skaam oor hoe en wat ek in besigheid gedoen het nie.

As dit nie so is nie, moet ons eerlik voor God onself gaan ondersoek en gaan reg maak wat verkeerd is en gaan reg maak waar ons drooggemaak het. En moet ons gaan vergifnis vra en gaan restitusie doen waar nodig.

Om daarna van nuuts af dinge te doen soos Jesus dit sou gedoen het as Hy in jou skoene was.



## DAG 23 WAT SÊ GOD OOR FINANSIES EN GELD

As ons met mekaar eerlik oor Christen-wees in die werkplek wil gesels, kan ons nie anders nie as om ook met mekaar te gesels oor wat God in die Bybel oor geld en finansies sê nie.

Dalk verras dit jou om te ontdek dat daar meer as 2350 verse in die Bybel is wat oor geld en besittings handel. Dit is by verre baie meer as wat die Bybel oor gebed of oor geloof praat.

Nou maar hoekom dan?

Dit is nie omdat geld en besittings vir God belangriker as gebed of geloof is nie. Dit is, na my oordeel, eerder omdat ons hantering van geld en besittings 'n baie goeie maatstaf is om te bepaal of ons Christelike geloof en ons gebedslewe werklik al in die praktyk van 'n anderse Christelike lewenswyse uitgemond het.

Soos wat ek en jy in die Bybel begin ontdek wat God alles oor geld en besittings te sê het, ontdek ons dat Hy ons hantering van geld as 'n maatstaf gebruik om ons oorgawe en ons gehoorsaamheid aan Hom te meet. Dit is mos maklik om te sê jy is 'n Christen en jy glo. Maar as dit kom by jou hantering en denke oor geld en besittings, wys dit gou-gou of dit net praatjies is.

Vier sleutelverse in die verband is dit wat daar in Luk. 16:10 tot 14 staan. Kom ek haal dit vir jou aan: "Wie in die kleinste dinge betroubaar is, is ook in die groot dinge betroubaar; en wie in die kleinste dinge oneerlik is, is ook in groot dinge oneerlik. As julle dan nie betroubaar is in die hantering van die oneerlike Mammon nie, wie sal die ware rykdom aan julle toevertrou? As julle met 'n ander man se goed nie betroubaar is nie, wie sal dan iets aan julle gee om as julle eie te besit? Geen huisbediende kan vir twee base tegelyk werk nie, want hy sal of die een minder ag en die ander een hoër, of vir die een meer oorhê en die ander een afskeep. Julle kan nie God én Mammon dien nie."

Het jy mooi gelees wat hier staan? Ons hantering van geld en dit wat ons met geld kan koop – eiendom dus, in al sy verskeidenheid vorms – is in God se oë eintlik die kleinste van klein dingetjies". Maar tog is ons "betroubaarheid" in die hantering daarvan, vir Hom die maatstaf en toets of Hy ons met "groter dinge as dit, met "ware rykdom" kan vertrou!

En nou kan jy maar jou verbeelding gebruik om te dink wat ons alles onder hierdie "ware rykdom" kan verstaan!

Maar lees asb. verder! Jou hantering van geld en dit wat jy met geld koop, is 'n duidelike aanduiding wie werklik God is in jou lewe; wie of wat vertrou jy eintlik in jou lewe vir dit wat jy nodig het!

Ek wil persoonlik raak. In my eie lewe het die Here sedert 1992 met my hieroor spesifiek begin praat. En laat ek dadelik sê: my mond het oop gehang oor alles wat ek ontdek het. Dit het my dan ook gedwing om 'n slag erns te maak met ons gesin se begroting en finansies. Maar dit het ook ons hele gesin se lewe ingrypend verander, want dit het ons as gesin vrygemaak van skuld! En in daardie vryheid wandel ons nou reeds 12 jaar.

Daarom is my gebed dat jy die Here sal toelaat om werklik met jou oor hierdie area in jou lewe te praat. Ek bid dat dit jou sal inlei in 'n nuwe soort vrede en vryheid in jou finansies, want dit is wat God aan ons belowe. Daarom wil ek jou aanmoedig om God se riglyne hieroor toe te pas in jou lewe. As jy êrens 'n seer ontdek, gebruik dan God se medisyne daarvoor. God wil dat Sy waarheid jou wêreld en lewe sal verander, in plaas daarvan dat jou lewe en

situasie God se waarheid sal verander. Gebruik ook jou geleenthede om die beginsels wat jy in die proses aanleer, met ander te begin deel.

Te lank het Christene probeer voorgee dat hulle geen finansiële probleme het nie. Ons weet immers dit is onsin. Ons is immers op hierdie terrein aan dieselfde versoeking as die ongelowige blootgestel. Dit is alleen deur gehoorsaamheid aan God se Woord, en deur Sy genade en seën, wat ons uit daardie strikke kan ontsnap.

Maar hoe kan ons Sy seën ervaar as ons nie Sy plan verstaan nie? Daarom gaan ek in die volgende paar weke fokus op God se beginsels wat geld vir ons finansies.

Ek is oortuig dat gehoorsaamheid aan hierdie beginsels God se mense ingelei in 'n nuwe soort vrede en vryheid rondom finansies en eiendom, want dit is wat God aan ons belowe.

Maar aan die anderkant, daar waar ons dit soms oortree het, beleef ons, soos so baie ander mense rondom ons, hoe ons worstel met die gevolge daarvan in ons lewe en beleef ons nie God se seën en al die oorfloed wat God vir ons bedoel het.

Die meeste van die belonings wat die Skrif aan ons hieroor belowe, veronderstel immers ons gehoorsaamheid aan daardie beginsels. Wie dus wil deel in God se seën op hierdie terrein, moet God se plan verstaan en dit begin gehoorsaam.

Miskien is jou finansies in orde en beleef jy God se seën in jou alledaagse lewe.. Maar tog is jy een van baie Christene wat nog nooit die redes uit die Skrif verstaan het waarom jy doen wat jy doen nie. As jy een van hierdie mense is, gaan jy hierdie Woord van die volgende paar weke geniet, want dit gaan jou help om hierdie finansiële beginsels, en hulle praktiese toepassing in die praktyk, vanuit die Woord aan ander oor te dra.

## DAG 24 DIT IS VIR GOD BELANGRIK DAT JY GENOEG GELD SAL HÊ

Soos ek laas gesê het, het ek, tot my verbasing, hierdie magdom teksgedeeltes in die Skrif ontdek waar God oor geld en besittings met ons praat.

Geld is mos vir ons almal belangrik. Daarsonder kan ons nie vir onself en vir ons geliefdes sorg nie. En daarsonder kan die koninkryk van God ook nie vrylik sy loop in hierdie wêreld en in mense se lewens neem nie.

Daarom is dit vir my so aangrypend om in die Woord raak te lees hoe God Sy mense in hierdie wêreld êrens op die markplein posisioneer waar Hy hulle wil gebruik, maar ook waar Hy hulle en hulle geliefdes finansiëel wil versorg.

Dink maar byvoorbeeld aan die pad wat God met die jong tienerseun, Josef, gestap het (Gen. 50:19, 20). God het mos 'n manier om agter die skerms, daar waar ons nie kan sien nie, Sy plan, te laat gebeur. So "voer" Hy letterlik die jong Josef as slaaf "in" Egipte, die wêreldmoontheid van destyds, in. En "posisioneer" en seën hom weer en weer so dat hy elke keer die oog kan vang van, uiteindelik, selfs die Farao. Om dan aangestel te word as tweede in bevel van hierdie land, en dit terwyl hy 'n Jood was. Sodat God se mense, maar ook al die inwoners van hierdie heiden-land, Egipte, en die nabygeleë bure, genoeg kan hê te midde van een van die felste droogtes destyds in daardie omgewing.

Dit is merkwaardig om te ontdek hoe die grote God in die detail van ons lewens betrokke is. En dit terwyl ek en jy een van meer as 5 biljoen mense op hierdie aarde is. Tog belowe die lewende God, wat nie kan lieg nie, aan jou en my:

"Daarom sê Ek vir julle: Moet julle nie bekommer oor julle lewe, oor wat julle moet eet of drink nie, of oor julle liggaam, oor wat julle moet aantrek nie. Is die lewe nie belangriker as kos en die liggaam as klere nie? Kyk na die wilde voëls: hulle saai nie en hulle oes nie en hulle maak nie in skure bymekaar nie; julle hemelse Vader sorg vir hulle. Is julle nie baie meer werd as hulle nie? Trouens, wie van julle kan deur hom te bekommer sy lewe met een enkele uur verleng? ...As God dan die gras van die veld, wat vandag nog daar is en môre verbrand word, so versier, hoeveel te meer sal Hy dan nie vir julle sorg nie, julle kleingelowiges? ...Julle hemelse Vader weet tog dat julle dit alles nodig het. Nee, beywer julle allereers vir die koninkryk van God en vir die wil van God, dan sal Hy julle ook al hierdie dinge gee." (Mat. 6:25-33)

Sulke bekende woorde, maar hoe vertroostend is dit nie! Veral in 'n wêreld waar so min dinge seker is. Watter troos is dit nie vir elkeen van ons om te weet dat waar ek en jy in alle opregtheid, en met sensitiwiteit, God se wil vir ons lewe soek - ook dus ons plek in die markplek, Hy vir ons, in die detail van ons lewe en behoeftes, verantwoordelikheid neem en ons van situasie tot situasie getrou sal lei en versorg.

God het vir soveel van ons al in die verlede bewys gelewer van hoe getrou Hy is. As Hy die opdrag gee, en ons doen wat Hy sê, betaal Hy die rekeninge. Maar as ons ons eie kop volg, betaal ons ...

Daarom is dit so belangrik om sensitief te wees vir God se stem in jou lewe. Om presies te hoor en seker te maak waar God jou wil gebruik en hoe Hy jou en jou mense wil versorg.

Maar dit is ook net so belangrik hoe ons daardie "verhoog" dan gebruik wat God ons gee in die markplek. Hoe belangrik is dit nie vandag dat, ter wille van ons getuienis daarbuite, en ter

wille van die koms van God se koninkryk ook daar, dat "excellence" ons werk daar moet kan beskryf nie!

Hierdie week lees ek weer 1 Sam. 2: 7 tot 10 waar Hanna God loof as sy bely: "Die Here maak arm en Hy maak ryk, Hy verneder, ook gee Hy aansien. Hy laat die geringes uit die stof opstaan, Hy hef die armes op van die ashoop af om hulle by vername mense te laat sit; Hy skenk hulle 'n ereplek. Aan die Here behoort die pilare van die aarde; Hy het die aarde daarop gegrondves. Hy beskerm sy troue dienaars op hulle pad, maar die goddeloses word stil gemaak in die duisternis van die graf. 'n Mens oorwin nie deur eie krag nie! Dié wat teen die Here in opstand kom, word vernietig, van bo uit die hemel verbrysel Hy hulle. Die Here spreek reg tot by die eindes van die aarde, Hy verleen krag aan sy koning, Hy gee sterkte aan sy gesalfde."

Daarom wil ek jou aanmoedig om vandag vir 'n paar minute te gaan stil sit, en na te dink oor hoe God se hand jou in jou beroepslewe gelei het sedert jy skool verlaat het. Mag God se Gees jou die oë en die insig gee om Sy getrouheid en leiding ook daarin raak te kan sien.

En as daar swaar en donker tye in jou lewe was, om te ontdek dat Rom 8:28, o, so waar is: "Ons weet dat God alles ten goede laat meewerk vir dié wat Hom liefhet, dié wat volgens sy besluit geroep is."

Gebruik somer hierdie oomblik om net weer vir Hom dankie te sê vir Sy genadige, liefdevolle besigwees en versorging van jou en jou mense.

## DAG 25 GOD IS GEÏNTERESSEERD IN WAT IN JOU HART AANGAAN

Ons is besig om so 'n bietjie na te dink oor God en geld.

Meer as enigiets anders, is God geïnteresseerd in wat daar in jou hart aangaan. Hoe jy, byvoorbeeld, 'n oorvloed of gebrek aan geld hanteer.

Daarom bly die woorde van Paulus daar in Fil. 4:11b-13 my altyd by as hy die volgende sê: "... ek het geleer om my in alle omstandighede te behelp. Ek weet wat armoede is en ek weet wat oorvloed is; van alles het ek ondervinding: om genoeg te hê om te eet sowel as om honger te ly, om oorvloed te hê sowel as om gebrek te ly. Ek is tot alles in staat deur Hom wat my krag gee."

Wat 'n mondvol! Om uit Paulus se mond te hoor dat God selfs in Christene se lewens ruimte maak vir dae van "te min", te midde al die dae van "genoeg en "oorvloed".

Nogal 'n bitter pil vir diegene om te sluk wat glo aan die sogenaamde "voorspoed-teologie"!

Maar tog weet die meeste van ons uit ervaring dat dit deel is van die meeste van ons se lewens. En weet ook watter uitdaging dit is om in daardie tye ag te gee op dit wat Spr. 4:23 sê: "Wees veral versigtig met wat in jou hart omgaan, want dit bepaal jou hele lewe."

Vir my as Christen bly die uitdaging om in beide die tye van swaar en tye van voorspoed God te bly vertrou as die enigste werklike Bron en Versorger in my en my geliefdes se lewens. En om aan te hou glo ek kan maar Hom in elke omstandigheid bly vertrou, en bly glo dat Hy ons liefhet en weet wat vir ons die beste is.

Gedurende daardie tye het ek ook leer glo Hy gee alleen vir ons dit waaroor ons goeie rentmeester kan wees. Sonder dat ons daardeur bo ons kragte versoek sal word. Tog was ek deurentyd so bewus daarvan dat my hantering van ons geldsake altyd 'n toetsgebied sal bly waar my gewilligheid om God werklik God in my lewe te laat wees, duidelik sigbaar sal wees.

Ek glo dit is waarom ek en jy as Christen deur sulke geestelike seisoene gaan, ook wat ons geldsake betref. In my eie lewe en die van vele van my Christenvriende, was die afgelope paar jare diep waters waardeur ons finansieel moes gaan. Ons moes leer om God onder alle omstandighede te vertrou. Maar dit was ook die tyd waarin God ons net weer geleer het wat Sy hart rondom finansies is.

Hy het ons, byvoorbeeld, geleer dat alles aan Hom, en Hom alleen, behoort. Ja, en dat Hy totaal in beheer is. Maar Hy het ons ook geleer wat ons verantwoordelikhede is wat geld en ons werk betref.

Die Here het teksgedeeltes soos Ps. 24:1 gebruik om ons op 'n punt in ons lewens te bring waarin ons met alle opregtheid kon bely: "Die aarde en alles wat daarop is, die wêreld en dié wat daar woon, alles behoort aan die Here."

En ons moes kies of ons bereid was om alle eienaarskap in ons lewe aan God oor te teken. Sodat ons in opregtheid kan sê: Aan Hom behoort alles wat ek het: die motor, die huis, die besigheid, die TV-stel, die bed, die bankrekening, die kredietkaarte ... Hy het die finale sê oor hoe ons dit moet gebruik. Ons is maar net Sy bankbestuurders, Sy batebestuurders.

Die van julle wat ons persoonlik ken, weet van die pad wat God tans met ons loop. Dat niemand nou al vir jare ons 'n "maandelikse salaris" van enige aard betaal nie, maar dat ons

in totale afhanklikheid van God net doen wat ons oortuig is Hy wil hê ons moet doen om Sy mense in Sy Liggaam toe te rus.

Noem dit 'n lewe in geloof as jy wil.

Wat vir my merkwaardig is in hierdie hele ondervinding is hoe ek in hierdie proses besig is om te leer wie die God werklik is wat ons moes leer vertrou met ons lewe, ons alles. Dat Hy werklik 'n betroubare God is wat ons liefhet en wat net die beste vir ons wil hê. En dat Hy ernstig was toe Jesus gesê het: Ek het gekom dat julle lewe kan hê, en dit in oorvloed (Joh. 10:10b).

En dat Hy, omdat Hy vir ons omgee, vir ons riglyne in Sy Woord gegee het om byvoorbeeld geld op so 'n manier te hanteer, dat dit tot ons beswil en tot Sy welbehag sal wees.

Maar ons het ook gou geleer dat God se maniere so anders is as wat onself en die wêreld om ons, vir soveel jare, gewoon was om geld te hanteer. Ja, dat daardie woorde daar in Jes. 55:8 en 9 so waar is: "My gedagtes is nie julle gedagtes nie, en julle optrede nie soos Myne nie, sê die Here; soos die hemel hoër is as die aarde, so is my optrede verhewe bo julle optrede en my gedagtes bo julle gedagtes."

Raak 'n bietjie stil en dink 'n bietjie na oor die pad wat God met jou en jou mense die afgelope jare rondom jou werk en geldsake geloop het, en dank Hom daarvoor.

## DAG 26 GOD SE DEEL EN ONS VERANTWOORDELIKHEDE IN DIE LIG DAARVAN

Geld, besigheid, soos die politiek, is vir baie Christene areas wat “vuil” is, en wat hulle moeilik assosieer en assimileer met hulle Christen-wees.

Dit is vir baie mense moeilik om te dink dat God gemoeid wil wees met ons finansies. Tog behoort dit teen hierdie tyd vir jou duidelik te wees dat God in die detail van ons finansies en besigheidslewe elke oomblik van die dag betrokke is.

Die feit dat ons nie altyd Sy hand onmiddellik daarin kan sien nie, beteken nie dat Hy nie daar is nie. Dit is mos soos ‘n tapisserie, met ‘n voor- en ‘n agterkant. Van vooraf kan almal duidelik die toneel sien wat uitgebeeld word, maar aan die agterkant van die tapisserie – daar waar die meeste van ons nooit kyk nie - is die geheim van die pragtige toneel opgesluit. Dit is daar waar die skynbare deurmekaar-konfoes van heen-en-weer-, en ineengevlegte gare, die toneel aan die voorkant moontlik maak.

Die afgelope tyd het ek iets van wat die Bybel oor hierdie voor- en agterkant te sê het, vir jou probeer teken. Kom ek som dit ‘n bietjie op:

1. Ek het vir jou God se betrokkenheid en aandeel daarin beklemtoon, naamlik dat Hy die Eienaar van alles is:

- Deut. 10:14 - “Die hemel, selfs die hoogste hemel, behoort aan die Here jou God, ook die aarde en alles daarop.”
- Ps. 24:11 - “Die aarde en alles wat daarop is, die wêreld en dié wat daar woon, alles behoort aan die Here.”
- Al die silwer en die goud behoort aan God: Haggai 2:8 - “Aan My behoort al die silwer, aan My al die goud, sê die Here die Almagtige.”

Daarom is deel van jou en my verantwoordelikheid en reaksie op hierdie geloofsuitsprake, dat ons in gehoorsaamheid, ons eienaarskap van ons besittings en hele lewe, gewilliglik oordra aan die Here. Luk. 14:33 sê immers: “So kan niemand van julle my dissipel wees as hy nie bereid is om van al sy besittings afstand te doen nie.”

Ons moet afstand doen van eienaarskap oor alles wat ons het. En wanneer God die Eienaar word in alles in ons lewe, word elke bestedingsbesluit in ons lewe ‘n geestelike besluit en deel van ‘n hele lewe tot die eer van God. Ons vra nie langer “Here, wat wil U hê moet ek met **my** geld doen ?” nie, maar eerder “Here, wat wil U hê moet ek met **U** geld doen?” Wanneer ons die regte gesindheid het, spandeer ons geld slegs op dinge wat die Here sal behaag.

Maar die Skrif openbaar ook hoe God totaal in beheer van elke detail van my lewe is, en dus ook in my finansies en besigheid of werksloopbaan. Soos wat Daniël daar in Dan. 4:34-35 bely: “ Ek het die Allerhoogste geprys... Hy doen soos Hy besluit met die hemelse magte en met die mense op aarde. Daar is niemand wat Hom daarvan kan weerhou en vir Hom kan sê: ‘Wat doen U?’ nie.”

Watter troos is dit nie vir my en jou nie! Om te weet en te glo dat ons liefdevolle hemelse Vader in detail finaal in beheer is van elke gebeurde in my lewe! Ja, dat elkeen van ons wat Christus volg as Verlosser en Here, kan weet dat God alle dinge, selfs die moeilike omstandighede, ten goede laat meewerk vir Sy kinders (Rom. 8:28).

Met ander woorde, God sal Sy plan en doel daarmee laat realiseer, kom wat wil. Daarvan is die lewe van 'n Josef, byvoorbeeld, vir ons so 'n wonderlike stuk getuigenis. Vgl. Gen. 45:5-8; 50:20).

Maar aan die anderkant, weet ons almal uit ervaring hoe God ook besig is om ons karakter te bou, veral midde daardie moeilike tye in ons lewe. Daarom sê Paulus daar in Romeine 5:3-4: "Ons verheug ons ook in die swaarkry, want ons weet: swaarkry kweek volharding, en volharding kweek egtheid van geloof, en egtheid van geloof kweek hoop".

As ons dit werklik begin glo, sal ons ook meer geredelik God vertrou om in al ons behoeftes, en ek bedoel werklik "al" ons behoeftes, te voorsien!

Een van God se name is immers "Jehovah Jireh", wat beteken "die Here sal voorsien. Daarom bely Paulus daar in Fil. 4:19 met soveel beslistheid: "En my God sal in elke behoefte van julle ryklik voorsien volgens sy wonderbaarlike rykdom in Christus Jesus."

Jesus self belowe dit immers daar in Mat. 6:33 as Hy sê: "Nee, beywer julle allereers vir die koninkryk van God en vir die wil van God, dan sal Hy julle ook al hierdie dinge (bedoelende kos en klere) gee."

Ons kan nie altyd voorspel of voorsien hoe God dit gaan doen nie, maar een ding weet ons verseker, en dit is dat Hy sal doen wat Hy belowe het.

En hoeveel keer verras Hy ons nie oor hoe Hy dit doen nie!



## DAG 27 HOE VOEL JY OOR DIE WERK WAT JY DAG VIR DAG DOEN?

Kom ons gesels 'n bietjie oor wat God oor werk sê.

Die eerste ding wat God met Sy nuwe mens, Adam, daar in die begin in die sondelose omgewing van die Tuin van Eden gedoen het, was om vir hom werk te gee. "Die Here God het die mens in die tuin laat woon om dit te bewerk en op te pas." (Genesis 2:15).

Dit lyk vir my God het werk bedoel as die primêre manier waarop Hy geweldig baie van ons behoeftes as mens wil bedien. Daarom vereis Hy van die begin af dat ons sal werk. "Ses dae moet jy werk, ...." (Eksodus 34:21) en, "As iemand nie wil werk nie, moet hy ook nie eet nie." (1 Tessalonisense 3:10).

As 'n mens begin nadink oor hoe uniek God elkeen van ons geskape het, dan glo ek is daar 'n unieke plek en rol in God se plan vir elkeen van ons. Elkeen van ons is immers uniek, een van 6 biljoen mense tans op aarde. En nog nooit in die geskiedenis (en in die toekoms) was of gaan daar iemand presies soos ons wees nie. Daarom glo ek, is daar 'n spesifieke plek en werk vir elkeen van ons, vir elke seisoen in ons lewe, waar ons vervulling in elke opsig van ons menswees gaan en kan beleef.

Dit is dus so noodsaaklik dat elke Christen baie gereeld, ook wat sy of haar beroep of besigheid betref, voor God moet gaan stil word oor presies wat regtig Sy hart en plan vir nou rondom jou werk of beroep is. Al is dit dan net om seker te maak of jy nog is waar jy behoort te wees en of doen wat jy behoort te doen vir hierdie seisoen in jou lewe.

Hoeveel mense strompel nie soos robotte Maandae tot Vrydae werk toe en terug, sonder enige lewensvreugde en entoesiasme, net om kos op die tafel en die balju van die deur af weg te hou nie!

O, mag God deur die werking van Sy Gees kom en ook in hierdie area van jou lewe 'n vars bries inwaai wat jou, bonatuurlik, iets sal laat ervaar van God se opwindende plan vir nou vir jou!

Nie dat alles elke dag opwinding hoef te wees nie! Daar is maar in elke werk of beroep die lekker, en die gewone, en die slegte. Maar dit hoef tog nie net oor blote oorlewing te gaan nie!

Werk het ook 'n ander belangrike funksie in ons lewens as Christene. God gebruik dit ook om ons karakter te bou. Terwyl die bouer die huis bou, bou die huis die bouer. Soveel dinge in ons persoonlikheid en lewensvaardighede word daar op die markplein verfyn en verbeter. Werk is dus nie net 'n manier waarmee geld verdien word nie. Daardeur bou God ervaringe in ons lewens in en leer Hy ons lesse wat ons op geen ander manier kon leer nie.

Die oomblik as ons begin verstaan dat my werk van Maandag tot Vrydag deel is van my voltydse bediening in diens van Koning Jesus, word alle soort beroepe gelykwaardig. En dan ontdek ons die verskeidenheid wyses en plekke waarin God Sy mense kan gebruik in die markplek. Kyk maar net na Sy mense van wie ons lees in die Bybel. Ons sien 'n Dawid wat eers gewoon skaapwagter was en dan 'n koning word. Lukas was 'n dokter. Lydia was 'n kleinhandelaar wat materiaal verkoop het. Daniël was 'n regeringsamptenaar en Paulus was 'n tentmaker. En die Here Jesus self was tydens Sy verblyf op aarde die grootste deel net 'n skrynwerker.

Maar dit is verder ook duidelik uit die Skrif dat God selfs meer direk hierby betrokke is as net dit. Dit is immers Hy wat deur Sy Gees ons toerus met natuurlike talente en gawes, en selfs met bonatuurlike gawes, om daardie werk te kan doen. Daarom lees ons in die Bybel dat God selfs aan ons ons beroepsvaardighede gee: “.... en al die ander vakmanne vir wie die Here die vaardigheid en verstand gegee het om te weet hoe om al die werk aan die heiligdom uit te voer ....” (Eksodus 36:1).

Maar God is ook die Een wat sukses in die werksomgewing aan ons gee. Dink maar net aan Josef as 'n voorbeeld van iemand wat deur God gehelp is om sukses te behaal. “Die Here was by Josef en dit het baie goed gegaan met hom. Toe Potifar, Josef se eienaar, sien dat die Here by Josef is en dat die Here alles wat Josef aanpak, laat slaag...”(Genesis 39:2-3).

Elkeen van ons is geroep om elke dag, ook by die werk, net ons beste in diens van Jesus te gee. Tog moet ons erken dat dit uiteindelik net God is wat ons werklik suksesvol maak.

Verhoging en bevordering kom dus direk uit Sy hand. Daarom bely Ps. 75:6-7: “Verheffing kom nie uit die ooste of uit die weste of uit die woestyn nie!

Nee, dit is God wat verneder of verhef, Hy is die regter!”

Dit mag dalk vir jou 'n verrassing wees, maar mense bepaal uiteindelik nie of jy bevorder gaan word of nie. Die Here beheer jou sukses en bevorderings. As jy kind van die lewende God is, het God volle verantwoordelikheid vir jou hele lewe en persoon geneem en is Hy in die detail daarvan betrokke. Jy is nie meer ander se slaaf nie. Niemand anders is meer werklik jou baas en jy blote klaas nie. Jy is kind van die lewende God en Hy is die enigste Here wat totale beheer in jou lewe het.

Hy is die Besturende Direkteur wat elke finale beslissing maak, ook rondom jou werk en toekoms. As jy dus frustrasies en probleme daar het, staan Sy permanente uitnodiging om, oor almal se koppe, dit direk met Hom te kom bespreek. Hy het immers die finale sê.

In Jesus se Naam, het jy 24 uur, 7 dae 'n week, enige tyd, dag of nag, 'n ope, staande uitnodiging om met die Koning van alle konings, oor jou lewe te kom gesels. Wat 'n bevrydende wete is dit nie!

## DAG 28 OOR HOE OM GELD VERANTWOORDELIK TE HANTEER (1)

Ons kan nie oor Christenwees in die markplek praat sonder om 'n bietjie meer in detail oor geld en 'n verantwoordelike Bybelse hantering daarvan te gesels nie.

Een van die tekste wat ons gelowiges laat memoriseer as ons gesels oor Bybelse rentmeesterskap, is daardie aangrypende vers in Spr. 22:7 wat soos volg lui: "Die ryke heers oor die arme; die lener is die slaaf van die man by wie hy leen."

As alles wat ons het aan God behoort, is dit ons verantwoordelikheid om soos 'n tipiese betroubare bankbestuurder daarmee te handel. Daarom sê Paulus in 1 Kor. 4:2: "Van 'n bestuurder word veral vereis dat hy betroubaar moet wees."

Wat sê die Bybel oor hoe ons geld oordeelkundig moet spandeer en hoe om skuld te vermy?

Ek wil prakties wees en 'n paar Bybelse beginsels uitspel wat ons besteding en God-se-bestuurders-wees gaan beïnvloed:

- Leer om vergenoeg te wees.

Die woord "vergenoegheid" kom 7 keer in die Bybel voor, en ses keer het dit met geld te doen. Hoor hoe sê Paulus daar in Fil. 4:11 tot 13: "Ek sê dit nie omdat ek gebrek ly nie, want ek het geleer om my in alle omstandighede te behelp. Ek weet wat armoede is en ek weet wat oorvloed is; van alles het ek ondervinding: om genoeg te hê om te eet sowel as om honger te ly, om oorvloed te hê sowel as om gebrek te ly. Ek is tot alles in staat deur Hom wat my krag gee."

Ons word nie tevrede gebore nie; ons moet leer om, in die lig van God se beloftes van Sy totale versorging in alles wat ons nodig het, te kies om 'n vrede te hê met wat op verskillende stadiums in ons lewe gebeur. Omdat ons glo God is totaal in beheer van ons lewe. Ja, en omdat ons glo wat Paulus daar in Fil. 4:19 sê: "En my God sal in elke behoefte van julle ryklik voorsien volgens sy wonderbaarlike rykdom in Christus Jesus."

1 Tim. 6:8 beskryf hierdie vergenoegdheid so: "As ons dan kos en klere het, moet ons daarmee tevrede wees."

Bybelse vergenoegdheid beteken dus dat ons moet soek na hierdie innerlike vrede oor die werk wat ons daaglikse doen en die finansiële situasie waarin ons tans is. En as ons nie daarmee vrede het nie, moet ons dadelik met God daarvoor gesels. Sodat Hy ons kan sê wat ons te doen staan om daardie vrede terug te kry.

Die Hebreërskrywer sê: "Hou julle lewe vry van geldgierigheid; wees tevrede met wat julle het. God self het gesê: "Ek sal jou nooit verlaat nie, jou nooit in die steek laat nie."

- 'n Tweede Bybelse beginsel is: Kies om God te vertrou dat Hy sal voorsien.

Die Here leer ons immers self in Sy Woord dat Hy presies weet wat ons nodig het voordat ons vra. Maar ons sal moet kies om te glo wat daar in Spr. 3:5-6 staan: "Vertrou volkome op die Here en moenie op jou eie insigte staat maak nie. Ken Hom in alles wat jy doen en Hy sal jou die regte pad laat loop."

Mat. 6:25 tot 34 leer ons dat as ons werklik vir onself uitgeklaar het oor hoe ons inpas in God se wil om Sy koninkryk rondom ons te laat kom, en ek en jy doen presies wat ons glo Hy wil hê ons moet doen, dan hoef ons ons nie te bekommer of daar genoeg geld gaan wees elke

maand vir kos, klere en alles at ons nodig het nie. Die lewende God wat ons dien is ook ons Hemelse Vader wat presies weet wat ons nodig het, en wat graag in al daardie dinge wil voorsien.

Ons kan Hom dus daarvoor vertrou.

As ek en jy dus presies doen wat Hy van ons begeer, kan ons Hom vertrou om die rekeninge vir wat ons nodig het, te betaal. Maar as ons doen wat ons wil doen, betaal ons ons eie rekeninge.

Volgende keer gesels ons verder.

## DAG 29 OOR HOE OM GELD VERANTWOORDELIK TE HANTEER (2)

Ek is besig om saam met jou te soek na 'n paar Bybelse beginsels wat ons kan help om ons geld en finansies met verantwoordelikheid te hanteer. Daarom wil ek die volgende Bybelse finansiële beginsel so formuleer:

- Bestuur alles waaroor God jou aangestel het met groot verantwoordelikheid

Ek gebruik doelbewus die begrip “bestuur”, want dit is een van die woorde wat God in die Bybel gebruik om ons roeping as Christen te omskryf. Luister maar net na die volgende:

- 1 Kor. 4:2 sê: “Van 'n bestuurder word veral vereis dat hy betroubaar moet wees.”
- Een of ander tyd gaan ons ook geleenthede kry om, soos die bestuurder daar in Luk. 16:2, rekenskap te gee oor hoe ons ons geld, finansies en ander besittings bestuur het. “Gee verslag van jou bestuur van sake ...”

Verantwoordelike bestuur van ons finansies, sy dit in ons persoonlike lewe of in die besigheid, het ten minste drie kante: verantwoordelike begroting, verantwoordelike besteding en verantwoordelike, en kontinue bestuur van albei hierdie prosesse met die oog op dinge wat onverwags gebeur en die toekoms.

As die Here werklik die Alleen-eienaar van alles wat ons het is, dan moet ons besef dit gaan 'n bepaalde prys in ons lewe kos. Dit gaan ten minste beteken dat ons nie daarmee kan maak wat ons wil nie, maar graag wil doen wat Hy sê. As Hy sê: Verkoop alles. Dan moet ons dit doen.

Nou weet ons, Hy sê nie vir al Sy mense om alles wat hulle het te verkoop nie. Maar die onderliggende beginsel bly vir almal van ons geld, of ons nou van die enkele is wat alles moet verkoop, of bloot gewoon goeie bestuurders moet wees van dit waaroor Hy ons aangestel het. Uiteindelik gaan dit in albei gevalle, soos Jesus daar in Luk. 14:28 sê, oor kosteberekening: “Wie van julle wat 'n gebou wil oprig, gaan nie eers sit en die koste bereken, om te sien of hy genoeg geld het om die werk te voltooi nie?”

Daarom lyk dit vir my logies dat om goeie finansiële bestuurders in die Koninkryk van God te wees, moet ons, as deel van ons verantwoordelike kosteberekening, rekening hou met 3 dinge as ons oor ons geld en finansies dink: Verpligtinge; behoeftes; en begeertes. Ek dink altyd daaraan as 3 mandjies waarin ons elke maand geld moet sit. Kom ek bespreek dit so 'n bietjie meer in detail:

### 1. Ons verpligtinge

Die eerste ding wat ons, as God se bankbestuurders, in berekening moet bring is alle skuldverpligtinge wat ons het. Onder skuld verstaan ek, waar ek in een of ander kontrak (mondelings of skriftelik) beloof het om, wat ek verskuldig is, terug te betaal.

Maar hierdie “verpligtinge”-kategorie sluit ook belasting aan die staat in, en ook dit wat ek gekies het om te gee aan geestelike leiers wat God tans gebruik om my toe te rus vir my bediening elke dag.

Die verse in die Bybel wat hier van toepassing is, is dit wat Paulus daar in Rom. 13:6 tot 8 sê: “Dit is ook waarom julle belasting betaal, want die owerhede is dienaars van God en hulle is besig om hulle opdrag uit te voer. Gee dus aan almal wat hulle toekom: belasting as dit

belasting is, aksyns as dit aksyns is, ontsag as dit ontsag is, eer as dit eer is. Julle moet niemand iets verskuldig wees nie, behalwe om mekaar lief te hê. Wie sy medemens liefhet, voer die hele wet van God uit.”

Maar ook dit wat daar in Gal. 6:6-10 staan. Ek haal net verse 6 hier aan: “Iemand wat onderrig ontvang in die woord van God, moet sy leermeester laat deel in al die goeie dinge wat hy het.”

## 2. Ons behoeftes

Verder moet enige verantwoordelike begroting rekening hou met alles wat ek en my familie, of besigheid, werklik nodig het. Hier gaan dit dus oor werklike behoeftes. En dan dink ons in 'n praktiese huishouding aan dinge soos kos, klere, water, elektrisiteit, telefoonkoste, brandstof, ens.

Dit is daardie dinge waarvan Paulus praat as hy daar in 2 Tess. 3:10 tot 12 sê: “Toe ons nog by julle was, het ons vir julle uitdruklik gesê: “As iemand nie wil werk nie, moet hy ook nie eet nie. Ons sê dit omdat ons verneem dat daar mense by julle is wat leeglê, wat self nie werk nie en hulle net met ander se sake bemoei. Sulke mense beveel en gebied ons op gesag van die Here Jesus Christus dat hulle hulle aandag by hulle werk moet bepaal en hulle eie brood verdien.”

Maar ook dit wat Paulus daar in 1Tim 5:8 sê: “As iemand nie vir sy eie mense en veral nie vir sy huisgesin sorg nie, het hy die geloof verloën en is hy slegter as 'n ongelowige.”

## 3. Ons begeertes

Ek glo dat enige vorm van Bybelse begroting ook in geloof moet beplan vir daardie dinge wat ons oortuig is deel is van God se hart vir ons vir die toekoms. Dit is vir my aangrypend dat daar in Ps. 37:3 en 4 die volgende staan: “Vertrou liever op die Here en doen wat goed is, woon en werk rustig voort. Vind jou vreugde in die Here, en Hy sal jou gee wat jou hart begeer.”

Ek is oortuig dat daar begeertes in ons elkeen se hart is wat God deur die werking van Sy Gees in ons hart gelê het. Ook daarvoor kan ons God vertrou. Daarom is dit net verantwoordelik om ook vir hierdie dinge te begin begroot en te beplan vir die toekoms, as deel van ons verantwoordelike Bybelse bestuur van ons finansies.

## DAG 30 OOR HOE OM GELD VERANTWOORDELIK TE HANTEER (3)

Ons kan eenvoudig nie gesels oor hoe God wil hê Christene moet geld hanteer, sonder om oor skuld te gesels nie. Daarom wil ek graag as 'n verdere Bybelse beginsel die volgende formuleer:

- Vermy skuld sover moontlik

Ek hoef nie vir jou te vertel hoe maklik dit deesdae is om skuld te maak nie. Leningaanbiedinge, ekstra kredietkaarte, noem maar op, maak dit vir sovele mense so maklik om te veel skuld te maak. Dink maar net aan die rol van die advertensiewese om heelyd vir mense aan te moedig om iets beters, iets meer modern en anders te koop.

Daarom wil ek graag vir jou dit aanhaal wat die Here deur die Spreukeskrywer vir ons leer daar in Spreuke 3:5 tot 10: "Vertrou volkome op die Here en moenie op jou eie insigte staat maak nie. Ken Hom in alles wat jy doen en Hy sal jou die regte pad laat loop. Moenie dink jy het die wysheid in pag nie, dien die Here en vermy wat sleg is: dit is die geneesmiddel vir jou, die verkwikking vir jou liggaam. Vereer die Here met offerandes uit al wat jy besit en met die beste uit jou oes, dan sal jou skure oorvol wees en jou parskupe oorloop van die wyn."

Hier staan sovele Goddelike riglyne in hierdie verse wat jou en my werklik kan beskerm teen onverantwoordelike geld-uitgee. Kom ek noem so 'n paar van hulle op:

1. Voor jy waag om skuld te maak, gaan vra die Here wat Sy hart daarvoor is.

Dit geld vir alles wat jy wil aankoop. Veral daardie aankope waarvoor jy nie werklik begroot het saam met jou huweliksmaat (as jy getroud is) in Sy teenwoordigheid nie. En nou praat ek van daardie gereedskap, apparaat of voertuie wat jy dink allernoodsaaklikste is vir jou besigheid of boerdery, tot by daardie kledingstuk of paar skoene wat nou "op uitverkoop is".

2. Om God se raad en leiding te volg, is altyd die beste, ook vir jou algemene gesondheidstoestand!

As jy my nie wil glo nie, gaan gesels 'n bietjie met mense wat groot skuld het. En laat hulle jou vertel van al die nagte wat hulle nie kan slaap nie, die angs, die maagsere en die spanning wat dit in 'n mens se lewe meebring.

3. Kies doelbewus vir 'n eenvoudige, dankbare lewe voor die Here.

Dit is vir my so aangrypend om werklik welgestelde Christenmense te ontmoet wat doelbewus gekies het om 'n eenvoudige, dankbare lewe te leef. Jy sien dit in die huis waarin hulle bly, in hulle meubels en in die motor wat hulle ry.

So anders as sovele ander van ons wat net heelyd groter, beter en meer modern wil hê. En wat dan soveel onnodige finansiële druk plaas op hulself en hulle gesinne, om nie eers te praat van al die ekstra tyd en energie wat sulke besluite uiteindelik in beslag neem en gevolglik hulle verhouding met die Here en met hulle geliefdes in die proses laat skade ly nie.

En dit terwyl God ons aanmoedig om 'n stil, eenvoudige lewe te lei. "Laat dit vir julle 'n saak van eer wees om rustig te lewe, julle met julle eie sake besig te hou en self in julle lewensonderhoud te voorsien, soos ons dit aan julle voorgelê het. Dan sal julle eerbare leefwyse die agting van die mense buite die gemeente afdwing, en julle sal van niemand afhanklik wees nie." (1 Tessalonisense 4:11-12).

#### 4. Leer die dissipline van gereeld-gee aan

Dit is vir my aangrypend om in hierdie gedeelte in Spreuke te sien hoe die Here Sy mense aanmoedig om telkens hulle totale afhanklikheid van Hom en Sy versorging, maar ook hulle dankbaarheid vir dit wat Hy reeds aan hulle uit Sy groot genade gegee het, op 'n baie konkrete manier baie gereeld teenoor Hom en ander gelowiges te bely.

Sy dit deur ons mondelinge getuienisse, maar veral deur ons dankoffers elke keer as ons uit God se hand iets ontvang.

Daarom is een van die kosbaarste dissiplines wat God se mense kan aanleer in ons lewe, om elke keer as God vir ons gee, 'n deel daarvan weg te gee

- Vir Sy saak: deur dit te gee vir mense wat voltyds Sy mense toerus en bedien sodat hulle weer ander in Sy Naam kan bedien. Sodat die apostels, herders, leraars, evangeliste en profete, dus, wat God se mense moet toerus vir hulle bediening, genoeg kan hê om van te lewe.
- Maar dan ook vir ander in nood in die gemeente (Rom. 12:13). Kyk maar net hoe die vroeë gemeentes daar in Handeling in mekaar se behoeftes voorsien het. Hoe sê Paulus daar in 2 Kor. 8:13 tot 15: "Ek bedoel nie dat julle gebrek moet ly om ander te kan help nie; maar sodat daar ewewig sal wees, moet julle wat nou oorvloed het, dié help wat gebrek ly. Dan, as hulle weer oorvloed het en julle gebrek ly, kan hulle julle weer help. So kom daar ewewig. Daar staan ook geskrywe: "Dié met baie, het nie te veel gehad nie, en dié met 'n bietjie, nie te min nie."
- En dan ook vir ander noodsituasies in die samelewing en in ongelowiges se lewens waar God vir ons wys om te gee.

Maar ek skryf later meer hieroor.



## DAG 31 OOR HOE OM GELD VERANTWOORDELIK TE HANTEER (4)

Ons het verlede keer oor skuld begin praat en vir mekaar aangetoon dat God ons ontmoedig om skuld te maak.

Dit is reeds uit die Ou Testament duidelik dat om nie skuld te hê nie een van God se belonings vir gehoorsaamheid is. Hoor net hoe sê Deut. 28:1-2 en vers 12 dit: "As jy goed luister na die Here jou God en jy gehoorsaam al sy gebooie wat ek jou vandag gee, en jy lewe daarvolgens, sal die Here jou God jou oor al die nasies van die aarde stel. As jy luister na die Here jou God, sal al hierdie seëninge oor jou kom.... Dan sal jy aan baie nasies kan leen, maar self sal jy nie hoef te leen nie."

Skuld word selfs geteken as 'n vloek: "As jy nie luister na die Here jou God nie ..... sal al hierdie strawwe oor jou kom en jou tref: Die vreemdeling wat by jou woon, sal meer en meer kry, ..... Hy sal aan jou leen, jy sal nie aan hom leen nie." (Deut. 28:15, 43 en 44)

Waarom is skuld-maak dan so gevaarlik vir Christen-gelowiges?

Omdat die mens wat skuld maak sekere voorveronderstellings maak oor die toekoms. So 'n mens aanvaar eenvoudig dat ons in die toekoms genoeg gaan verdien om daardie skuld af te betaal.

Wat dit nog meer gewaagd maak is as jy uit eie goeddunke en inisiatief gehandel het, sonder om God te raadpleeg. Luister net wat sê Jakobus 4:13 tot 15 hieroor: "Kom nou, julle wat sê: "Vandag of môre sal ons na dié en dié stad toe gaan en 'n jaar lank daar bly; ons sal sake doen en geld maak." Julle wat nie eers weet hoe julle lewe môre sal wees nie! Julle moet eerder sê: "As die Here wil, sal ons lewe en sal ons dit of dat doen."

Vra maar elke mens wat op een of ander stadium in sy of haar lewe skuld-vry gekom het, watter seën dit is! Vir die eerste keer is jy werklik vry om finansieel te kan doen wat Christus, jou Here, vir jou aansê om te doen. Voor daardie tyd moes jy altyd rekening hou met 'n "skuld-draak" wat êrens oop-bek staan en wag om eerste gevoed te word as daar enige geld ingekom het!

Waarom maak Christene dan so maklik skuld?

- Omdat hulle nooit na hulle bekering geleer is om geld op God se manier te hanteer nie.
- Soveel van ons koop bloot impulsief omdat hulle nie die heerlike dissipline van 'n geskrewe begroting en finansiële plan het wat hulle teen enige oorbesteding kan beskerm nie.
- Sovele van ons het nog nie klaar gemaak met emosionele pyn en seer, en ou-natuur-gewoontes van voor ons bekering, wat selfs kan lei tot onnodige geld-uitgeëry nie.
- Soms gebeur die onverwagte en moet mense skuld maak om die onkoste te dek, omdat daar nie vooraf voorsiening gemaak is ook vir die onverwagte nie.

Maar hoe nou gemaak as ek skuld het?

- Gaan raak stil voor God. Kies om Hom voortaan te vertrou en te gehoorsaam in jou finansies. En vertrou Hom vir 'n plan om daarmee verantwoordelik te begin handel. Onthou, jou God is dieselfde God wat daardie weduwee in 2 Konings 4:1-7 gehelp

het met haar skuld. Sy het die gevaar geloop om selfs haar kinders te verloor as gevolg van skuld! Elisa, die profeet, sê toe vir haar om leë kanne by haar bure te leen. Dan lees ons hoe die Here haar enigste besitting, 'n bietjie olie, wonderbaarlik vermeerder, sodat sy al die kanne wat sy in die hande gekry het, kon vul. Hierdie olie het sy gaan verkoop, haar skuld betaal en selfs genoeg oorgehad vir die toekoms. Dieselfde Here wat vir die weduwee voorsien het, wil ook ons help om vry te kom van skuld.

- As jy dit nog nie gedoen het nie, gaan sit voor die Here en skep vir jou 'n geskrewe begroting as deel van jou verantwoordelikheid as rentmeester van God. Sodat jy presies kan weet wat jou inkomste is, maar ook presies wat jou normale uitgawes is. Soms moet ons ook doelbewus beplan om van ons uitgawes te verlaag om so van ons skuld vry te kom.
- Maak dan 'n lys van al jou skuld, van die grootste na die kleinste bedrag. En vertrou die Here vir 'n plan hoe om dit te begin afbetaal.
- Verkoop wat jy kan, en gebruik die ekstra geld om van die skuld af te betaal.
- Begin jou skuld gedissiplineerd en gelowig, so vinnig moontlik, af te betaal. Begin by die kleinste bedrag en betaal elke maand 'n ekstra bedrag daarop totdat dit ten volle afbetaal is. Hou so aan totdat al jou skuld betaal is. Spreuke 3:27 en 28 sê immers: "Moenie 'n weldaad weerhou van iemand aan wie dit toekom, terwyl dit in jou mag is om dit te bewys nie. Moenie vir iemand sê: "Gaan eers terug en kom môre weer, dan help ek jou," as jy nou reeds kan help nie."
- Moet natuurlik nie weer skuld maak nie.
- Oorweeg dit om dalk 'n ekstra kanaal vir ekstra inkomste te skep onder God se leiding.

As jy nie weet hoe nie, wees altyd bereid om raad van ander volwasse gelowiges te vra voordat jy belangrike finansiële besluite neem. "Luister na raad, aanvaar wat jou geleer word, sodat jy uiteindelik wysheid kan hê." (Spreuke 19:20).

In Rom. 13:8 staan: "Julle moet niemand iets verskuldig wees nie ..." Die rede waarom die Here wil hê dat ons vry moet wees van skuld is omdat "die lener ... die slaaf van die man by wie hy leen ..." is (Spreuke 22:7). Die ander rede waarom die Here wil hê dat ons vry moet wees, is om Hom te dien, deur in staat te wees om nou in vryheid te gee as Hy sê ons moet gee. Maar daaroor gesels ek volgende keer verder.

## DAG 32 OOR HOE OM GELD VERANTWOORDELIK TE HANTEER (5)

Is jy vry genoeg om te kan gee as God sê jy moet gee?

Luister wat staan daar in Hand. 20:35: "Onthou die woorde van die Here Jesus. Hy het self gesê: 'Om te gee, maak 'n mens gelukkiger as om te ontvang'".

Om te gee lei tot meer seën in die lewe van die gewer as wat dit op die oog-af lyk. Ek sien uit die Skrif dat die gewer op ten minste vier maniere bevoordeel word as hy of sy gee:

1. Wanneer ons Bybels op die regte manier gee, gee ons eintlik vir Christus, en nie in die eerste plek vir die spesifieke mens vir wie ek fisies gee nie. Dit help ons dus om ons fokus reg te kry.

Ek glo 'n mens se hele wyse van gee verander as ons begin verstaan dat ons eintlik elke keer as ons gee, eintlik vir Jesus Christus gee. Hy is eintlik elke keer die direkte Ontvanger van elke gawe wat ons uitdeel.

Dit is mos wat Jesus sê daar in Mat. 25:34 as Hy die volgende sê: "Dit verseker Ek julle: Vir sover julle dit aan een van die geringste van hierdie broers van My gedoen het, het julle dit aan My gedoen."

Ons diepste begeerte is immers om in alles wat ons doen, Hom te dien, en daarom, ook deur ons gee, Hom ook so te aanbid omdat Hy ons Verlosser en getroue Voorsiener is.

2. Daar gebeur iets in ons as ons gee. Behalwe dat om te gee die houvas van goed en geld in ons lewe breek, ontwikkel gee ons om meer aan die karakter en beeld van Christus gelyk te word. Waar ons eens van nature selfsugtig was en alles net om ons self en ons eie mense gedraai het, help gee ons om uit te breek uit hierdie tronk van selfsug en om meer te word soos Jesus wie se karakter juis dié is van Gewer en Dienaar.

3. Dit help ons om skatte in die hemel bymekaar te maak. Ons lees immers daar in Mat 6:20: "Maak vir julle skatte in die hemel bymekaar, waar mot en roes dit nie verniel nie en waar die we nie inbreek en dit steel nie." Ons het dus elkeen as't ware 'n bankrekening in die hemel, waarin ons vir die ewigheid kan belê. Daarom kan Paulus daar in Filippense 4:17 sê: "Dit gaan vir my egter nie om die gawe nie, maar om die vrug daarvan: daardeur word julle self ryker."

4. Alhoewel die Bybel dit nie laat voorop staan - en dit nie ook ons motivering moet wees waarom ons gee nie - kan gee vir die gewer materiële voorspoed meebring. Luister byvoorbeeld na Spreuke 11:24 en 25 in die verband: "Daar is mense wat vrylik uitdeel en tog steeds meer het, daar is ander wat suinig is en tog arm word. Wie 'n ander voorspoed gun, sal self oorvloed hê. Wie die dors van ander les, sal self genoeg kry as hy dors is."

Dit word ook daar in 2 Kor. 9:6 tot 11 bevestig: "Dink daaraan: wie karig saai, sal karig oes; en wie volop saai, sal volop oes ... En God is by magte om aan julle alles in oorvloed te skenk, sodat julle in alle opsigte altyd van alles genoeg kan hê en volop kan bydra vir elke goeie werk. Daar staan ook geskrywe: 'Hy deel uit en gee aan die armes; hy bly altyd vrygewig.' God wat saad verskaf om te saai en brood om te eet, sal ook aan julle saad gee en dit laat groei en julle vrygewigheid 'n ryk oes laat oplewer. Hy maak julle altyd in alles ryk genoeg om by elke geleentheid vrygewig te kan wees."

Dit is vir my so aangrypend dat God vir die vrygewige gewer nog selfs meer wil gee! Nie net om in sy eie behoeftes so te voorsien nie, maar om, terselfdertyd, in staat te wees om nog meer te kan weggee waar dit nodig is.

Daarom word ons dwarsdeur die Bybel aangemoedig om vrygewig te wees. Om die waarheid te sê, daar is meer teksverse wat met gee verband hou as met enige aspek wat te doen het met geld.

Kom ek vat saam wat die Bybel oor ons gesindheid sê as ons gee:

- Ons moet uit die regte gesindheid gee

Ons het al soveel kere vir mekaar gesê: God kyk na ons hart. Vir Hom gaan dit eerstens oor ons gesindheid. Daarom sê Jesus daar in Matteus 23:23 vir die geestelike leiers van destyds: "Ellende wag vir julle, skrifgeleerdes en Fariseërs, huigelaars! Julle gee tiendes van kruisement, anys en koljander, maar wat volgens die wet van God die swaarste weeg, laat julle na: geregtigheid, barmhartigheid en betroubaarheid. Juis hierdie dinge moet 'n mens doen en die ander nie nalaat nie."

Gee dus, omdat jy liefhet. In 1 Kor. 13:3 staan daar: "Al deel ek al wat ek het aan ander uit ... maar ek het geen liefde nie, baat dit my niks".

- Gee met dankbaarheid en blymoedig

G'n wonder 2 Kor. 9:7 leer ons: "Elkeen moet gee soos hy hom in sy hart voorgeneem het, nie met teensin of uit dwang nie, want God het die blymoedige gewer lief."

Die woord wat in Afrikaans met "teensin" vertaal is, kan ook met hartseer, verdriet of geïrriteerdheid vertaal word.

Blymoedigheid getuig van 'n ander gesindheid. Ek glo dit is die vrug van 'n stuk dankbaarheid teenoor God vir Sy besondere genadige versorging in ons eie lewe.

Maar ook vir die voorreg om weer, op ons beurt, deur God gebruik te word om ander te kan help in Sy Naam en in Sy diens as ons Verlosser en Here.

Watter voorreg is dit nie om ook deur ons gee te kan getuig met dankbaarheid oor die wonderlike God wat ons so versorg dat ons in staat is om te kan gee nie!

## DAG 33 OOR HOE OM GELD VERANTWOORDELIK TE HANTEER (6)

Baie mense dink verkeerdelik dat die God van die Bybel iets teen geld as sulks het. Maar dit is nie waar nie. God het niks daarteen dat iemand baie geld het nie. Waarteen God in die Bybel Christene waarsku is die mag wat 'n liefde vir geld, of geldgierigheid, in 'n gelowige se lewe kan hê.

Hoor hoe staan dit daar in 1Tim. 6:10: "Geldgierigheid is 'n wortel van allerlei kwaad. Party het geld nagejaag en toe van die geloof afgedwaal; daardeur het hulle hulleself baie ellende op die hals gehaal."

God se "teenmiddel" hierteen, wat die Christengelowige letterlik kan verlos of vrymaak hiervan, is as Hy ons, deur die werking van Sy Gees, leer om onbevange weg te gee. Soos Hy jou beveel. Van dit wat Hy vir jou gee. En vir wie Hy jou aansê om te gee.

Kom ek wys vir jou 'n bietjie van die dinge wat die Bybel oor gee sê:

1. Ons gee heel eerste en in die eerste plek aan God. Wanneer en wat ons ookal aan wie ook al gee, omdat ons oortuig is God vra dit van ons, gee ons inderwaarheid aan God. 'n Gehoorsame gee soos God ons vra, is deel van ons aanbidding en vertroue in God en uit dankbaarheid vir Sy getroue versorging in ons lewe. Soos daar byvoorbeeld in Spreuke 3:9 staan: "Vereer die Here met offerandes uit al wat jy besit en met die beste uit jou oes". God het nie ons geld nodig nie. Maar ons het nodig om te gee.

2. Dit gaan in hierdie gee nie in die eerste plek oor hoeveel of wat jy weggee nie, maar oor wat in jou hart aangaan as jy gee. Daarom beklemtoon God dwarsdeur die Nuwe Testament dat ook ons gee 'n uiting moet wees van ons liefde: ons liefde vir God en ons liefde vir ons medemens. Ons gee omdat ons nie anders kan nie. Omdat ons God liefhet met alles wat ons het, en ons naaste soos onself, deur die werking van God se Gees in en deur ons. (Kyk maar gerus wat staan in gedeeltes soos Joh. 13:34,35; Rom. 13:8; 2 Kor. 8 en 9; Jak. 2; 1 Joh. 3, 4 en 5.) Dit is waarom Paulus daar in 2 Kor. 9:7 die volgende skrywe: "Elkeen moet gee soos hy hom in sy hart voorgeneem het, nie met teensin of uit dwang nie, want God het die blymoedige gewer lief."

3. As ons verstaan dat alles wat ons het, en alles wat ons ontvang het, alles aan dié God behoort - wat ons lewe gered het in Christus Jesus - en dat ons gee maar net nog 'n manier is om Hom lief te hê, kan 'n mens verstaan waarom die Nuwe Testament glad nie 'n ding daarvan maak oor hoeveel ons eintlik as Christene moet gee nie.

Waar die Ou Testamentiese gelowige duidelike, direkte reëls gehad het wat gemaak het dat hy tot 33% van alles wat hy gehad en ontvang het, as tiendes, offerandes van allerlei aard, en as belasting laat gee het, is die enigste vers wat iets hieroor sê in die Nuwe Testament, Mat. 23:23 Daar sê Jesus vir die Fariseërs en ander Joodse wetsgeleerdes die volgende: "Ellende wag vir julle, skrifgeleerdes en Fariseërs, huigelaars! Julle gee tiendes van kruisement, anys en koljander, maar wat volgens die wet van God die swaarste weeg, laat julle na: geregtigheid, barmhartigheid en betroubaarheid. Juis hierdie dinge moet 'n mens doen en die ander nie nalaat nie." (Nou nie eintlik 'n goeie vers om 'n wettiese tiende teenoor Nuwe Testamentiese Christene mee te bewys nie!)

As ek persoonlik mag wees, wil ek getuig dat ek en my gesin jare gelede vir onself uitgemaak om vrywillig, as teken van ons vertroue in God se totale versorging in ons eie lewe,

as teken van ons liefde vir Hom as ons God, en uit dankbaarheid vir alles wat Hy in ons gelewe gedoen het, ten minste tien persent van ons inkomste, wanneer en hoeveel ook al inkom, weg te gee. Maar nie sommer vir enigiemand nie. Soos en hoe God ons oortuig om te gee.

2 Kor. 8:7 bly vir my 'n wonderlike riglyn hierin: "Aangesien julle alles in oorvloed het: geloof, die gawe om julle woord te doen, kennis van God, onbeperkte ywer en ons liefde vir julle, wees dan ook in hierdie liefdeswerk oorvloedig."

Asook 2 Kor. 8:12 tot 15 wat soos volg lui: "As die goeie wil daar is en iemand gee volgens wat hy het, neem God die gawe aan. Hy verwag nie van hom wat hy nie het nie. Ek bedoel nie dat julle gebrek moet ly om ander te kan help nie; maar sodat daar ewewig sal wees, moet julle wat nou oorvloed het, dié help wat gebrek ly. Dan, as hulle weer oorvloed het en julle gebrek ly, kan hulle julle weer help. So kom daar ewewig."

Die laaste gedeelte wat vir ons in die verband baie riglyne gee, is dit wat daar in 2 Kor. 9:6 tot 11a staan: "Daar staan ook geskrywe: Dink daaraan: wie karig saai, sal karig oes; en wie volop saai, sal volop oes. Elkeen moet gee soos hy hom in sy hart voorgeneem het, nie met teensin of uit dwang nie, want God het die blymoedige gewer lief. En God is by magte om aan julle alles in oorvloed te skenk, sodat julle in alle opsigte altyd van alles genoeg kan hê en volop kan bydra vir elke goeie werk. Daar staan ook geskrywe: "Hy deel uit en gee aan die armes; hy bly altyd vrygewig." God wat saad verskaf om te saai en brood om te eet, sal ook aan julle saad gee en dit laat groei en julle vrygewigheid 'n ryk oes laat oplewer. Hy maak julle altyd in alles ryk genoeg om by elke geleentheid vrygewig te kan wees. Dié met baie, het nie te veel gehad nie, en dié met 'n bietjie, nie te min nie."

Volgende keer gesels ek oor die vraag: aan wie gee ons dan as ons gee?

## DAG 34 OOR HOE OM GELD VERANTWOORDELIK TE HANTEER (7)

Kom ek probeer die vraag beantwoord: Aan wie moet ons, as Christene, volgens die Bybel, gee?

Die Here moedig Sy mense om vir twee groepe mense te gee, naamlik

- aan mense wat God opdrag gegee het om (a) voltyds Sy mense toe te rus vir bediening, en ook aan dié wat (b) voltyds onder ongelowiges werk - en hulle dus nie tyd het om nog ander werk te doen om so self vir hulle en hulle gesinne finansiëel te sorg nie
- en aan armes - d w s mense met 'n spesifieke nood waarin hulle self nie kan voorsien nie

1. Die beginsel in die Skrif is om eerstens te gee aan die mense wat die Here gebruik om jou geestelik te bedien en toe te rus vir jou bediening.

In die Ou Testament was dit so, en so geld dit ook in die Nuwe Testament. So lees ons hoe God Sy mense daar in die Ou Testament beveel om die priesters te onderhou. "Vir die dienswerk wat die Leviëte ... verrig, gee Ek aan hulle as hulle besitting al die tiendes wat die Israëliëte as offergawes bring." (Numeri 18:21).

Net so lees ons in die Nuwe Testament, byvoorbeeld, die volgende: "Die ouderlinge wat goeie leiding gee, behoort dubbele erkenning te kry, veral dié wat hard werk deur te preek en onderrig te gee" (1 Timoteus 5:17).

En: "So het die Here ook bepaal dat dié wat die evangelie verkondig, hulle lewensonderhoud uit die verkondiging van die evangelie moet ontvang." (1 Korintiërs 9:14).

Asook: "Iemand wat onderrig ontvang in die woord van God, moet sy leermeester laat deel in al die goeie dinge wat hy het." (Galasiërs 6:6).

Gee dus daar in jou plaaslike gemeente, of waar die Here van Sy mense gebruik om jou te bedien.

2. Gee dan verder aan ander mense wat elders voltyds besig is om God se mense, en ongelowiges te bedien, en dus nie self ander werk kan doen om in hulle eie finansiële behoeftes te voorsien nie.

3. Gee aan die armes en daar waar mense nood het.

Daar is sovele verse in die Skrif waar die Here vir Sy mense sê Hy wil hulle gebruik as Sy kanale om ander mense met nood te bedien.

Neem nou maar die bekende verse daar in Mat. 25:34 tot 45 waar die volgende staan: "Dan sal die Koning ... sê 'Ek was honger, en julle het My iets gegee om te eet; Ek was dors, en julle het My iets gegee om te drink' ... Dan sal dié wat die wil van God gedoen het, Hom vra: 'Here, wanneer het ons U honger gesien en U gevoed, of dors en U iets gegee om te drink?' ... En die Koning sal hulle antwoord: 'Dit verseker Ek julle: Vir sover julle dit aan een van die geringste van hierdie broers van My gedoen het, het julle dit aan My gedoen.' Dan sal die Koning vir dié aan sy linkerkant sê: 'Gaan weg van My af, julle vervloektes! Gaan na die ewige vuur ... want Ek was honger, en julle het My niks gegee om te eet nie; Ek was dors, en

julle het My niks gegee om te drink nie ... Vir sover julle dit aan een van hierdie geringstes nie gedoen het nie, het julle dit aan My ook nie gedoen nie.”

Die Here Jesus, wat ons dien, vereenselwig Hom mos op 'n besondere manier met mense in nood. Wat dus beteken dat, as ons hulle bedien, ons eintlik Hom bedien!

Luister net wat staan daar in Spr. 19:17: “Wie hom oor 'n arm mens ontferm, gee 'n lening aan die Here, en Hy sal hom ten volle vergoed.”

God se riglyne aan Sy mense in dié verband is dan ook dat ons, in die eerste, plek moet fokus op die armes in die geloofs familie van gelowiges, en dan op dié wat nog deel is van die ongelowige wêreld daarbuite.

So staan daar, byvoorbeeld, in Gal. 2:10: "Al wat hulle [die apostels] gevra het, is dat ons nie die armes onder hulle moet vergeet nie. Ek [Paulus] het my dan ook steeds vir hierdie liefdesdiens beywer.”

Ef. 4:28 sê daarom ook: “As iemand 'n dief is, moet hy ophou steel; hy moet deur harde werk op 'n eerbare manier self in sy lewensonderhoud voorsien; dan sal hy iets hê om vir die armes te gee.”

Jakobus gaan selfs verder as hy sê dat die feit dat ons geloof in Christus Jesus het, en een van Sy volgelinge is, met Sy Gees in ons, word juis bewys as ons prakties die nood van God se mense in ons geloofs families daar rondom ons bedien. Hoor hoe sterk sê hy dit: “Wat help dit, my broers, as iemand beweert dat hy glo, maar sy daade bevestig dit nie? Kan so 'n geloof 'n mens red? Sê nou daar is 'n broer of 'n suster wat nie klere het nie en dag vir dag honger ly, en sê nou een van julle sou vir hulle sê: "Mag dit met julle goed gaan; gaan trek julle warm aan en eet genoeg," maar julle gee nie vir hulle wat hulle nodig het om van te lewe nie, wat help dit dan? So gaan dit ook met die geloof: as dit nie tot daade oorgaan nie, is dit sonder meer dood.”

As 'n mens se oë oopgaan vir die eenheid van die Liggaam van Jesus, is een van die eerste dinge wat 'n mens raaksien, die geweldige armoede onder soveel van God se mense. Miskien nie daar in jou geloofs familie nie, maar in ander woonbuurte, in ander dorpe en stede in jou eie land en in ander lande.

Mag God ons sensitief maak vir waar Hy ons, as Sy bankbestuurders, wil gebruik om, met Sy eiendom, mense om ons te bedien. Sodat hulle werklik God se liefde en genade sal proe.



## DAG 35 OOR HOE OM GELD VERANTWOORDELIK TE HANTEER (8)

Kom ek gesels oor wat die Bybel oor “spaar” sê vir gelowiges.

Baie mense spaar nie omdat hulle vir jou sal sê hulle het niks aan die einde van die maand oor om te spaar nie. Ander Christene voel weer dat God nie daarvan hou as ons spaar nie.

Tog moedig God in die Woord Sy mense aan om te spaar. Om so voorsiening te maak vir toekomstige behoeftes en gebeure. So lees ons in Genesis 41 hoe God vir Josef gelei het om gedurende die sewe jare van oorvloed genoeg vir die hele Egipte en omliggende lande te spaar, sodat daar genoeg kon wees om van te leef gedurende die sewe maer jare.

In Prediker 3:6 lees ons van “... ‘n tyd om aan te skaf, ‘n tyd om te laat wegraak, ‘n tyd om te spaar, ‘n tyd om weg te gooi ...”

Lyk vir my, in die lig van wat ons reeds met mekaar gedeel het, mag God se mense net spaar as hulle reeds gegee het. Want, onthou jy, God kyk in die eerste plek na wat in ons hart aan die gang is, en of ons hartsbegeerte is om presies te doen wat Hy van ons verlang. En, het ons reeds vir mekaar gesê, wat Hy verlang van Sy mense is om van dit wat Hy hulle gee weg te gee. En eers dan kan hulle spaar van wat oor is.

Daarom bly die gelykenis wat Jesus hieroor vertel het insiggewend. Hy vertel: “‘n Ryk man se grond het goed gedra. Hy het toe by homself gedink: wat moet ek doen? Ek het nie plek waar ek my oes kan opgaan nie. Toe besluit hy: dit sal ek doen: Ek sal my skure afbreek en groter bou. Daarin sal ek al my graan en my ander goed opgaan. Dan sal ek vir myself sê: ‘Mens, jy het baie goed wat weggesit is vir baie jare. Hou op met werk: eet, drink en leef lekker.’ Maar God het vir hom gesê: ‘Jou dwaas. Vannag nog sal jou lewe van jou opgeëis word ... So gaan dit met hom wat vir homself skatte vergader en nie ryk is by God nie ... Waar julle skat is, daar sal julle hart ook wees.” (Lukas 12:16-21, 34)

God noem die ryk man ‘n dwaas omdat hy al sy goed gespaar het en nie ook vrygewig was nie. Want sy hart was nie ingestel om God en Sy wil vir sy lewe te gehoorsaam nie.

Die basiese reël as jy effektief wil spaar, is om minder te spandeer as wat jy verdien, en om dan van dit wat oorbly, gereeld te spaar. So sê Spreuke 21:5: “Wat hardwerkende mense beplan, is nuttig, maar elkeen wat oorhaastig is, stuur af op gebrek.”

Jy hoef dus nie baie geld te verdien nie, maar moet net jouself dissiplineer om gereeld te spaar. Soos die miere. “Gaan kyk na die mier, luiaard, kyk hoe hy werk, en leer by hom. Hy het nie ‘n leier nie, nie ‘n opsigter of ‘n regeerder nie, tog maak hy sy kosvoorraad reg in die somer, versamel hy sy voedsel in die oestyd.” (Spreuke 6:6-8).

Begin spaar dus wat jy kan, om so ‘n reserwe op te bou vir die dag van môre.

Hoeveel behoort ek te spaar? In die Bybel is daar net een voorbeeld wat vir ons ‘n bedrag van een of ander aard aandui. En dit is weer in die verhaal van Josef, wat jaarliks 20 persent gespaar het gedurende die sewe jare van oorvloed, sodat daar genoeg kon wees vir die maer jare (Gen. 41:34).

Die meeste Christelike finansiële raadgewers meen dat dit verstandig is om ten minste 10 persent van jou inkomste te spaar.

Dan sal Spreuke 21:20 ook waar wees in jou geval: "In die woning van 'n wyse mens is daar altyd kosbare besittings en olie; 'n dwase mens bring sy goed deur."

## DAG 36 LAAT ONS BEKEND STAAN AS ONKREUKBARE MENSE (9)

Die oomblik as 'n mens met geld te make het, of dit nou min geld of baie geld is, moet jy besluit of jy eerlik gaan wees of nie.

Vertel 'n mens vir die kassier wanneer jy te veel kleingeld ontvang het? Vertel jy dat die motor wat jy wil verkoop, olie lek? Veral as dit lyk asof niemand anders dit in die besigheidswêreld doen nie.

Kom ons wees eerlik: Daar kan nie 'n oomblik by ons twyfel wees oor die feit dat die God van die Bybel begeer dat Sy mense onder alle omstandighede volkome eerlik sal wees nie.

Luister maar net na hierdie paar verse: "Die Here het 'n afsku van leuenaars; Hy hou van betroubare mense." (Spreuke 12:22). "Julle mag nie steel nie en julle mag nie lieg of mekaar bedrieg nie." (Levitikus 19:11). "Noudat julle die valsheid afgelê het, moet julle onder mekaar die waarheid praat, want ons is lede van dieselfde liggaam ... As iemand 'n dief is, moet hy ophou steel; hy moet deur harde werk op 'n eerbare manier self in sy lewensonderhoud voorsien; dan sal hy iets hê om vir die armes te gee." (Efesiërs 4:25, 28).

'n Mens verstom jou dan om te ontdek hoeveel Christene is daar wat in die sakewêreld en in hulle persoonlike lewe dink dat, solank hulle skelm genoeg is om nie uitgang te word, hulle weg kan kom met moord.

Terwyl ons almal weet dat die God wat ons dien 'n God van waarheid is. "Ek is ... die waarheid." (Johannes 14:6). En daarom eis Hy dat Sy mense iets van Sy karakter, en karaktereenskappe, ook in hulle lewe sal vertoon: "Soos Hy ... heilig is, moet julle ook ... heilig wees. Daar staan immers geskrywe: "Wees heilig, want Ek is heilig." (1 Petrus 1:15-16).

Kan ek jou 'n slag in die oë kyk en vra: Is jy tot in die kleinste besonderheid in jou lewe en besigheid eerlik? En indien nie, wil jy nie dit bely en God vra wat jy moet doen om dit heeltemal te verander nie?

Elke keer as ek en jy kies om oneerlik te wees in wat ons sê of doen, maak ons 'n deur of venster vir die vyand oop om verwoesting en kwaad te kom saai. Hy staan immers van die begin af bekend as 'n moordenaar en 'n leenaar. "En hy staan nie aan die kant van die waarheid nie, omdat daar geen waarheid in hom is nie. Wanneer hy leuentaal praat, is dit volgens sy aard, want hy is 'n leenaar en die vader van die leuen." (Joh. 8:44)

Kies jy vir leuens en bedrog en oneerlikheid, moet jy besef aan wie se kant skaar jy jou in daardie situasie!

G'n wonder Spr. 14:2 sê: "Wie opreg lewe, dien die Here; wie krom paaie loop, het nie eerbied vir die Here nie."

Om eerlik te wees is om in daardie betrokke situasie te kies om God te vertrou om ook in daardie situasie God te wees, en Sy Woord die rots te laat wees waarop jy, midde die storms, wil bou.

Sy Woord is immers die waarheid, soos Joh. 8:31 en 32 sê: "Toe sê Jesus vir die Jode wat in Hom glo: "As julle aan my woorde getrou bly, is julle waarlik my dissipels; en julle sal die waarheid ken, en die waarheid sal julle vry maak."

Om eerlik te wees is maar net nog 'n manier om te kies om onder alle omstandighede volgeling van Jesus te wees en om Hom onvoorwaardelik en sonder kompromie te dien.

En boonop gaan jy ontdek hoe elke besluit wat jy neem om eerlik te wees, jou geloof in God gaan versterk.

## DAG 37 OM EERLIK TE WEES IN DIE ONBELANGRIKE DINGETJIES (10)

Daardie vers in Lukas 16:10 bly my altyd by as ek oor my hantering van geld nadink. Onthou jy, dit is waar Jesus die volgende sê: "Wie in die kleinste dinge oneerlik is, is ook in groot dinge oneerlik." (Lukas 16:10).

Maar kom ek haal vir jou die hele gedeelte aan: "Wie in die kleinste dinge betroubaar is, is ook in die groot dinge betroubaar; en wie in die kleinste dinge oneerlik is, is ook in groot dinge oneerlik. As julle dan nie betroubaar is in die hantering van die oneerlike Mammon nie, wie sal die ware rykdom aan julle toevertrou? As julle met 'n ander man se goed nie betroubaar is nie, wie sal dan iets aan julle gee om as julle eie te besit? Geen huisbediende kan vir twee base tegelyk werk nie, want hy sal of die een minder ag en die ander een hoër, of vir die een meer oorbêre en die ander een afskeep. Julle kan nie God én Mammon dien nie." (Luk 16:10-13)

Elke keer skud dit my as ek dit lees. Om te besef God kyk na of ek eerlik of oneerlik is in my hantering van geld, want dit is bepalend of Hy dit wat in Sy oë werklik van waarde is, aan my gaan toevertrou! Al is geld vir Hom van die "kleinste dinge", en dus onbelangrik in Sy oë.

Dink 'n mens 'n bietjie hieroor na, is dit vir jou gou duidelik waarom Jesus so ernstig hieroor is.

Hoe kan 'n mens immers oneerlikheid in jou hantering met geld rym met die praktiese liefhê van jou naaste! "Die liefde doen die naaste geen kwaad aan nie" (Rom. 13:10).

Die oomblik as ons oneerlik is, steel ons van iemand anders. Of dit nou van 'n sakeonderneming is of van die staat.

Om nie eers te praat van hoe ons oneerlikheid ander Christene en Christen-sakemanne en –vroue benadeel nie. Ons hele getuigenis as Christene is op die spel.

G'n wonder Paulus sê daar in Fil. 2:15 die volgende nie: "Sorg dat julle bo alle verdenking staan en opreg bly, onberispelike kinders van God te midde van ontaarde en korrumperte mense. Tree onder hulle op as ligdraers in die wêreld."

Oneerlikheid in al sy vorms is natuurlik ook sonde en benadeel ons verhouding met God self. Dit versteur ons intieme liefdesverhouding en kommunikasie met God, en steel ons innerlike vrede.

G'n wonder Paulus sê daar in Kol. 3:15 dat ons innerlike vrede amper soos 'n skeidsregter is wat telkens sy fluitjie blaas as daar êrens 'n oortreding was. "En die vrede wat Christus gee, moet in julle lewens die deurslag gee. God het julle immers geroep om as lede van een liggaam in vrede met mekaar te lewe."

Die anderkant van hierdie soort sonde is dat, hoe meer jy toegee daaraan, hoe meer verhard jou hart, en word jou gewete meer en meer onsensitief vir die inspraak en stem van God se Gees hieroor in jou lewe.

Daarom moet ons ook telkens ons onderwerp aan die beheer en leiding van God se Gees ook in hierdie area van ons lewe.

In die lig van Jesus se woord aan Sy dissipels daar in Mat. 26:41: "Waak en bid, sodat julle nie in versoeking kom nie. Die gees is gewillig, maar die vlees is swak."

En in die lig van dit wat daar in Gal. 5:16 en 17 staan: "Laat julle lewe steeds deur die Gees van God beheers word, dan sal julle nooit swig voor begeertes van julle sondige natuur nie. Wat ons sondige natuur begeer, is in stryd met wat die Gees wil, en wat die Gees wil, is in stryd met wat ons sondige natuur begeer."

Bly dus ook maar weg uit vennootskappe, besigheidstransaksies en vriendskappe met mense wat geneig is om oneerlik op te tree. "Moet julle nie langer laat mislei nie: 'Slegte geselskap bederf goeie sedes.'" (1 Korintiërs 15:33). "Hy wat saam met 'n dief deel, haat sy eie siel." (Spreuke 29:24, 1953 Vertaling).

Die wonder is natuurlik dat as jy oneerlik was, geld die wonderlike belofte daar in 1 Joh. 1:9 natuurlik ook vir jou: "Maar as ons ons sondes bely- Hy is getrou en regverdig, Hy vergewe ons ons sondes en reinig ons van alle ongeregtigheid."

Bely beteken: erken dat dit sonde is; vra God se vergifnis daarvoor in die lig van dit wat Jesus Christus ook daarvoor reeds betaal het met Sy lewe aan die kruis; aanvaar God se vergifnis op grond van hierdie belofte; en staan dan op en gaan maak reg waar jy moet gaan reg maak; en kies om nooit weer hierdie oortreding te begaan nie.

Dit is immers wat ware Bybelse restitusie behels.

## DAG 38 LEER DIT VIR JULLE KINDERS

Elke geslag Christene is verantwoordelik daarvoor om die waarhede van die Woord, en dus ook God se beginsels oor finansies, aan hulle kinders oor te dra. "Gee leiding aan 'n jongmens oor hoe hy moet leef, en hy sal ook as hy al oud is nie daarvan afwyk nie." (Spreuke 22:6). Hulle het nodig om God se manier te leer hoe om hulle finansies te hanteer. En sommer van kleins af.

Luister net na die merkwaardige belofte wat daar in Ps. 78 staan: "Wat ons gehoor het en wat ons weet, wat ons vaders ons vertel het, sal ons vir ons kinders nie verswyg nie. Ons sal aan die volgende geslag vertel van die roemryke dade van die Here en van sy mag, van die wonderdade wat Hy gedoen het... Hy het ons voorvaders beveel om dit aan hulle kinders bekend te maak, sodat die volgende geslag dit kan weet en die kinders wat nog gebore sal word, dit weer aan hulle kinders kan vertel."

Natuurlik is ons eerste verantwoordelikheid as Christenouers om aan ons kinders die kern-evangelie so eenvoudig moontlik te vertel. Sodat hulle ook die geleentheid kan hê om so vroeg moontlik die Koning wat ons dien, persoonlik te leer ken en te leer vertrou met hulle hele lewe.

Maar dan is dit ook deel van ons verantwoordelikheid om hulle te leer hoe om as gelowiges geld te hanteer.

Lyk vir my daar is ten minste drie maniere om vir ons kinders te leer hoe God wil hê ons moet geld hanteer. In die eerste plek moet hulle dit uit ons monde hoor. Soos Deut. 6:6 en 7 so treffend sê: "Hierdie gebooi wat ek jou vandag gegee het, moet in jou gedagtes bly. Jy moet dit inskerp by jou kinders en met hulle daarvoor praat as jy in jou huis is en as jy op pad is, as jy gaan slaap en as jy opstaan."

In die tweede plek moet ons dit vir hulle leer deur ons voorbeeld. In 1 Kor. 11:1 sê Paulus die volgende vir die jonger Christene met wie hy 'n pad geloop het: "Volg my voorbeeld, soos ek die voorbeeld van Christus volg."

Kinders absorbeer hulle ouers se gesindhede teenoor geld soos 'n spons water. As jy van diegene is wat geld sommer onbeplan en op die ingewing van die oomblik uitgee, moet jy nie verbaas wees as jou kinders sommer gou-gou dieselfde doen met die geld wat hulle het nie.

Die derde manier is om kinders van jongs af hulle eie geld te gee om die geleentheid te hê om prakties toe te pas wat hulle by jou hoor en sien.

Laat hulle toe om geld te verdien, en te spandeer sodat hulle kan leer hoe om God se finansiële beginsels in te oefen. Leer hulle om te begroot, hoe om weg te gee, te spaar, verstandig te spandeer en skuld te vermy.

Maar leer hulle ook dat God ook ons geskep het om te kan werk tot ons voordeel en as deel van ons diens en aanbidding van Jesus. Leer hulle om hard te werk en dit wat hulle doen "excellent" te doen, asof vir die Here, in wat hulle ook al doen.

Dink net daaraan, wat kan gebeur as jou kinders, anders as die meeste van ons, nie eers groot finansiële foute hoef te maak voordat hulle leer wat God se plan ook vir hulle hantering van geld is nie!

As hulle van vroeg af kan leer om vrygewige gewers te wees teenoor dié mense waar God hulle wil gebruik as Sy kanale.

Maar ook verstandige spandeerders van die geld en eiendom waaroor God hulle as Sy rentmeesters aangestel het.

En gereelde spaarders wat ook verantwoordelik rekening hou met toekomstige behoeftes.

En deurgaans getrou hulle werk van elke dag so te doen dat niemand agterna hoef te kom om dit oor te doen of onnodige foute moet kom herstel nie.

Sodat die mense om ons ook in hierdie deel van ons lewe kan sien dat ons volgelingen van Jesus is.



## DAG 39 ELKE DAG IS 'N KEUSE TUSSEN LEWE EN DOOD

Ek wil graag hierdie reeks afsluit deur hierdie week en die week daarna te gesels oor die 2 dinge wat ook in hierdie area van jou lewe as Christen elke dag plaasvind.

Vir 38 weke reeds het ons met mekaar gesels oor die geleentheid wat ek en jy het om van 9 tot 5, van Maandag tot Vrydag, in die werkplek en as ons met geld werk, lig en sout te wees as volgelinge van Jesus.

Maar soos wat ek ook al 'n paar keer gesê het, ons moet besef dit gaan nie in die eerste plek hieroor vir God nie. Vir God, as Vader, Seun en Gees, gaan dit oor wat in elkeen van ons se hart elke oomblik van die dag aangaan.

Of ons Hom, met ons totale menswees, elke oomblik van die dag, werklik liefhet. Elke keuse wat ek maak, ook wanneer ek besigheid doen, of geld hanteer, vertoon op die een of ander manier wat werklik in my hart aangaan. Vertrou ek werklik God? Vertrou ek werklik God om God te wees? En om Sy beloftes en Woord na te kom? Handel en dink ek in dié situasie in harmonie met my liefde vir God en my begeerte om net Sy wil vir my hele lewe te gehoorsaam?

Dit is elke oomblik 'n geval waarin Deuteronomium 30:19 geld: "Ek roep vandag die hemel en die aarde tot getuie teen julle dat ek die lewe en die dood aan jou voorgehou het, die seën en die straf. Kies die lewe, sodat jy en jou nageslag kan lewe."

Natuurlik is dit nie net waar van 9 tot 5, van Maandag tot Vrydag, in die besigheidswêreld nie, maar, soos ek gesê het, ook waar in elke ander gedeelte van my lewe as volgelinge van Jesus.

Elke keuse waarvoor ek en jy staan is of 'n geleentheid waarin ons kan groei en sterker word (= beproef kan word) as volgelinge van Jesus, of wat ons kan toegee aan die versoekinge wat die vyand in daardie situasie vir ons stel.

Daarom is dit belangrik om seker te maak dat ons fondasies hier rondom stewig en waterpas is met die Woord en dat ons reg hieroor nadink.

1. God toets Sy kinders op baie maniere, maar Hy versoek ons nooit nie.

Dit is waarom Jakobus daar in Jak. 1:13 tot 15 sê: "Iemand wat in versoeking kom, moet nooit sê: "Ek word deur God versoek" nie; want God kan nie verlei word nie, en self verlei Hy niemand nie. Maar 'n mens word verlei deur sy eie begeertes wat hom aanlok en saamsleep. Daarna, as die begeertes bevrug geraak het, bring dit die sonde voort; en as die sonde ryp geword het, loop dit uit op die dood."

God se bedoeling met toetsing is sodat ons net sterker en sekerder van ons geloof uit elke "eksamen" sal uitstap.

Daarom bemoedig Jakobus ons as hy in hoofstuk 1:2 tot 4 vir ons sê: "My broers, julle moet baie bly wees wanneer allerlei beproewings oor julle kom, want, soos julle weet, as julle geloof die toets deurstaan het, stel dit julle in staat om te volhard. En die volharding moet end-uit volgehou word sodat julle tot volle geestelike rypheid kan kom, sonder enige tekortkoming."

Hierteenoor is elke versoeking wat dit vyand voor ons opstel in werklikheid niks anders as bloot 'n lokval en landmyn waarmee hy, uiteindelik, ons wil vernietig en doodmaak nie (Joh. 10:10).

2. Elke versoeking is in werklikheid aas wat die vyand uitgooi vir die gedurige honger en dors van ons vlees.

Soos Jak. 1:14 sê: “Maar 'n mens word verlei deur sy eie begeertes wat hom aanlok en saamsleep.”

In elkeen van ons, as God se volgeling, is daar hierdie donkerkant wat die Bybel “vlees” noem. Dit is soos 'n honger en dorstige tier wat, as hy onder die beheer van God se Gees is, toegesluit bly onder in die kelderverdieping van ons menswees, waar dit niemand kan skade aandoen nie. Daar is dit getem en onder die beheer van die oorwinning wat Christus vir ons bewerk het.

Maar laat ons nooit 'n fout maak en dit ignoreer en maak asof dit nie bestaan nie!

Die oomblik as ons dit doen, speel ons reg in die vyand se hande! Dit maak dat ons nie op ons hoede is nie. En dan kom die vyand en lok daardie tier uit die kelderverdieping uit met aas waarvoor hy weet ek en jy 'n swakheid het.

Hy ken ons elkeen se swakhede en achilleshiel!. En dit is sy teiken.

Miskien is joune geld, of die teenoorgestelde geslag. Miskien nie.

Wees bedag op sy gedurige aanslae. Veral daardie tye wat jy dit die minste verwag. Petrus sê nie verniet nie: “Wees nugter, wees wakker! Julle vyand, die duiwel, loop rond soos 'n brullende leeu, op soek na iemand om te verslind.”

Maar volgende keer gesels ek verder.

## DAG 40 'N KEUSE TUSSEN LEWE EN DOOD (VERVOLG)

Ons is besig om hierdie reeks oor Christen-wees op die markplein af te sluit deur saam te dink oor die drama wat dag vir dag agter die skerm in elkeen van ons se lewens plaasvind.

Die erns van hierdie drama is dat dit elke keer my en jou voor 'n keuse stel: naamlik om te kies tussen lewe of dood. Wat ek reeds in die verband met jou gedeel het was die volgende:

- God toets Sy kinders op baie maniere, maar Hy versoek ons nooit nie.
- Elke versoeking is in werklikheid aas wat die vyand uitgooi vir die gedurige honger en dors van ons vlees.

Wat ek verder graag met jou wil deel is die volgende:

3. Om versoek te word is nie sonde nie!

Jesus self was herhaaldelik tydens Sy verblyf op aarde versoek! (Heb. 2:17-18; 4:15)

Martin Luther het gesê: 'n Mens kan nie verhoed dat voëls oor jou kop vlieg nie. Maar jy kan verhoed dat hulle in jou hare nes maak.

4. Waarin lê die krag en die essensie van versoeking dan?

Versoeking is in werklikheid 'n geleentheid om 'n legitieme behoefte in ons lewe op 'n onlegitieme wyse - wat teen God se wil is - te bevredig.

5. Die oomblik as jy toegee aan versoeking ...

Hoe meer 'n mens "ja" sê en "die aas" vat wat die vyand vir jou uitgooi, hoe moeiliker raak dit in die toekoms om "nee" te sê daarvoor.

Sonde is mos verslawend en gewoontevormend van aard.

En die ander dodelike kant daarvan is dat dit ons gewete begin toe-skroei en stil maak.

Daarom skryf die Hebreërskrywer daar in Heb. 3:12 en 13: "Broers, julle moet toesien dat daar nooit by een van julle 'n verkeerde gesindheid van ongeloof ontstaan en hy van die lewende God afvallig word nie. Maar solank daar nog 'n "vandag" is, moet julle mekaar elke dag aanspoor sodat niemand van julle deur die misleiding van die sonde verhard word nie."

Satan geniet dit veral om ons te versoek wanneer ...

- Ons nog jonk is in ons geloof, kort na ons bekering ( 1 Tim. 3:6)
- Ons dink ons geloof is sterk, want dan is ons gewoonlik op ons mees kwesbaarste (1 Kor. 10:12)
- Wanneer ons ons op vreemde terrein begewe en onbewus is van hoe die vyand juis daar opereer
- Wanneer God besig is om ons geloof te beproef

- Wanneer ons fisiese aanslae beleef, soos tydens siekte, vervolging, honger en dors, en wanneer ons te min het (Mat 4)
- Wanneer ons pas 'n geweldige hoogte- of laagtepunt geestelik beleef het – soos Elia moes leer daar in 1 Kon. 18 en 19

6. Een van Satan se mees effektiewe versoekingstaktieke is om sy gedagtes in ons kop te sit en dan ons daarvoor te laat skuldig voel.

Gaan kyk maar na gedeeltes soos 1 Kron. 21:1; Mat. 16:13-23; Hand. 5:1-3; om Satan se vemoë om sy gedagtes in ons kop te sit, te herken.

Van die belangrikste lesse vir 'n Christen om te leer is ...

- om te ontdek jy hoor elke dag van jou lewe ten minste vier stemme: die stem van jou vlees; die stem van God; die stem van Satan; en die stem van die gemeenskap (= gemeenskapsdruk) om jou.
- En om te leer hoe om hierdie stemme te onderskei van mekaar.

7. 'n Ander geliefde taktiek van die vyand is om ons te verlei om te begin om die normale gesonde grense van goeie, gesonde dinge in ons lewe, te begin oortree na die “te ... kant” daarvan.

Soos te veel eet, te veel slaap, te veel ons self en ons mense te wil beskerm; te veel voorsiening probeer maak vir die toekoms, ens.

Daarom moet ons werklik bid dat God se Gees ons sensitief sal maak om ook hierin werklik net Sy stem in ons lewe te hoor, en om te sien as die rooi ligte flikker in sekere areas, as Hy ons wil waarsku as ons dinge te ver wil neem.

Onthou maar die storie van die padda wat salig-gelukkig in die lou-warm water bly swem het, terwyl die water, stadig maar seker, al hoe meer, doelbewus, verhit is!

Onthou die vyand se oogmerk is om jou en jou mense te bedrieg, te belieg, te besteel, te vernietig en dood te maak.

Maar onthou ook dat hy dit juis doen as 'n “engel van die lig”.

As dit op een terrein veral waar is, is dit veral waar daar op die markplein en waar ons met geld werk!

Kom ons sluit hierdie reeks af deur vir mekaar die volgende te bid: Vader, laat U Naam geheilig word; laat U koninkryk kom; laat U wil geskied, soos in die hemel, net so ook hier op aarde. Gee ons vandag dit wat ons nodig het; en vergewe ons ons sonde, soos ons ook diégene, wat teen ons sondig, vergewe. En laat ons nie in versoeking kom nie; maar verlos ons van die bose. Amen.